

Si₂ carta a₂ ca₂ jmo₃ San Pablo ne₄ dsa₂ ROMANOS

Jmo₅ Pa₄ si₂ a₂ chein₃ ne₄ Guá'₅ i₂ chan₂ Roma

¹ Jniá₂ Pa₄, líng₅ dsa₂ i₂ jme₂ ti₃ ne₄ Jesucristo; Diú₄ ca₂ tē₃ jniá₂, jaun₂ ca₂ chei'₃ a₂ léng₂ dsa₂ i₂ chen₄ quiáin₅ ia₁ jaun₂ qui'₁ ě₄ jág₁ dse₃ quió'₅.

² Ca₂ ě₂ Diú₄ jág₁ dse₃ nē₅ ca₂ tó'₂ ne₄ Si₂ jnió₅ quió'₅ ma₂ líg'₂, ca₂ cuē₃ tē₂ le₃ quian'₅₄ dsa₂ i₂ jme₁ ě₂ jág₁ quiáin₅,

³ a₂ ĩn₂₃ ja₁ ŋi'₅₄, i₂ jme₁ lín₄ tsi₁ jon₂ David lia'₂ con'₂ lín₅ dsa₂ mi₂ güí₃;

⁴ lia'₂ con'₂ lē₅ Jme₂ dsí₂ Jnió₅ nē₃ ca₂ jme₃ jnia₅ a₂ lín₅ 'éi₂ Ja₁ ŋi'₅₄ Diú₄ jme₁ ca₂ jein'₅₄ táng₃ jin₄ 'lag₄, quian'₅₄ jui₅ b́₂ quió'₅, a₂ 'uain'₂. Jesucristo Te₁ gui'₅₄ quián₂ jniog₄ bá₄ 'éi₂.

⁵ Tē₂ le₃ quian'₅₄ Jesucristo, ton'₂ o₄ quió'₄ 'éi₂ bá₄, ma₂ jmo₃ Diú₄ dse₃ dsí₅ ja₁ con₂ jnia'₅₄, jaun₂ ca₂ chei₃ jin₄ dsí₂ nau₂ ia₁ jaun₂ le₃ chan₂ dsa₂ ca₂ le₂ con₂ juig₂ i₂ jme₂ ti₃ jág₁ quió'₅, ia₁ a₂ 'éin₂.

⁶ Jin₄ dsa₂ 'éi₂ tián'₅ 'nia'₂ i₂ ma₂ tē'₃ Diú₄ ján₃, a₂ lén'₂ 'nia'₂ i₂ quián₅ Jesucristo.

⁷ Jaun₂ tsíng₂ si₂ la₂ ne'₅₄ ca₂ le₃ jín'₃ 'nia'₂ i₂ tián'₅ jē₄ juig₂ Roma, i₂ lín₅ i₂ nio₃ Diú₄, jaun₂ ma₂ tē₂₃ a₂ le₃ chan₂ 'nia'₂ líng'₅ dsa₂ i₂ lē₅ 'í₁ i₂ ma₂ quiáin₅. Jui₁ jme₂ gu'₅₄ bá₄ Diú₄ ju₁ le₂ chan₂ bá₄ 'nia'₂ dse₃, ju₁ 'ag₅₄ bá₄ tei₄ o₄ quió'₄ Diú₄ Jme₂ jniog₄, o₄ quió'₄ Te₁ gui'₅₄ Jesucristo nē₃.

'Nio₃ Pa₄ dsi₃ jág₂ juig₂ Roma

8 Jë₁le₂'uig₅₄, tē₂le₃ quian'₅₄ Jesucristo cuē₅ ti₁'mag'₄ Diú₄ quiáng₃ o₄quián'₂ 'nia'₂ ca₂le₃jíng'₃, ia₁ ca₂le₂con₂ bá₄ 'ei₅ jág₁ dsia₅ dsa₂ 'a₂ lia'₂ 'én'₂ 'nia'₂.

9 Jaun₂ Diú₄, i₂jme₂tí₁ jniá₂ ne₄ ca₂le₃jě₃ jme₂dsí₂ quió₃, a₂qui₂'ě₅ jág₁ dse₃ quió'₅ Ja.ŋi'₅₄, 'éi₂ bá₄ i₂lín₅ i₂jáng'₅ jág₁ dsau₅ 'a₂ lia'₂ dsau'₂ dsi₃ 'nia'₂ ca₂le₃jě₃ jë₁chi₂lén'₂ jniá₂ Diú₄.

10 Co₂tan₅₄ bá₄ mi₅ jniá₂ ne₄ Diú₄ jui₁le₅₄ bá₄ 'a₂ lia'₂ 'ŋio₂ dsi₅, 'a₂ lia'₂ lé₂ a₂cuin₃ jmig₄, ca₂lia'₂ ca₂lě₃ a₂nei₅₄ i₁jíng₁₂ 'nia'₂.

11 Ia₁ 'ín₅ dsi₃ i₁jíng₁₂ 'nia'₂, ton'₂ 'nio₃ jme₁'ong₁₂ 'e₂ caun₂ 'nió'₅ jme₁'ong₁₂ 'nia'₂ tē₂le₃ quió'₅ jme₂dsí₂, ia₁jaun₂ le₃náu'₁ guě'₄ 'nia'₂ tiá₂;

12 co₂'nió'₄ le₃jua'₅₄, ia₁jaun₂ lé₂ le₃cuē₅₄ lián'₂ rin'₅₄ le₂jau₂ le₂jau₂ quian'₅₄ a₂'éin₂ jui₁lia'₂ 'én'₂ 'nia'₂ jui₁lia'₂ 'én₂ jniá₂ ján₃.

13 Rin'₅₄ jniog₄, 'nio₃ le₃ŋi'₅₄ 'nia'₂ 'lióng₂ ráun₂ bá₄ ma₂lě₅ dsi₃ a₂'nio₃ nei₅₄ i₁jíng₁₂ 'nia'₂, la₁ ca₂lia'₂ jnia'₅₄ rē₂ně₃ tsá₃ ma₂lě₅, ia₁ ma₂rē₂jni₅ jui₅. 'Nio₃ nei₅₄ ia₁jaun₂ chi₁lo'₂ a₂ma₂rau₂ quió'₅ Jme₂dsí₂ jě₄ quián'₂ 'nia'₂, jui₁lia'₂ ma₂cag'₄ jniá₂ ján₃ juig₂ siá'₂, go₄ dsi₂nau₂ sián'₂ ján₃.

14 Ia₁ jniá₂ bá₄ niog₅ ne₃ ca₂tíng₂ quian'₅₄ ca₂le₃jín₃, jui₁lín₄ dsa₂ 'e₂ lín₅, dsa₂ griego, o₃ dsi₂nau₂ 'e₂, dsa₂ i₂ŋí'₂ dsi₅, o₃ dsa₂ co₄ 'e₂;

15 jaun₂ le₂ně₅ bá₄ 'ín₅ dsi₃ a₂qui₂i'_{ě₃} jág₁ dse₃ ja₁con₂ dsa₂ juig₂ go'₄ 'nia'₂ i₂chan₂ Roma ján₃.

Bí₂ a₂'io₅ jág₁ dse₃

16 Ia₁ tsá₃ 'e₂ o₂guí'₃ jéin₅ jniá₂ quian'₅₄ jág₁ dse₃, ia₁ jui₅bí₂ quió'₅ Diú₄ bá₄ ně₅ a₂lión₂ ca₂le₃jín₃ i₂'én₂:

quió'₅ dsa₂ judíos de'₂ le₂'uig₅₄, ján₃ bá₄ le₂jaun₂
quió'₅ dsi₂nau₂.

17 Ia₁ jág₁ dse₃ la₂ jáng'₅ jág₁ dsau₅ 'a₂ lia'₂ chei'₂
Diú₄ jui₅ co₂rĕ₂, jui₅ ja₁ma₂dsan₃ dsáu₁ dsa₂, jui₅
a₂jme₂lióg₃ a₂'é₂n₂ dsa₂, ton'₂ a₂'é₂n₂ dsa₂ ca₂lia'₂
jë₁ca₂tó'₂. Le₂nĕ₅ juá'₂ ne₄ Si₂: “Dsa₂ i₂ŋi₅ jui₅ co₂rĕ₂
ia₁ a₂'é₂in₂, 'é₂i₂ bá₄ le₃chan₂.”*

A₂ma₂rĕ₂cán'₄ dsa₂ mi₂güí₃ guioin₅₄

18 A₂juá'₅ jniá₂ le₂nĕ₅, ia₁ a₂ne₄ bá₄ jniog₄ jaun₂,
caun₂jme₂jnia₅ Diú₄ a₂'nei₂ tĕ₂ja₁guá₄ guei'₅₄ i₂juí₃
ja₁con₂ dsa₂ i₂tsá₃ Diú₄ cuin₅, ja₁con₂ dsa₂ i₂tsá₃
tion'₅₄ jui₅ co₂dsau₅, dsa₂ i₂jnĕi₅ jui₅ quió'₅ jág₁ dsau₅
tĕ₂le₃ quian'₅₄ jui₅ 'lig'₅₄ ja₁i₂nioi₅₄.

19 Ia₁ rĕ₂jniá₂ rĕ₂ bá₄ ca₂le₃jĕ₃ a₂ŋi₅ dsa₂ 'a₂ lia'₂
lín₅ Diú₄, ia₁ a₂ma₂ca₂jme₃jniāi₂₃ tĕ₂le₃ quian'₅₄
a₂ma₂jmo₃,

20 ia₁ ca₂le₃jĕ₃ a₂tsá₃ rĕ₂jniá₂ quió'₅ Diú₄, lé₂
le₃cuí'₅ dsa₂ tĕ₂le₃ quian'₅₄ ca₂le₃jĕ₃ a₂ma₂jmo₃;
ma₂ca₂rĕ₂jniā₂ dse₃ lín₃ bá₄, ca₂le₃ ca₂jmo₃ Diú₄
mi₂güí₃ a₂lín₅ dsón'₂ Diú₄, ton'₂ a₂'io₂₃ jui₅bí₂
co₂tan₅₄ bá₄; jaun₂ le₂nĕ₅ bá₄ tsá₃ ma₃'e₂ lé₂ le₃juá'₂
dsa₂ jua'₅₄ a₂tsá₃ ŋi₅.

21 Ia₁ o₁ŋia'₅₄ ŋi₅ le₂nĕ₅ a₂chan₂ Diú₄, la₁ tsá₃
ma₂ca₂jme₃juag'₂ lia'₂ con'₂ lĕ₅ ca₂tín₂ Diú₄ le₃juin'₂,
on₃ guĕ'₂ ma₂cuĕ'₃ Diú₄ ti₁'mag'₄. Jĕ₂ bá₄ ma₂ja₂lĕin₂
qui₂'no'₂ dsí₅ a₂tsá₃ ta₁ tí₄; tsá₃ tĕ₂tsi'₅₄ dsí₅, jaun₂
ma₂tĕ₁'ŋiái₄ jĕ₄ qui₁né'₃.

22 Jui₁'a₂ guĕ₃ la₂ juá'₂ a₂lín₅ dsa₂ i₂cuí'₅, a₂tĕin₂
a₂ŋi₅, la₁ dsa₂ co₄ bá₄ ca₂lĕin₃ jĕ₁ca₂tó'₂.

* 1:17 Habacuc 2:4.

23 Jaun₂ ně₃, 'nió'₄ a₂jme₁jme₃juin'₂ Diú₄ i₂tsá₃ ton₄ jmig₄ jón₂, ma₂ca₂jme₃tsín₃ bá₄ a₂co₂tág₅ co₂'né'₅ quió'₄ Diú₄ quian'₅₄ nió'₄ quió'₅ dsa₂ mi₂güí₃ i₂dsan₂, ju₁lia'₂ nió'₄ quió'₅ já'₂ i₂'in₅, já'₂ i₂tsé'₅ quió'₅, já'₂ i₂lě₂ quén₂ mi₂tag₄ ně₃.

24 'Uig₅₄ ně₅ ně₃ co₂dsia₅ ma₂jáng'₄ Diú₄ jui₅ 'lig'₅₄ a₂'in₅ dsí₅ a₂tsá₃ le₁jě₃, ia₁jaun₂ caun₂ i₃nioi₅₄ jmo₂₃-dsáu₅ cosa a₂o₂guí'₃ a₂jmái'₅ ni₁ñi₁₂ quian'₅₄ riin'₅₄ le₂jain₂ le₂jain₂,

25 ia₁ ca₂jme₃tsín₃† jág₁ dsau₅ quió'₅ Diú₄ quian'₅₄ jág₁ tē₂jág₁; jaun₂ ma₂ja₂lén₂ jme₂gó'₃ jme₂juin'₂ cosas a₂ca₂jmo₃ Diú₄, 'nió'₄ a₂jme₁jme₃juin'₂ Diú₄ 'ñiog₅, i₂ca₂tín₂ dsón'₂ a₂jme₃juag'₂ dsa₂ co₂tan₅₄. jLe₂ně₅ dsón'₂ bá₄! A₂méi₃.

26 'Uig₅₄ ně₅ co₂dsia₅ ma₂jáng'₂ jui₅ ja₁cué'₅ o₂'ñió₃ o₂ñia₃ dsí₅ a₂lě₅ o₂guí'₃, ia₁ ca₂le₂jiog₅ dsa₂ mí₂ quiáin₅ bá₄ ca₂jme₃tsín₃ 'a₂ lia'₂ i₂nioi₅₄, a₂tsá₃ ma₁nioi₅₄ lia'₂ con'₂ dsi₂ten₅₄ 'i₄ 'éi'₃ i₃nio₄ lia'₂ dsa₂ mí₂ dsa₂ ñe'₂.

27 Ján₃ bá₄ guē'₂ le₂jaun₂ dsa₂ ñe'₂ ma₂ca₂tí₂ bá₄ 'a₂ lia'₂ 'i₄ 'éi'₃ le₃chain₂ tiain'₃ quian'₅₄ dsa₂ mí₂; ma₂ja₂lén₂ chóg'₅ dséi₂ quian'₅₄ dsa₂ ñe'₂ riin'₅₄, jmo₂₃-dsáu₅ a₂o₂guí'₃ le₂jain₂ le₂jain₂, jaun₂ gue₂₃ uig₅ guoin₅₄ a₂ca₂tín₂ o₄quió'₄ ju₁ja₁ca₂quiá₂ cau₅.

28 Jaun₂, 'uig₅₄ ia₁ a₂lín₂ a₂tsá₃ 'e₂ quen₅ Diú₄, tsá₃ toin'₂ jui₅ 'éi₂, jaun₂ co₂dsia₅ ma₂jáng'₂ Diú₄ jui₅ ja₁dsi₂qui₂dsi₃jiog₅ dsí₅ a₂'lig'₅₄, a₂dsi₂qui₂dsi₃cóin'₅ a₂'liain'₂, a₂jmo₃ a₂tsá₃ dsi₂ten₅₄.

29 Ca₂lia'₂ qui₂rē₂rin₅ ca₂le₃jě₃ ne₅₄ cosa 'lig'₅₄ jme₂dsi₂ quió'₅, qui₂'no₂₃ dso₄, jmá'₃ guoin₅₄

† 1:25 'Nio'₂ ja₁ton₅ Jeremías 2.11.

bá₄ 'nio₃ jme₁'ñioí'₃, a₂qui₂'no'₂ dsí₅ 'a₂ lia'₂ 'ë'₃ uig₅ riin'₅₄. Rë₂can'₂ dsí₅ a₂uig₅ dsí₅ jiin'₂ riin'₅₄, a₂jme₂dsiain₂₃ riin'₅₄, a₂lë₁qui₂dsia₂₃ mi'₅₄, a₂qui₂jme₂gain₂₃ riin'₅₄, tsá₃ dsau₅ jág₁ quian₅, 'ñio₅ 'ñio₄ dsa₂, a₂co₂jmo₅ dsa₂ jág₁ të₂jág₁ jë₄ të₃co'₅₄.

³⁰ Ján₃ bá₄ le₂jaun₂ a₂lë₁chi₂'ag₅ dsa₂, 'ñiai₅₄ bá₄ Diú₄, a₂lë₁co₂jmái'₂ riin'₅₄, a₂jme₂rón₂ guoin₅₄, dsia₂₃ jág₁ tá'₅, a₂qui₂'no'₂ dsí₅ 'a₂ lia'₂ jmo₃ a₂'lig'₅₄, on₃ guë'₂ jmá'₃ jme₂gain₃ chog₅₄-jmei₂;

³¹ tsá₃ të₂tsí'₅₄ dsí₅ ně₃, on₃ guë'₂ jua'₅₄ jme₃ti₃ 'e₂ caun₂ jág₁ cuë₂₃ a₂jmo₃; tsá₃ 'ein₂ 'iin₂₃ 'i₁jan₂, tsá₃ tin₂ dsí₅ 'éin₂ dso₄ quió'₅ riin'₅₄, on₃ guë'₂ ñéi₂ dsí₅.

³² I₂ñi₅ rë₂ bá₄ dsa₂ 'éi₂ 'a₂ lia'₂ lë₅ 'éi'₃ ma₂quí'₃ Diú₄, ia₁ ca₂le₃jín₃ i₂jmo₅ le₂në₅ ca₂tín₂ dsiáin₃ bá₄; la₁ jui₁'e₂ guë₃ ñi₅ a₂jaun₂, on₃jua'₅₄ jmá'₃ guoin₅₄ caun₂ qui₂jmo₂₃, të₂le₃ të₅ dsí₅ bá₄ a₂jmo₅ i₂sián'₂ ján₃.

2

Diú₄ bá₄ con₂ 'í₁ co₂rë₂ 'a₂ lia'₂ con₂ lë₅ dsón'₂

¹ Jaun₂ ně₃, tsá₃ 'e₂ lé₂ le₃jua'₅₄ 'ne₂ jua'₅₄ a₂tsá₃ 'e₂ dso₄ ring'₂, 'ne₂ guë'₂ i₂con₂ 'í₁ ja₁con₂ i₂sián'₂, tsá₃ a₂nag₅₄ jui₁'ein₂ guë₃ líng'₅. Ia₁ në₁jua'₂ cáun'₂ 'í₁ ja₁con₂ ríng'₂, jaun₂ co₂'nió'₄ ma₂qui₂dsí'₁ 'éi'₃ ja₁con'₂ 'ñiag'₂, ton'₂ ján₃ bá₄ le₂jaun₂ jmo'₂ 'ne₂ 'ñiag'₂ a₂cáun'₂ 'í₁ jaun₂.

² Ia₁ ne₄ bá₄ jniog₄ jaun₂, Diú₄ bá₄ i₂con₂ 'í₁ rë₂ 'a₂ lia'₂ con'₂ lë₅ dsón'₂, ja₁con₂ dsa₂ i₂jmo₅ le₂në₅.

³ Jaun₂ 'ne₂ ně₃ i₂cáun'₂ 'í₁ ja₁con₂ i₂sián'₂ ton'₂ a₂le₂jaun₂ bá₄ guë'₂ jmo'₂ 'ñiag'₂, ¿'e₂ líng'₂? ¿A₂lióng'₂ jë₁ma₂të₂ rë₁con₂ Diú₄ 'í₁ ja₁cong'₂?

4 ¿O₃ bá₄ tsá₃ dsáu₅ 'au'₂ ia₁ a₂ŋí₄ lë₃ dse₃ 'ua₁ dsí₅ Diú₄, a₂jmo₂₃ tió'₃ dsí₅, a₂jme₂juin'₂ dsí₅ ně₃? ¿Tsa₁ len'₅₄ 'ne₂, ta₁ a₂quí'₅ a₂dse₃ dsí₅ Diú₄ a₂jaun₂ bá₄ jiog₂₃ a₂dsi₃quén'₅ 'au'₂?

5 La₁ 'ŋio₅ 'ua'₂ 'au'₂ tsá₃ 'niog'₂ jme₁tsíng'₄ 'au'₂; 'uig₅₄ jaun₂ ně₃ caun₂ jme₁juí'₁ bá₄ a₂jme₂'ne₅₄ Diú₄ ne₄ quiáng'₂ 'ŋiag'₂ a₂tíng'₃ jmig₄ jaun₂ jë₁ma₂të₂ rë₁jme₃jniai₂₃ a₂'nei₂, jë₁qui₃dsi₂₃ 'éi'₃ co₂rë₂.

6 Ia₁ jma₃quén₅ qui₃ bá₄ Diú₄ 'lian'₅₄ le₂jan₂ le₂jan₂ 'a₂ lia'₂ con'₂ lë₅ a₂ma₂ca₂jmo₃.*

7 Juí₁lia'₂ dsa₂ i₂jmo₅ tió'₃ dsí₅ jmo₂₃ a₂dse₃, a₂qui₂'no'₂ a₂co₂tág₅ co₂'né'₅, ton'₂ 'no'₂ jui₅ 'a₂ lia'₂ jme₃gu'₅₄ Diú₄ quian'₅₄ caun₂ a₂dse₃, ton'₂ 'no'₂ jui₅ a₂tsá₃ dsiáin₃, 'éi'₂ bá₄ cuë'₃ Diú₄ a₂le₃chain₂ co₂tan₅₄.

8 La₁ quian'₅₄ a₂'nei₂ cuë'₃ uig₅ ca₂le₃jín₃ i₂dsia₅ m'₅₄, i₂tsá₃ 'nio₃ cán₂ caun₂ jui₅ a₂nag₃ gau₂ jág₁ tí₅, i₂jmá'₃ jui₅ 'lig'₅₄ bá₄ 'nio₃ cán₂.

9 Le₃cha₂ uig₅ o₂i₁ dsí₅ quió'₅ ca₂le₃jín₃ i₂jmo₅ a₂'lig'₅₄, jë₁le₂'uig₅₄ të₂le₃ quió'₅ dsa₂ judíos, ján₃ guë'₂ le₂jaun₂ le₃ja₁con₂ dsi₂nau₂.

10 La₁ ja₁con₂ le₂jan₂ le₂jan₂ i₂jmo₅ a₂dse₃, cuë₃ Diú₄ a₂co₂tág₅ co₂'né'₅, ton'₂ cuë₃ caun₂ a₂dse₃, jmo₃ 'ei₅ tei₄, jë₁le₂'uig₅₄ quió'₅ dsa₂ judíos, ján₃ guë'₂ le₂jaun₂ le₃ja₁con₂ dsi₂nau₂.

11 Ia₁ tsá₃ jma₃quén₅ jín₂ Diú₄ dsa₂ lia'₂ ca₂ton₂ ca₂ton₂;

12 ia₁ ca₂le₃jín₃ i₂'no₅ dso₄ i₂tsá₃ ca₂tín₂ 'Éi'₃ quió'₅ Moisés, dsiáin₃ të₃ tsá₃ 'Éi'₃ jaun₂ ca₂tín₂; la₁ ján₃ guë'₂ le₂jaun₂ dsa₂ i₂'no₅ dso₄ ně₁jua'₂ ron₅ bá₄ 'Éi'₃

* 2:6 'Nio'₂ ja₁ton₅ Salmo 62:12; Proverbios 24:12.

quió'₅ Moisés ně₃, tē₃ dsi₅₄ bá₄ 'éi'₃ quió'₅, jíóg'₂ 'í lia'₂
con'₂ lě₅ 'Éi'₃ jaun₂.

13 Ia₁ on₃jua'₅₄ dsa₂ i₂nag₅ 'Éi'₃ i₂jín₂ Diú₄ a₂lín₅
dsa₂ i₂jme₂ti₃; dsa₂ i₂jmo₅ lia'₂ con'₂ lě₅ 'Éi'₃ bá₄, i₂'éi₂
bá₄ i₂jín₂ Diú₄ a₂lín₅ dsa₂ i₂jme₂ti₃.

14 Ia₁ jui₁lia'₂ dsi₂nau₂ ně₃, i₂tsá₃ 'Éi'₃ cha₂ja₁coin₂,
la₁ ně₁jua'₂ chain₂ jui₅ a₂jme₂ti₃ con'₂ jaun₂ ma₂tín₂
dsí₅, guion₅₄ bá₄ dsa₂ 'éi₂ ŋi₅ tē₂dsí₅ 'a₂ lia'₂ lě₅ 'Éi'₃
quió'₅ Diú₄, o₁ŋia'₅₄ tsá₃ a₂jaun₂ ron₅ quió'₅.

15 Ia₁ cuē₂₃ léi₄ 'a₂ lia'₂ lě₅ chain₂, a₂rē₂ton₅ tē₂dsí₅
ta₁ a₂quí'₅ 'Éi'₃. Jaun₂ tē₂dsí₅ guioin₅₄ bá₄ jáng'₅ jág₁
dsau₅ o₄quió'₄, jaun₂ tsá₃ quin₅ 'a₂ lia'₂ dsi₂jiog₅ dsí₅
guioin₅₄; a₂lín₅₄ jáng'₂, a₂lín₅₄ guē'₂ tē₂le₃ lió₂.

16 Le₂ně₅ bá₄ lé₂ jē₁ma₂tē₂jmig₄ jaun₂ a₂con₂ Diú₄
'í ca₂le₃jě₃ a₂'ma₄ jlě₅ quió'₅ ca₂le₃jín₃ dsa₂, tē₂le₃
quian'₅₄ Jesucristo, lia'₂ con'₂ lě₅ jág₁ dse₃ a₂qui₂'ě₅
jniá₂.

Dsa₂judíos, quian'₅₄ 'Éi'₃ quió'₅ Moisés

17 La₁ chi₂jua'₂ lín'₅ 'ne₂ dsa₂ judío jaun₂ dsia'₂
a₂chéng'₅ tiá₂ quian'₅₄ 'Éi'₃ quió'₅ Moisés, jaun₂jmo'₂
táng'₅ ia₁ a₂cuíng'₂ Diú₄;

18 chi₂jua'₂ ma₂ca₂jme₃tín₅ dsa₂ 'ne₂ 'a₂ lia'₂ lě₅
'Éi'₃, jaun₂ ŋi'₅₄ 'a₂ lia'₂ 'nio₃ Diú₄, ton'₂ tǐng'₂ caun'₅₄
'í 'a₂ lia'₂ lě₅ a₂dse₃;

19 jaun₂ chi₂jua'₂ tē₃dsón'₂ líng'₂ a₂tǐng'₂ jang'₅₄
dsa₂ ten₄, chi₂jua'₂ ŋi'₅₄ 'a₂ lia'₂ téi'₄ si₂ja₁con₂ dsa₂
i₂i₂nio₄ jě₄ qui₁né'₃,

20 chi₂jua'₂ ŋi'₅₄ 'a₂ lia'₂ jme₁rē'₂ jui₅ a₂quian₅ dsa₂
co₄, chi₂jua'₂ ŋi'₅₄ 'a₂ lia'₂ cuē'₅₄ jág₁ i₂'nió'₄ i₂lín₅ chi'₂,

ia₁ a₂ron₅ 'Éi'₃ ja₁cong'₂, a₂tén₅ ne₄ 'Éi'₃ 'a₂ lia'₂ 'nió'₅
le₃ŋi₅ dsa₂, 'a₂ lia'₂ lě₅ jág₁ dsau₅;

21 'ne₂ guè'₂ i₂jme₂tíng'₂ i₂sián'₂, ¿e₂ guè'₂ 'uig'₅₄
tsá₃ jme₂tíng'₁ guè'₂ 'ŋiag'₂? Chi₂jua'₂ 'ne₂ guè'₂ 'é'₅
jág₁ a₂tsá₃ ca₂tín₂ dsa₂ 'ang'₃, ¿tsa₁ 'ang'₂ 'ŋiag'₂?

22 Chi₂jua'₂ 'ne₂ juá'₂ tsá₃ ca₂tín₂ dsa₂ nió'₃ jág₁
quiain'₅₄ i₂tsá₃ lě₅ dsi₂i₂gu₂, ¿tsa₁ nióg'₅ guè'₂ 'ne₂ jág₁
jaun₂ 'ŋiag'₂? Chi₂jua'₂ 'ne₂ 'ŋio₅ lín₃ 'ŋiag'₅₄ diú₄ lag₄,
¿tsa₁ 'ang'₂ 'ne₂ a₂quen₅ a₂te₁ 'i₁ dsi₂néi₂ 'né₅ quió'₅?

23 'Ne₂ guè'₂ i₂jmo₂ 'táng'₅ ja₁con₂ 'Éi'₃, ¿tsa₁ 'lig'₅₄
tsíng'₂ Diú₄ ia₁ tsá₃ jme₂tí'₁ 'Éi'₃ jaun₂?

24 Ia₁ ju₁lia'₂ juá'₂ ne₄ Si₂:
'Ag₅ dsi₂nau₂ 'iin₂₃ 'lig'₅₄ Diú₄
'uig'₅₄ quián'₂ 'nia'₂.†

25 Dsón'₂ bá₄ dsau₅ quen₅ a₂ti₃ dsa₂ lo₅₄ nē₁jua'₂
jme₂ti₃ 'Éi'₃ quió'₅ Moisés, la₁ nē₁jua'₂ tsá₃ jme₂ti₃
dsa₂ ně₃, tsá₃ 'e₂ ta₁ jmo₃, nē₂jag₄ bá₄ a₂tsá₃ 'e₂
rē₂u_{ing}₄ bá₄ quió'₅.

26 Ju₁lia'₂ dsa₂ i₂tsá₃ 'e₂ ma₂rē₂u_{ing}₄ quió'₅, la₁
nē₁jua'₂ jme₂ti₃ 'e₂ ta₁ qui'₅ 'Éi'₃, co₂jaun₂ bá₄
jín₂ Diú₄ dsa₂ 'éi₂ nē₂jag₄ bá₄ i₂ma₂rē₂u_{ing}₄ quió'₅
o₁ŋia'₅₄ tsá₃ ma₂rē₂u_{ing}₄.

27 Dsa₂ i₂tsá₃ 'e₂ rē₂u_{ing}₄ lo₄, la₁ nē₁jua'₂ jme₂ti₃ 'a₂
lia'₂ juá'₂ 'Éi'₃, i₂'éi₂ bá₄ chen'₅ Diú₄ ne₄ ju₁'a₂con₂ 'í₁
ja₁con'₂ 'ne₂, ia₁ tsá₃ jme₂tí'₁, ju₁'e₂ gué₃ ron₅ Si₂ tio'₅₄
'Éi'₃ quiáng'₂, ju₁'e₂ gué₃ rē₂u_{ing}₄ quiáng'₂ ně₃.

28 Ia₁ ju₁lia'₂ jan₂ dsa₂ i₂lín₅ judío dsón'₂, on₃jua'₅₄
rē₂ 'ŋia'₅₄ lín₅ dsa₂ léi₄ jmá'₃ le₃co'₅₄, on₃ guè'₂
le₂jaun₂ ju₁lia'₂ ta₁ dsón'₂ a₂quí'₅ a₂quí₂rē₂u_{ing}₄ lo₄

† 2:24 Isaías 52:5; Ezequiel 36:22.

dsa₂, on₃jua'₅₄ jnia'₅₄ rē₂uĩng₄ lĩn₅ léi₄ jmá'₃ le₃co'₅₄ ni₁ñí₅.

29 Tē₂le₃ a₂ca₂tĩn₂ bá₄ dsa₂ jmo₃, a₂lĩn₅ tē₃dsón'₂ dsa₂ judío, a₂lĩn₅ ca₂tē₂ dsí₅; ján₃ guē'₂ le₂jaun₂ ju₁lia'₂ a₂lĩn₅ dsa₂ léi₄ a₂rē₂uĩng₄ quió'₅, a₂lē₅ ca₂tē₂ dsí₅ bá₄ dsa₂; ton'₂ a₂gu₂dsí₂ bá₄ a₂jaun₂, on₃jua'₅₄ jmá'₃ lia'₂ con'₂ le₁ton₅ ne₄ Si₂ 'Éi'₃. Dsa₂ i₂lĩn₅ le₂nē₅ chéin'₅ rē₂ quian'₅₄ Diú₄, on₃jua'₅₄ rē'₂ quian'₅₄ dsa₂ mi₂güig₃.

3

1 Jaun₂ ně₃, ħ'e₂ ta₁ jmo₅ a₂quen₅ guē₄ a₂lĩn₅ dsa₂ dsa₂ judío? ħO₃ 'e₂ ta₁ jmo₅ a₂lĩn₅ dsa₂ léi₄ a₂rē₂uĩng₄ ni₁lo₁₂?

2 'Lióng₂ bá₄ 'uig₅₄ cha₂. Jē₁le₂'uig₅₄, ca₂dsia₃ Diú₄ jág₁ dse₃ quió'₅ o₄gú₃ dsa₂ judíos.

3 ħLa₁ 'e₂ bá₄ lé₂ ně₃ ně₁jua'₂ chan₂ i₂lĩn₅₄ i₂tsá₃ ca₂rē₃tí'₅₄?* ħO₃ bá₄ lĩn'₂ 'nia'₂ ján₃ a₂tsá₃ le₃tí'₅₄ Diú₄ jág₁ quió'₅ ia₁ a₂tsá₃ ca₂rē₃tí'₅₄ dsa₂ 'éi₂?

4 ¡Dsón'₂ bá₄ tsá₃ le₂jaun₂! Ju₁le₂lei₅₄ bá₄ jniog₄, Diú₄ ně₃ jmo₃ bá₄ ca₂le₃jě₃ lia'₂ con'₂ lē₅ jág₁ tí₅ quió'₅, ju₁'e₂ guē₃ ca₂le₃jín₃ dsa₂ tsá₃ tí₅ jág₁ quió'₅; ia₁ ne₄ Si₂ juá'₂:

ia₁jaun₂ le₃lí'₄ dsa₂ a₂lĩng'₅ i₂dsen₃

ju₁lia'₂ jē₁dsia'₂ jág₁,

ia₁jaun₂ bá₄ léng'₂

jē₁ma₂tē₂ rē₂con₂ dsa₂ 'í₁ ja₁cong'₂.†

5 La₁ ně₁jua'₂ tí₅ ta₁ dsá_{u1} jniog₄ a₂rē₂jniá₂ Diú₄ a₂lĩn₅ i₂dsen₃, ħ'e₂ le₃jua'₅₄ jniog₄ ně₃? ħ'An₁ tsá₃ rē₂

* 3:3 o₃, “i₂tsá₃ ca₂rē₃'én₂.” † 3:4 Salmo 51:4.

qui₃dsi₅ Diú₄ 'éi'₃ ně₁jua'₂ ca₂rě₃'néi₃ 'ě₂ uig₅ ja₁con₂
jniog₄? (A₂lě₁juá'₅ jniá'₂ lia'₂ jě₁juá'₂ dsa₂ mi₂güí₃
bá₄.)

⁶ ĩDsón'₂ bá₄ on₃jua'₅₄ le₂ně₅! Ia₁ jua'₅₄ mei'₂ guě₃
tsá₃ rě₂ qui₂dsi₅ Diú₄ 'éi'₃, ĩ'a₂ bá₄ lia'₂ le₃con₂ 'í
ja₁con₂ dsa₂ mi₂güí₃?

⁷ La₁ ně₁jua'₂ jág₁ tě₂jág₁ quió₃ tí₅ ta₁ ia₁jaun₂ lě₅
a₂rě₂jniá' guě₄ jág₁ dsau₅ quió'₅ Diú₄ ia₁jaun₂ tě₂le₃
dse₃ guě₄ chéin'₅, ĩ'e₂ lě₃ qui₂dsi₅ Diú₄ 'éi'₃ a₂rĭn₂ jniá'₂
dso₄?

⁸ ĩJa₁lin₃ guě₄ dse₃ jua'₅₄ caun₂ a₂jmo₅₄ a₂'lig'₅₄,
ia₁jaun₂ jiá₃ a₂dse₃? A₂le₂ně₅ bá₄ chi₂'ag₅ i₂lin₅₄ 'ag₂₃
jnia'₅₄ a₂jme₂tĭn₂ jnia'₅₄ dsa₂. La₁ gue₃ bá₄ uig₅ dsa₂
i₂dsi₂jio₅ dsí₅ le₂ně₅ 'a₂ con'₂ ca₂tĭn₂.

Ca₂le₃jág₃ bá₄ jniog₄ rě₂cáu'₄ dso₄

⁹ ĩ'E₂ jaun₂ ně₃? ĩA₂dse₃ guě₄ tíong₂ jnia'₅₄ dsa₂
judíos? ĩDsau₅ bá₄ on₃jua'₅₄ le₂jaun₂! Ia₁ ma₂tě₂tsi'₅₄
jág₁, co₂jaun₂ bá₄ dsa₂ judíos con'₂ dsi₂nau₂, caun₂
bá₄ jui₅ tioin'₅₄ 'uig₅₄ dsáu₁.

¹⁰ Lě₅ jui₁lia'₂ juá'₂ ne₄ Si₂:
Ca₂lia'₂ 'i₁jan₂ dsa₂ tsá₃ chan₂

i₂jme₂tĭ₃ 'Éi'₃ quió'₅ Diú₄,
ca₂lia'₂ 'i₁jan₂ tsá₃ chan₂;

¹¹ tsá₃ i₂chan₂ jua'₅₄ i₂ñí'₂ dsí₅,

'i₁jan₂ tsá₃ chan₂ jua'₅₄ i₂'nio₃ 'na'₂ Diú₄.

¹² Ca₂le₃jĭn₃ bá₄ ma₂i₂nio₄ cau₅ jui₅ ma₂i₂cóin'₅,
co₂dsia₅ bá₄ ma₂i₃lėin₂ jui₅ ja₁tsá₃ ta₁ tí₄.

Tsá₃ 'ein₂ chan₂ ca₂lia'₂ 'i₁jan₂
jua'₅₄ i₂qui₂jmo₅ a₂dse₃,
ca₂lia'₂ 'i₁jan₂ tsá₃ chan₂.‡

‡ 3:12 Salmo 14:1-3; 53:1-3; Eclesiastés 7:20.

- 13 'Ué'⁵ jág₁ 'lig'⁵⁴ le₂'o⁵⁴
 ju₁liá'₂ ja₂ dsí'₂ 'lig'⁵⁴ a₂'ué'⁵ tau₂ 'ñio₅ a₂rë₂na_;
 quian'⁵⁴ le₁tsí'₂ jmo₂₃ a₂ju₁gain₂.§
 Në₂jag₄ bá₄ náu₁ dsi₂mi'₂ 'a₄ mi₂'o⁵⁴;*
 14 Jmá'₃ caun₂ a₂jaun₂ bá₄ juá'₂ dsa₂,
 a₂uig₅ dsí'₅, a₂jme₃dsi'₃ ja₁con₂ riin'⁵⁴;†
 15 Ma₂në₃ bá₄ i₂ñi₂₃ cán₂ tag₅₄
 a₂dsi₃jme₁dsiain₂₃ riin'⁵⁴.
 16 Léi₄ jë₁ca₂ñi₅ ca₂quiog₂ caun₂ ju₅ a₂o₂i₁ dsi₅,
 ja₁i₃'én₂ 'a₂ lia'₂ chan₂ dsa₂;
 17 ia₁ tsá₃ cuí'₅ dsa₂ 'éi₂ ju₅ 'ei₅ tei₄;‡
 18 Tsá₃ a₂jaun₂ dsi₂jio₅ dsí'₅
 jua'⁵⁴ a₂gain₃ Diú₄.§
 19 A₂ne₄ bá₄ jniog₄, ca₂le₃jě₃ jág₁ a₂tio'⁵⁴ ne₄ Si₂ 'Éi'₃
 quió'₅ Diú₄, a₂juá'₂ tsí'₅ ca₂le₃jín₃ i₂ca₂tín₂ 'Éi'₃ jaun₂,
 ia₁jaun₂ jmo₃ tei₄ mi₂'o₄ ca₂le₃jín₃, ia₁jaun₂ ca₂le₃jín₃
 dsa₂ mi₂güig₃ tē₃tsin'⁵⁴ rē₂cáin'₄ ne₄ Diú₄.
 20 Ia₁ ca₂lia'₂ 'i₁jan₂ tsá₃ 'ein₂ jín₂ Diú₄ a₂tsá₃ dso₄
 rē₂cáin'₄ jua'⁵⁴ a₂jme₃ti₃ a₂juá'₂ 'Éi'₃, ia₁ 'ñiog₅ bá₄ 'Éi'₃
 qui'₅ ta₁ a₂le₃ne₄ jniog₄ a₂lág₅ dsa₂ cha₂ dsáu₁.
A₂lión₂ dsa₂ tē₂le₃ a₂jñia'⁵⁴ quian'⁵⁴ a₂'éin₂ bá₄
 21 La₁ në₃ në₃, ma₂ca₂jme₃jnia₅ bá₄ Diú₄ ju₅ a₂tsá₃
 ma₃dso₄ rē₂cáu'₄ jniog₄, on₃jua'⁵⁴ tē₂le₃ quian'⁵⁴ Si₂
 'Éi'₃, ju₁'e₂ guě₃ jáng'⁵ jág₁ dsau₅ ju₅ jaun₂ a₂juá'₂ ne₄
 Si₂ tio'⁵⁴ 'Éi'₃, quian'⁵⁴ Si₂ a₂qui₂ca₂jmo₃ dsa₂ i₂jme₁'ě₂
 jág₁ quián₅ Diú₄ në₃.
 22 Jáng'⁵ jág₁ dsau₅ ju₅ dse₃ quió'₅ Diú₄ a₂tsá₃
 dso₄ rē₂cán'₄ dsa₂, jñia'⁵⁴ lia'₂ tē₂le₃ quian'⁵⁴ a₂'éin₂

§ 3:13 Salmo 5:9. * 3:13 Salmo 140:3. † 3:14 Salmo 10:7.

‡ 3:17 Isaías 59:7-8. § 3:18 Salmo 36:1.

të₂le₃ quió'₅ Jesucristo; tsá₃ jma₃quén₅ jmo₂₃ ja₁con₂ jui₁'ein₂ gué₃;

²³ ia₁ ca₂le₃jín₃ bá₄ ma₂qui₂ma₂'ná_{u2} dso₄, jaun₂ uíng₂ lin₃ bá₄ tióin₂ ja₁qui₂tág₅ co₂'né'₅ quió'₅ Diú₄.

²⁴ La₁ Diú₄ ně₃, ia₁ a₂'ua₁ dsí₅ bá₄ 'ě₂ jág₁ a₂tsá₃ dso₄ rē₂cáin'₄, on₃jua'₅₄ a₂'nió'₅ quí₃ 'lia'₅₄. A₂lě₁lió₂ bá₄ tē₂le₃ quian'₅₄ Cristo Jesús i₂ca₂quí₃ o₄quió'₄ dsá_{u1} dsa₂.

²⁵ Ca₂chen'₃ Diú₄ ja₁ŋi'₅₄ ia₁jaun₂ dsian₅ dsá_{u1} dsa₂ mi₂güí₃ quian'₅₄ jmí₂ 'ain₅₄ a₂ca₂tein₃. A₂lě₁gue₅ bá₄ dsa₂ a₂jaun₂ jmá'₃ tē₂le₃ quian'₅₄ a₂'éin₂. Le₂ně₅ ca₂rě₃jniá₂ Diú₄ i₂lín₅ i₂qui₃dsi₅ 'éi'₃ rē₂, ia₁ a₂ma₂ca₂jme₃juin'₂ dsí₅ a₂ma₂ca₂ŋág₃ bá₄ dsá_{u1} dsa₂ a₂jme₁'no₂₃ ma₂líg'₂.

²⁶ Le₂ně₅ ca₂jmo₃ Diú₄ a₂ca₂jme₃jniai₂₃ a₂rē₂ qui₃dsi₂₃ 'éi'₃, a₂ca₂jme₃jniai₂₃ a₂jín₂ dsa₂ i₂'én₂ tē₂le₃ quió'₅ Jesús ně₂jag₄ bá₄ a₂ca₂jme₃ti₃.

²⁷ ¿'E₂ bá₄ ca₂lě₃ jaun₂ ně₃ quian'₅₄ a₂jmo₅ dsa₂ táin'₅? Co₂dsia₅ tē₂tsi'₅₄ cau₅ bá₄ a₂jaun₂. ¿'E₂ 'uig₅₄? ¿'An₁ 'uig₅₄ a₂jme₃ti₃ dsa₂ 'Éi'₃? Jan₂'ón₄. 'Uig₅₄ ia₁ a₂'én₂ bá₄ dsa₂.

²⁸ Ma₂ně₂quiong₅₄ bá₄ jniog₄ 'í₁ jaun₂ ně₃, a₂jín₂ Diú₄ dsa₂ ně₂jag₄ bá₄ a₂ca₂jme₃ti₃, 'uig₅₄ ia₁ a₂'éin₂, jaun₂ tsá₃ 'e₂ 'í₁ con₂ gué₄ jua'₅₄ a₂ca₂jme₃ti₃ o₃ tsá₃ ca₂jme₃ti₃ 'e₂, con'₂ lě₅ 'Éi'₃.

²⁹ ¿O₃ bá₄ lín₅ Diú₄ ca₂ne₅₄ jmá'₃ i₂quián₅ dsa₂ judíos? ¿On₁jua'₅₄ i₂quián₅ dsí₂nau₂ ján₃? Ján₅. I₂quián₅ 'éi₂ bá₄ ján₃,

³⁰ ia₁ jan₂ tan₅₄ bá₄ Diú₄ chan₂; jaun₂ 'éi₂ bá₄ jág₃ jín₂ dsa₂ i₂rě₂uing₄ ni₁lo₁ ně₂jag₄ bá₄ a₂ca₂jme₂ti₃, 'uig₅₄ ia₁ a₂'éin₂; ján₃ bá₄ le₂jaun₂ jág₃ jín₂ dsa₂ i₂tsá₃

rë₂uing₄ ni₁lo₁ në₂jag₄ bá₄ a₂ca₂jme₃ti₃, o₄quió'₄
a₂'éin₂.

³¹ ¿'E₂ jua'₂ jniog₄ jaun₂ në₃? ¿A₂tsá₃ ta₁ tí₄ 'Éi'₃ ia₁
a₂'éin₂ jniog₄? ¡Dsón'₂ tsá₃ le₂jau₂! 'Nió'₄ të₂le₃ cuë₂
bá₄ jniog₄ bí₂ a₂quen₅ 'Éi'₃.

4

'A₂ lia'₂ të₂tsin'₅₄ Abraham ne₄ Diú₄

¹ ¿'E₂ le₂ le₃jua'₅₄ jniog₄ jaun₂ në₃? ¿'E₂ ca₂dsó'₂
Abraham dsa₂ juin'₂ quián₂ jnia'₅₄ ma₂líg'₂, lia'₂
jme₁lín₄ dsa₂ mi₂güí₃?

² Jua'₅₄ mei'₂ gué₃ Diú₄ ca₂chi'₃ jág₁ jua'₅₄ a₂dsen₃
'éi₂ të₂le₃ quian'₅₄ 'e₂ a₂ca₂jmo₃, jua'₅₄ a₂ca₂jme₃ti₃
'Éi'₃, jaun₂ jme₁cha₂ juí₅ a₂jme₁jmo₃ róin₂. La₁
on₃jua'₅₄ ne₄ Diú₄.

³ Jaun₂, ¿'e₂ juá'₂ ne₄ Si₂? “Ca₂rë₃'én₂ bá₄ Abraham
jág₁ ca₂cuë₃ Diú₄; jaun₂ 'uig'₅₄ ia₁ a₂ca₂rë₃'éin₂ jaun₂
në₃, ca₂guéi'₂ Diú₄ në₂jag₄ bá₄ a₂ca₂jme₃ti₃.”*

⁴ Jaun₂ në₃, juí₁lia'₂ jan₂ dsa₂ i₂jme₂ti₃ ta₁ quió'₅
jan₂ juig'₅₄, cu₄ a₂lí'₂ jaun₂ quió'₅, on₃jua'₅₄ a₂lë₁cuë₃
juig'₅₄, ia₁ a₂ma₂rín₂₃ quió'₅ 'éi₂ 'lia'₅₄ ta₁ quió'₅.

⁵ La₁ në₁jua'₂ 'ein₂ të₃tsá₃ 'e₂ jmo₂₃, 'éin₂ a₂guén'₅
Diú₄ dsa₂ i₂cha₂ dsáu₁, Diú₄ guéi'₂ quió'₅ në₂jag₄ bá₄
dsa₂ dsen₃, o₄quió'₄ a₂'éin₂.

⁶ 'Njog₅ bá₄ David juá'₂ a₂dsen₃ juí₁lia'₂ dsa₂
i₂guéi'₂ Diú₄ në₂jag₄ bá₄ a₂tsá₃ ma₂'e₂ dsáu₁ cha₂, tsá₃
'e₂ 'í₁ con₂ Diú₄ 'a₂ lia'₂ ca₂jme₃ti₃.

⁷ Ca₂juá'₂ David:

'E₂ gué₄ dsen₃ juí₁lia'₂ dsa₂ i₂ca₂'én₂ Diú₄ dsáu₁,
i₂ca₂jlë₂ Diú₄ dso₄ a₂ca₂'náu₂.

* **4:3** Génesis 15:6. Ján₃ bá₄ le₂në₅

8 'E₂ gué₄ dsen₃ dsa₂ i₂ca₂jmo₃ Te₁gui'₅₄ dsí'₅
a₂tsá₃ dso₄ riin₂.†

9 A₂dse₃ nē₅ nē₃, ¿a₁dse₃ jmá'₃ lia'₂ ca₂ne₅₄ quió'₅
dsa₂ i₂rē₂uīng₄ ni₁lo₁, o₃ bá₄ le₂jio₅ a₂dse₃ quió'₅
i₂tsá₃ 'e₂ rē₂uīng₄ quió'₅ bá₄ ján₃? Ma₂nē₂jua'₅₄ jnia'₅₄
a₂ca₂guén'₂ Diú₄ Abraham nē₂jag₄ bá₄ a₂ca₂jme₃ti₃
'éi'₃, 'uīg₅₄ ia₁ a₂'éin₂.

10 ¿'A₂ lia'₂ jme₁lín₄ Abraham lia'₂ con'₂ ca₂guéi'₂
jaun₂? ¿Ca₂guéi'₂ cang₂ lia'₂ con'₂ jme₁ma₂ti₃ Abra-
ham quió'₅, o₃ le₂jñiá₅ 'e₂? Le₂jñiá₅ bá₄, on₃jua'₅₄
cang₂.

11 Cang₂ jaun₂ bá₄ ca₂gue₃ Abraham 'éi'₃ jaun₂
a₂ti₃ ni₁lo₁₂, a₂lín₅ léi₄ co₂'nió'₄ caun₂ sello quió'₅
Diú₄ a₂ma₂guéi'₂, nē₂jag₄ bá₄ dsa₂ i₂ca₂jme₃ti₃, 'uīg₅₄
ia₁ a₂'éin₂. Le₂nē₅ bá₄ ca₂dsióg₃ Abraham a₂ca₂lín₃
cho'₅₄ ca₂le₃jín₃ i₂'én₂ ján₃, o₁jñia'₅₄ tsá₃ ma₂gue₃
'éi'₃ jaun₂ a₂uíng₃ quió'₅. Jaun₂ le₂nē₅ bá₄ guén'₂
Diú₄ ján₃ dsa₂ tsi₁jon₂ 'éi₂ nē₂jag₄ bá₄ a₂lín₅ dsa₂
i₂ca₂jme₃ti₃.

12 Dsau₅ bá₄ a₂lín₅ Abraham cho'₅₄ ca₂le₃jín₃
i₂ma₂gue₃ 'éi'₃ jaun₂ a₂uíng₃ quió'₅, la₁ on₃jua'₅₄
jmá'₃ 'uīg₅₄ ia₁ a₂rē₂uīng₄ quió'₅; ján₃ bá₄ 'uīg₅₄ ia₁
a₂quian₅ jui₅ a₂'éin₂ jaun₂, jui₁lia'₂ ca₂can₃ Abraham
jmei₂ jnia'₅₄ lia'₂ con'₂ tsá₃ ma₂uīng₂ quió'₅.

*Tē₂le₃ quian'₅₄ a₂'én₂ bá₄ dsa₂jme₃ti₃ Diú₄ jág₁ quió'₅
a₂ma₃cuē₃*

13 Jaun₂ ca₂cuē₃ Diú₄ jág₁ quió'₅ ca₂cuē'₃ Abra-
ham quian'₅₄ chi'₂-guein₂ quiáin₅, a₂gue₃ gua'₅₄ 'uē₃
a₂cuē₃ Diú₄; la₁ on₃jua'₅₄ ia₁ a₂ca₂jme₃ti₃ Abraham

† 4:8 Salmo 32:1-2.

'Éi'₃, tē₂le₃ ia₁ a₂caun₂ 'éin₂ jág₁ a₂cuē₅ Diú₄, ton'₂ ca₂guéi'₂ Diú₄ nē₂jag₄ bá₄ a₂ca₂jme₃ti₃ 'Éi'₃.

14 Jua'₅₄ mei'₂ guē₃ jmá'₃ i₂jme₂ti₃ 'Éi'₃ bá₄ gue₅ a₂dse₃ a₂cuē₅ Diú₄ cué'₅ chi'₂-guein₂ quiáin₅, jaun₂ tsá₃ ma₃'e₂ ta₁ tí₄ a₂'é₂n₂ dsa₂, ton'₂ ján₃ guē'₂ le₂jaun₂ jág₁ a₂cuē₄ quió'₅ Diú₄ tsá₃ ma₃quen₅.

15 Ia₁ jui₅ a₂'ne₂ Diú₄ bá₄ jiog₅ 'Éi'₃, la₁ ja₁tsá₃ 'Éi'₃ ca₂tín₂, tsá₃ 'ein₂ dsi₂juin₅₄ ja₁jaun₂.

16 'Uig₅₄ jaun₂, o₄quió'₄ a₂'é₂n₂ dsa₂ cuē₅ Diú₄ a₂dse₃ cué'₅ chi'₂-guein₂ quiáin₅, ia₁jaun₂ chi'₃ tiá₂ jág₁ a₂cuē₄ ne₄ a₂'ua₁ dsí₅, ia₁jaun₂ dsón'₂ jaun₂ bá₄ jág₁ a₂gue₃ ca₂le₃jín₃ tsi₁jon₂ Abraham, on₃jua'₅₄ jmá'₃ quió'₅ dsa₂ i₂qui₂rē₂ti'₅₄ 'Éi'₃; quió'₅ ca₂le₃jín₃ i₂'é₂n₂ bá₄ ján₃ jui₁lia'₂ jme₁'é₂n₂ Abraham. Jaun₂ 'éi₂ bá₄ já₅ co₂'nió'₄ lín₅ jmei₂ jniog₄ ca₂le₃jág₃.

17 Jui₁lia'₂ juá'₂ ne₄ Si₂: “Ne₂ ma₂tsín'₂ jniá₂ a₂lín'₅ cho'₅₄ dsa₂ chan₂ 'lióng₂ juig₂ nación.”‡ Jaun₂ 'éi₂ bá₄ i₂lín₅ jmei₂ jniog₄ ne₄ Diú₄, ton'₂ ca₂'éin₃ jág₁ quió'₅ Diú₄ 'éi₂ i₂ton'₂ jme₂dsí₂ dsa₂ i₂ma₂dsan₃, ján₃ guē'₂ tē'₂ a₂tsá₃ ma₂cha₂ nē₂jag₄ bá₄ a₂ma₂cha₂.

18 Jui₁'e₂ guē₃ tsá₃ ma₃'e₂ jmig₄ jme₁ma₃cha₂ ja₁con₂ Abraham lia'₂ con'₂ lē₅ lín₂ dsa₂ mi₂güig₃, tē₂le₃ ia₁ a₂ca₂rē₃'éin₂ jág₁ quió'₅ Diú₄, ca₂dsióg₃ “a₂lín₅ jmei₂ dsa₂ chan₂ 'lióng₂ juig₂”, lia'₂ con'₂ lē₅ ca₂juá'₂ Diú₄: “co₂nē₅ tén₅ chi'₂-guein₂ dsió'₂ lé₂.”§

19 Jui₁'e₂ guē₃ jme₁ma₂'en₅₄ Abraham con'₂ 'ñiá₂-láu₂ ñi₂, lí'₄ bá₄ 'ñiog₅ a₂ma₂guen'₂ ni₁ñi₁₂, ján₃ guē'₂ le₂jaun₂ Sara quiáin₅ nē₃ co₂nē₅ a₂ma₂chain₂ dsiáin₃

‡ 4:17 Génesis 17:5. § 4:18 Génesis 15:5.

bá₄, tsá₃ ma₃'ein₂ guein₂ lé₂ le₃ cáin₂, la₁ tsá₃ ca₂'uáin₂
quian'₅₄ jág₁ a₂ma₂chan'₂.

²⁰ Tsá₃ ca₂'ág₂ caun₂-tin₃ dsí₅ jua'₅₄ a₂tsá₃ 'éin₂ jág₁
a₂ca₂cuë₃ Diú₄, tē₂le₃ ca₂i₃tsón₂ bá₄ bí₂ a₂'éin₂, ton'₂
ca₂jme₃juin'₂ Diú₄,

²¹ caun₂ bá₄ 'ei₅ dsí₅ a₂'io₅ Diú₄ jui₅bí₂ a₂jme₃ti₃ jág₁
quió'₅ a₂ca₂cuë₃.

²² 'Uig₅₄ jaun₂ ca₂guéi'₂ Diú₄ nē₂jag₄ dsa₂
i₂ca₂jme₃ti₃.

²³ Jág₁ nē₅, “a₂ca₂guéi'₂ Diú₄”, ca₂i₃to'₅₄ ne₄ si₂,
on₃jua'₅₄ a₂'in₂₃ jmá'₃ Abraham;

²⁴ a₂'ag₂₃ jniog₄ bá₄ ján₃. 'Uig₅₄ ia₁ a₂'éin₂
jniog₄, guéi'₂ Diú₄ a₂lág₅ jniog₄ nē₂jag₄ bá₄ dsa₂
dsen₃ i₂ca₂jme₃ti₃ con'₂ i₂'én₂ tē₂le₃ quió'₅ Diú₄
i₂ca₂jme₃jen'₅₄ Jesús jin₄ 'lag₄. Jesús bá₄ i₂lín₅
Te₁gui'₅₄ quián₂ jniog₄,

²⁵ i₂ca₂jín'₂ dsa₂ a₂jóin₂ ne₄ 'uig₅₄ dsá_{u1} jniog₄,
con'₂ siá'₂ ca₂jein'₅₄ táng₃ ia₁jaun₂ guéi'₂ Diú₄ jniog₄
nē₂jag₄ dsa₂ dsen₃ i₂ca₂jme₃ti₃.

5

Lé₂ le₃chong₂ jniog₄ 'ei₅ tei₄ quian'₅₄ Diú₄

¹ Le₂nē₅ jaun₂, ia₁ a₂ma₂'ě₂ Diú₄ jág₁ a₂tsá₃ 'e₂ dso₄
rē₂cáu'₄ jniog₄, 'uig₅₄ ia₁ a₂'éin₂, ma₂chong₂ jniog₄
'ei₅ tei₄ quian'₅₄, tē₂le₃ quian'₅₄ Te₁gui'₅₄ Jesucristo
quián₂.

² Ia₁ tē₂le₃ quian'₅₄ Cristo 'éi₂ bá₄ ma₂i₃to'₅₄ jniog₄
ja₁jme₂gu'₅₄ Diú₄ ia₁ a₂'ua₁ dsí₅, tē₂le₃ ia₁ a₂'éin₂.
Ja₁dse₃ nē₅ nē₃, tíong₂ jniog₄ tiá₂'io'₂ jein₂, ia₁ 'ín₂ dsi₅
jniog₄ a₂dsón'₂ jme₁quian'₅₄ Diú₄ jē₄ co₂tág₅ co₂'né'₅
quió'₅.

³ On₃ rē'₂ jua'₅₄ jmá'₃ a₂nē₅; jmo₂ jniog₄ 'io'₂ ne₄ o₂i₁ dsi₅ a₂qui₂ dsi₂ñág₂; ia₁ ne₄ jniog₄, quian'₅₄ o₂i₁ dsi₅ bá₄ qui₂rē₂juin'₂ dsi₅ jniog₄.

⁴ A₂juin'₂ dsi₅ jniog₄ jaun₂, jmo₅ a₂chei'₂ rē₂ jniog₄ 'a₂ lia'₂ lág₅; a₂tióng₂ jniog₄ rē₂ jaun₂ ně₃, jmo₅ a₂'ín₂ dsi₅ jniog₄ jmig₄ a₂le₃ti₃.

⁵ Jmíg₄ a₂'ín₂ dsi₅ jniog₄ jaun₂, tsá₃ lé₂ le₃jmo₃ jua'₅₄ jéin₂ jniog₄ o₂guí'₃, ia₁ 'ñiog₅ Diú₄ ma₂ca₂jme₃cain'₂ jme₂dsí₂ quián₂ jniog₄ ia₁ a₂ñí₄ lē₃ 'nio₃ jniog₄, tē₂le₃ quian'₅₄ Jme₂dsí₂ Jñi₅ i₂ma₂cuin₃.

⁶ Ia₁ lia'₂ con'₂ jme₁lág₄ jniog₄ dsa₂ mi₂güí₃ 'uan₅₄ i₂tsá₃ cha₂ jui₅ 'a₂ lia'₂ lion₄ guio₅₄, la₁ jme₁ca₂tē₂ jmíg₄ a₂ca₂tióng₃ Diú₄, jaun₂ ca₂jon₃ bá₄ I₂rē₂'ín₂ quián₅ o₄quió'₄ dsa₂ i₂tsá₃ Diú₄ cuin₅.

⁷ A₂quian₅ ta₁ lin₃ bá₄ jua'₅₄ mei'₂ guē₃ jan₂ dsa₂ lé₂ le₃guein₃ 'mú₃ o₄quió'₄ jan₂ dsa₂ mi₂güí₃ riin'₅₄, ca₂lia'₂ jñia'₅₄ o₄quió'₄ jan₂ dsa₂ i₂jmo₅ rē₂; 'an₁ mei'₂ tsá₃ chan₂ jan₂ i₂lé₂ le₃tiá₂ dsí₅ guen₃ 'mú₃ o₄quió'₄ jan₂ dsa₂ i₂dse₃ dsí₅ dsón'₂.

⁸ La₁ ma₂ca₂cuē₃ bá₄ Diú₄ léi₄ a₂dsón'₂ 'nio₃ jniog₄, ia₁ a₂ca₂jon₃ Cristo 'uig₅₄ quián₂, lia'₂ con'₂ jme₁lág₄ guē₄ dsa₂ cha₂ dsáu₁.

⁹ A₂jaun₂ ně₃, 'uig₅₄ ia₁ a₂ma₂'ē₂ Diú₄ jág₁ tē₂le₃ quian'₅₄ jmi₄ Cristo a₂ca₂tang₂, a₂tsá₃ ma₂dso₄ rag₂, jaun₂ tē₂le₃ i₂jui'₂ guē₄ lió₂ jniog₄ tē₂le₃ quian'₅₄ 'éi₂ a₂gau₂ a₂'ne₂ Diú₄ a₂jia₃ jē₁ca₂tó'₂.

¹⁰ Ia₁ chi₂jua'₂ ma₂ca₂'ág₂ Diú₄ caun₂ jág₁ quian'₅₄ jniog₄ tē₂le₃ quian'₅₄ 'mú₃ a₂ca₂i₃ñí₂ Ja₁ñi'₅₄ lia'₂ con'₂ jme₁lág₄ guē₄ jniog₄ dsa₂ i₂'ñia₅₄ 'éi₂, ján₃ bá₄ le₂jaun₂ tē₂le₃ i₂jui'₂ guē₄ lió₂ jniog₄ 'uig₅₄ ia₁ a₂chain₂, ně₃ lia'₂ ma₂'ei₅ caun₂ jág₁ quiaín'₅₄.

11 Ia₁ on₃ guë'₂ jua'₅₄ jmá'₃ a₂në₅, ia₁ chong₂ jniog₄ jme₁'ñi_ó₄ ds_i₅ ján₃ le₃qui_ó'₅ Diú₄ tē₂le₃ quian'₅₄ Te₁gui'₅₄ Jesucristo, ia₁ tē₂le₃ quian'₅₄ Cristo bá₄ ca₂dsi₃ná_u₅ jniog₄ 'ei₅ caun₂ jág₁ quian'₅₄ Diú₄.

Adán quian'₅₄ Cristo

12 Le₂në₅ jaun₂, ju_ilia'₂ tē₂le₃ quian'₅₄ jan₂ dsa₂ ca₂rë₃chá₃ dsá_u₁ dsa₂ mi₂gü_ig₃, 'uig₅₄ në₅ bá₄ ca₂já₃ 'mú₃, le₂në₅ bá₄ ján₃ ca₂ñag₅ 'mú₃ ja₁con₂ ca₂le₃jín₃ dsa₂ mi₂gü_ig₃, ia₁ ca₂le₃jín₃ bá₄ ca₂'ná_u₂ dso₄.

13 Le₂jñiá₅, lia'₂ con'₂ tsá₃ 'Éi'₃ jme₁ma₂ron₅, ma₂qui₂'no₅ bá₄ dsa₂ dso₄ mi₂gü_ig₃, la₁ tsá₃ lé₂ le₃jí_óg'₂ 'í₁ 'e₂ a₂rín₂ dsa₂ ja₁tsá₃ 'éi'₃ cha₂.

14 La₁ ca₂le₃ jme₁chan₂ Adán, ca₂lia'₂ ca₂tē₂ jmig₄ a₂jme₁chan₂ Moisés, ca₂'io₃ 'mú₃ ju_ibí₂ ne₄ qui_ó'₅ dsa₂ i₂qui₂ca₂'ná_u₂ dso₄, o₁jñia'₅₄ dsá_u₁ dsa₂ jaun₂ on₃jua'₅₄ a₂ca₂i₃ju_in₅₄ dsa₂ caun₂ 'éi'₃ ju_ilia'₂ ca₂jmo₃ Adán; jme₁lín₄ Adán co₂'ni_ó'₄ caun₂ ni_ó'₄ qui_ó'₅ i₂jiá₃ chi₁quín₃.

15 La₁ dsá_u₁ Adán në₃, tsá₃ lé₂ le₃quin₃ quian'₅₄ a₂lë₁cuë₅ Diú₄ jniog₄. Ia₁ ju_ilia'₂ o₄qui_ó'₄ dsá_u₁ jan₂ dsa₂, ju_in₅ i₂ca₂dsan₃, ján₃ bá₄ le₂jaun₂ tē₂le₃ lë₅ guë₄ a₂'ua₁ dsí₅ Diú₄ a₂li_ó₂ a₂lë₁ma₂cuë'₃ co₂ñí₂ dsa₂ ju_in₅ tē₂le₃ quian'₅₄ jan₂ tan₅₄ dsa₂ i₂'ua₁ dsí₅. Dsa₂ 'éi₂ lín₅ Jesucristo.

16 Dso₄ a₂ca₂'ná_u₂ jan₂ dsa₂ tsá₃ lé₂ le₃quin₃ quian'₅₄ a₂li_ó₂ Diú₄ a₂cuë₂₃ jniog₄; ia₁ jme₁ca₂cáun₂ Diú₄ 'í₁ dso₄ a₂ca₂rë₃cán'₂ jan₂ dsa₂, jaun₂ ca₂já₃ ju_i a₂ca₂qui₃dsi₅ Diú₄ 'éi'₃ ja₁con₂ dsa₂ mi₂gü_ig₃; la₁ ju_ilia'₂ a₂lión₂ dsa₂ në₃, a₂lë₁'ë₂ Diú₄ co₂ñí₂ bá₄ jág₁

a₂tsá₃ 'e₂ dso₄ rīn₂ dsa₂, jui₁'a₂ guě₃ la₂ qui₂ma₂ 'náu₂
'lióng₂ dso₄.

17 Chi₂jua'₂ ca₂'io₃ bí₂ 'mú₃ ne₄ ca₂le₃jín₃ dsa₂
o₄quió'₄ dsáu₁ jan₂ dsa₂, tē₂le₃ i₂jui'₂ guě₄ 'ñio₅ tson₂
a₂'ua₁ dsí₅ Diú₄ ja₁con₂ dsa₂ i₂guéin'₂ nē₂jag₄ bá₄
a₂tsá₃ 'e₂ dso₄ rīn₂, a₂'io₂₃ bí₂ a₂le₃chain₂ dse₃ tē₂le₃
quian'₅₄ jan₂ dsa₂, i₂lín₅ Jesucristo.

18 Jaun₂ lē₃, jui₁lia'₂ dsáu₁ Adán ca₂chein'₃
ca₂le₃jín₃ dsa₂ jui₅ ja₁'ě₃ Diú₄ uig₅, le₂nē₅ bá₄ ján₃,
ta₁ a₂quí'₅ a₂dse₃ a₂ca₂jmo₃ Jesucristo ca₂cain₃
ca₂le₃jín₃ dsa₂ jui₅ ja₁lé₂ le₃chain₂ dse₃, ja₁guéi'₂
Diú₄ nē₂jag₄ bá₄ a₂tsá₃ 'e₂ dso₄ rīn₂.

19 Co₂'nió'₄ le₃jua'₅₄, ia₁ jui₁lia'₂ tsá₃ gau₂ ca₂nág₂
jan₂ dsa₂ 'éi₂, jaun₂ juin₅ i₂ca₂rē₃chá₃ dsáu₁, ján₃ bá₄
le₂nē₅, 'uig₅₄ ia₁ a₂ca₂nág₂ gau₂ jan₂ tan₅₄ dsa₂, jaun₂
juin₅ i₂guén'₂ Diú₄ nē₂jag₄ bá₄ i₂ca₂jme₃ti₃.

20 Ca₂tē₁ron₅₄ 'Éi'₃ ia₁jaun₂ dsí₃juin₅₄ guě₄ dso₄; la₁
ja₁'ñio₅ lín₃ guě₄ ca₂i₁juin₅₄ dso₄, jaun₂ 'ñio₅ lín₃ guě₄
ca₂jmo₃ Diú₄ ca₂l₃tsón₂ a₂'ua₁ dsí₅.

21 Jaun₂ le₂nē₅ bá₄ jui₁lia'₂ ca₂tín₂ bí₂ dso₄ jui₅
a₂quian₅ 'mú₃, le₂nē₅ bá₄ ján₃ ca₂'io₃ bí₂ a₂'ua₁ dsí₅
Diú₄ a₂jág₂ jniog₄ nē₂jag₄ bá₄ dsa₂ i₂ca₂jme₃ti₃,
a₂cuě₃ a₂le₃chong₂ jniog₄ dse₃ co₂tan₅₄ tē₂le₃
quian'₅₄ Te₁gui'₅₄ Jesucristo quián₂ jniog₄.

6

*Ma₂dsau₃ tē₂le₃ quió'₅ dsáu₁, la₁ chong₂ le₃quió'₅
Cristo*

¹ ¿'E₂ jua'₅₄ jniog₄ jaun₂ nē₃? ¿A₁caun₂ dse₃ 'nióg₁
bá₄ jniog₄ dso₄ ia₁jaun₂ caun₂ dsí₃tsón₃ a₂'ua₁ dsí₅
Diú₄ quian'₅₄ jniog₄?

2 ꞑDsón'₂ bá₄ on₃jua'₅₄ le₂në₅! Ia₁ ma₂ca₂dsau₃ bá₄ jniog₄ le₃quió'₅ dsáu₁; ꞑ'a₂ bá₄ lia'₂ lé₂ jaun₂ ně₃ jua'₅₄ a₂caun₂ chong₂ jniog₄ le₃quió'₅ dsáu₁?

3 ꞑTsa₁ ñi'₅₄ 'nia'₂, lia'₂ con'₂ jme₁ca₂tió'₄ jniog₄ jmig₂ le₃quió'₅ Cristo Jesús, ca₂tió'₄ jniog₄ 'mú₃ quió'₅?

4 Ia₁ jme₁ca₂tió'₄ jniog₄ jmig₂, co₂'nió'₄ bá₄ ja₁jaun₂ ca₂'o₃ jniog₄ co₂lë₅ quian'₅₄ Cristo në₂jag₄ bá₄ a₂ca₂dsau₃, ia₁jaun₂ jein'₅₄ táng₃ a₂le₃chong₂ caun₂ jme₂dsí₂ 'mí₂, ju₁lia'₂ ca₂jen'₅₄ Cristo a₂jme₁rë₂join₅₄, të₂le₃ quian'₅₄ ju₁bí₂ jlá'₁ quió'₅ Jmei₂.

5 Ia₁ chi₂jua'₂ ca₂jme₁quian'₅₄ jniog₄ ne₄ 'mú₃ quió'₅, já₃n₃ bá₄ le₂jaun₂ tion₅₄ bá₄ jme₁quian'₅₄ jë₁ma₂ca₂jein'₅₄ jniog₄ ju₁lia'₂ ca₂jen'₅₄ 'éi₂.

6 Ne₄ bá₄ jniog₄, lia'₂ con'₂ lë₅ jme₁lág₄ le₂ñiá₅, ne₄ cróg₄ bá₄ ca₂ñó₃ a₂jaun₂ co₂lë₅ quian'₅₄ Cristo, ia₁jaun₂ dsi₃'én₂ ju₁bí₂ a₂'io₅ dsáu₁ ne₄ ni₁ñi₁ jniog₄, ia₁jaun₂ tsá₃ ma₃lë₅ jua'₅₄ a₂qui₂rë₂'ñei'₅₄ gué₄ a₂chong₂ qui₂jme₂tí₁ ta₁ ne₄ dsáu₁, në₂jag₄ bá₄ ne₄ jan₂ juig₅₄ jniog₄.

7 Ia₁ ju₁lia'₂ i₂majon₅, tsá₃ ma₂'e₂ rë₂'ñei'₅₄, ma₂lón₂ bá₄ ne₄ dsáu₁.

8 Chi₂jua'₂ ma₂ca₂dsau₃ jniog₄ quian'₅₄ Cristo, já₃n₃ bá₄ le₂jaun₂ 'éin₂ a₂le₃chong₂ quian'₅₄ 'éi₂,

9 ia₁ ne₄ bá₄ jniog₄, con'₂ jme₁ca₂jen'₅₄ Cristo ne₄ 'mú₃, o₁líg'₂ jmig₄ tsá₃ ma₃lé₂ le₃join₂; tsá₃ ma₂'e₂ ju₁bí₂ 'io₅ 'mú₃ ne₄ quió'₅ 'éi₂.

10 Ia₁ jme₁ca₂jon₃ Cristo, co₂ráun₂ bá₄ ca₂join₃ 'uig₅₄ dsáu₁ dsa₂; la₁ në₃ lia'₂ ma₂chain₂, chain₂ le₃quió'₅ Diú₄.

11 Le₂në₅ bá₄ 'nia'₂ já₃n₃, jmo₄ bá₄ 'nia'₂ 'au'₂

a₂ma₂dsang'₃ tē₂le₃ quió'₅ dso₄, la₁ chan'₂ bá₄ 'nia'₂
le₃quió'₅ Diú₄ tē₂le₃ quian'₅₄ Cristo Jesús.

12 A₂jaun₂ ně₃, 'a₃ cuē₂ 'nia'₂ jmig₄ jua'₅₄
a₂'io₃ guě₄ jui₅bí₂ dsáu₁ ne₄ ni₁ŋi'₁ 'nia'₂ a₂siá'₃,
a₂qui₂chi₃quióng₂ jmig₄ a₂jme₁ti'₄ 'nia'₂ a₂mi₅ ni₁ŋi'₅.

13 'A₃ qui₁jín'₅₄ 'nia'₂ a₂tén₅ ni₁ŋi'₁ jua'₅₄ a₂'no₃
guě₄ dso₄, co₂'nió'₄ a₂jmó'₂ ta₁ a₂jmo₃ a₂'lig'₅₄.
Tē₂le₃ ne₄ Diú₄ bá₄ jín'₅₄ 'nia'₂ a₂lín'₅ co₂'nió'₄ dsa₂
i₂ma₂dsan₃, i₂ma₂jen'₅₄ táng₃. Jang'₅₄ 'nia'₂ a₂tén₅
ni₁ŋi'₁ le₃ja₁con₂ Diú₄, co₂'nió'₄ a₂jmó'₂ ta₁ a₂jmo₃
jmá'₃ a₂dse₃.

14 Ia₁ tsá₃ 'io₃ guě₄ bí₂ dsáu₁ ne₄ quián'₂ 'nia'₂
ně₂jag₄ bá₄ jan₂ juig₅₄ 'nia'₂, ia₁ tsá₃ o₄gú₃ 'Éi'₃ tion'₅₄
'nia'₂; tē₂le₃ o₄gú₃ a₂'ua₁ dsí₅ Diú₄ bá₄ tion'₅₄ 'nia'₂.

15 ¿'E₂ bá₄ jaun₂ ně₃? ¿A₁caun₂ 'nióg₁ dso₄ bá₄ ia₁
tsá₃ o₄gú₃ 'Éi'₃ tio'₅₄ jniog₄, ia₁ ja₁'ua₁ dsí₅ Diú₄ bá₄
tión'₂? ¡Dsón'₂ bá₄ on₃jua'₅₄ le₂ně₅!

16 ¿Tsa₁ ŋi'₅₄ 'nia'₂, ně₁jua'₂ ca₂jín'₅₄ 'nia'₂ guiong'₅₄
o₄gú₃ jan₂ juig₅₄ a₂jme₁ti'₄ ta₁ ne₅₄, ma₂lín'₅ jan₂
i₂ma₂chi₁'ŋe'₅₄ i₂quián₅ dsa₂ 'éi'₂? Ján₃ bá₄ le₂jaun₂,
ně₁jua'₂ ca₂jín'₅₄ 'nia'₂ guiong'₅₄ ne₄ dsáu₁, dsáu₁
jaun₂ i₂ma₂lín₅ juig₅₄ 'nia'₂, jiog₅ jui₅ 'mú₃; o₃ ně₁jua'₂
ca₂jín'₅₄ 'nia'₂ ne₄ a₂nág'₁ gau₂ jág₁ quió'₅ Diú₄,
a₂jaun₂ bá₄ i₂ma₂lín₅ juig₅₄ 'nia'₂, jiog₅ jui₅ co₂dsau₅.

17 Jui₁'e₂ guě₃ jme₁rē₂qui₂rē₂'ŋe'₂ 'nia'₂ le₂ŋiá₅ ne₄
dsáu₁, la₁ rē₂ně₃ ně₃, ti₁'mag'₄ Diú₄, ma₂nei'₂ bá₄
'nia'₂ gau₂ ca₂le₃jě₃ jme₂dsí₂ quiáng'₂ jág₁ quen₅
a₂ma₂rē₂jín'₅₄ 'nia'₂, a₂jme₂tíng'₂.

18 Jaun₂ ně₃ ma₂lón'₂ 'nia'₂ o₄gú₃ dsáu₁, ma₂tion'₅₄
bá₄ 'nia'₂ o₄gú₃ jui₅ co₂dsau₅.

19 (Juá'₅ jniá'₂ juíg'₂ 'nia'₂ lia'₂ con'₂ lě'₅ jág'₁ dsia'₅ dsa'₂ mi₂güí'₃, ia'₁ dsón'₂ bá'₄ quian'₅ ta'₁ le₃ñí'₂ 'au'₂ 'nia'₂ dse'₃ ia'₁ të'₂le₃ a₂lín'₅ 'nia'₂ dsa'₂ mi₂güí'₃.) Ia'₁ le₂jaun'₂ bá'₄ ján'₃ jui₁lia'₂ qui₂ca₂jín'₅₄ 'nia'₂ le₂jníá'₅ a₂tén'₅ ni₁ñi'₁ jui₅ ja₁tsá'₃ nág'₂ gau'₂, ja₁ca₂jme₁ti'₄ 'nia'₂ ta'₁ ne₄ ca₂le₃jě'₃ ne₅₄ a₂'lig'₅₄, le₂ně'₅ bá'₄ guë'₂ jang'₅₄ táng'₃ 'nia'₂ a₂tén'₅ ni₁ñi'₁ ja₁jme₁ti'₄ ta'₁ ne₄ jui₅ jñiós'₅ ja₁caun'₂ le₃dsen'₃ 'nia'₂.

20 Lia'₂ con'₂ jme₁lín'₄ guě'₄ dsa'₂ i₂qui₂rě'₂'ñe'₅₄ le₃quió'₅ dsáu₁, tsá'₃ jme₁rě'₂'ñeg'₅₄ jua'₅₄ a₂jme₂ti'₄ guě'₄ 'nia'₂ ta'₁ ne₄ jui₅ co₂dsau₅.

21 La₁ ħ'₂e₂ bá'₄ a₂dse₃ ca₂lín'₃ 'nia'₂ ca₂le₃jě'₃ a₂jaun'₂, a₂caun'₂ lě₁o₂guí'₃ quián'₂ 'nia'₂ rě₂ně'₃? Ia₁ jmá'₃ lia'₂ ca₂ne₅₄ a₂dsióg'₄ ne₄ jui₅ 'mú'₃ bá'₄ a₂jaun'₂.

22 La₁ rě₂ně'₃ ně'₃, ma₂lón'₂ 'nia'₂ jui₅ ja₁jme₁qui₂rě'₂'ñe'₅₄ 'nia'₂ 'nau'₂ dso₄, ma₂i₂ton'₅₄ 'nia'₂ jui₅ ja₁jme₁ti'₄ ta'₁ ne₄ Diú'₄, jaun'₂ lén'₂ 'nia'₂ jui₅ jñiós'₅ ja₁caun'₂ le₃dsen'₃ 'nia'₂, jui₅ ja₁dsióg'₄ a₂le₃chan'₂ 'nia'₂ dse₃ co₂tan₅₄.

23 Ia₁ jñiá'₅₄ lia'₂ 'mú'₃ bá'₄ lí'₂ dsa'₂ co₂'nió'₄ 'lia'₅₄ dsáu₁, la₁ a₂lě₁cuë'₅ bá'₄ Diú'₄ a₂le₃chan'₂ dsa'₂ dse₃ co₂tan₅₄ të'₂le₃ quian'₅₄ Cristo Jesús i₂lín'₅ Te₁gui'₅₄ quián'₂ jniog'₄.

7

Caun'₂ jág'₁ a₂jáng'₅ léi'₄ a₂jau'₂ jui₁lia'₂ ja₁con'₂ dsa'₂ i₂rě₂jén'₂ gu₂

1 Rín'₅₄ jniog'₄, 'nia'₂ dsa'₂ i₂cuí'₅ 'a₂ lia'₂ juá'₂ ne₄ Si₂ 'Éi'₃, ħ₂tsa₁ ñi'₅₄ 'nia'₂ a₂'io₅ bí'₂ 'Éi'₃ ja₁con'₂ jan'₂ dsa'₂ jmá'₃ të₁lia'₂ chain'?

2 Jui₁lia'₂ jan'₂ dsa'₂ m'í₂ i₂chan'₂ dsi₂i₂gu₂, co₂'nió'₄ a₂chi₁'ñei'₅₄ bá'₄ quiain'₅₄ dsi₂i₂gu₂ lia'₂ con'₂ lě'₅ ne₄

Si₂ 'Éi'₃, tē₁lia'₂ chan₂ dsa₂ ŋe'₂. La₁ nē₁jua'₂ ca₂jon₃ dsi₂i₂gu₂ ně₃, ca₂tsin'₂ bá₄ dsa₂ mí₂ 'éi'₂ tē₂le₃ quió'₅ 'éi'₃ a₂jme₁le₁quian₅ quió'₅ quiaín₅₄ dsi₂i₂gu₂.

³ Nē₁jua'₂ ca₂guá'₂ 'io₅₄ quiaín₅₄ dsa₂ ŋe'₂ sián'₂ tē₃ chan₂ dsi₂i₂gu₂, dso₄ bá₄ 'no₂₃; la₁ nē₁jua'₂ ca₂jon₃ dsi₂i₂gu₂ ně₃, ca₂tsin'₂ bá₄ 'io₅₄ tē₂le₃ quió'₅ 'éi'₃, ma₂lé₂ bá₄ jéin'₂ táng₃ gu₂ quiaín₅₄ dsa₂ ŋe'₂ sián'₂, tsá₃ ma₃dso₄ 'no₂₃.

⁴ Le₂nē₅ bá₄ ján₃, 'nia'₂ rin'₅₄ jniog₄, ma₂dsan'₃ 'nia'₂ le₃quió'₅ 'Éi'₃ tē₂le₃ quian'₅₄ ŋi₄ Cristo, ia₁jaun₂ tén_g'₄ ja₁con₂ i₂sián'₂: ja₁con₂ 'éi'₂ i₂ca₂jen'₅₄ táng₃ ne₄ 'mú₃. Le₂nē₅ ca₂lě₃ ia₁jaun₂ le₃chong₂ jniog₄ téi₅ ta₁ ne₄ Diú₄.

⁵ Ia₁ lia'₂ con'₂ jme₁chong₂ jniog₄ lia'₂ jme₁jio₅ ni₁ŋi₁ jniog₄, ta₁ jaun₂ ca₂quí'₃ 'Éi'₃ a₂ca₂ŋei₃ jui₅ ni₁ŋi₁ jniog₄ a₂ca₂lě₃ dsi₅ jmó₁ a₂'lig'₅₄, ca₂quí'₃ ta₁ a₂ca₂i₁jo₅₄ ne₄ 'mú₃.

⁶ La₁ rē₂ně₃ ně₃, ma₂dsau₃ le₃quió'₅ Si₂ 'Éi'₃ a₂jme₁jio₅ jme₁le₁'ŋei'₅₄, a₂jme₁ti₁ ne₄ Diú₄ jui₅ 'mí₂ quió'₅ Jme₂dsí₂ quiaín₅. Jaun₂ tsá₃ ma₃tio'₅₄ jniog₄ le₁'ŋei'₅₄ ne₄ 'Éi'₃ a₂chi₁ton₅ ne₄ si₂.

Dso₄ a₂'i₄ja₁con₂jniá₂

⁷ ¿'E₂ jua'₅₄ jniog₄ jaun₂ ně₃? ¿A₂lě₅ dso₄ bá₄ 'Éi'₃ jaun₂? ¿Dsón'₂ bá₄ on₃jua'₅₄ le₂jaun₂! La₁ jniá₂ ně₃ tsá₃ ca₂rě₃guion₅₄ 'e₂ jaun₂ dsáu₅, jua'₅₄ mei'₂ guě₃ tsá₃ 'Éi'₃ ron₅. Co₂'nió'₄ le₃jua'₅₄, tsá₃ 'e₂ ca₂rě₃guion₅₄, jui₁lia'₂ a₂'ín₅ dsi₃ a₂cha₂ quió'₅ i₂sián'₂, jua'₅₄ mei'₂ guě₃ tsá₃ a₂juá'₂ 'Éi'₃ ne₄ Si₂: “Tsá₃ lě₃jmo₂ 'ín₅ 'au'₂ a₂quió'₅ dsa₂ sián'₂.”*

* 7:7 Éxodo 20:17; Deuteronomio 5:21.

8 La₁ dsáu₁ ně₃ ca₂jme₃'ŋi₃oí'₃ bá₄ jág₁ ně₅; 'ŋiog₅ bá₄ 'Éi'₃ ca₂cuë₃ jmig₄ ca₂ŋei₃ tē₂dsi₃ ca₂le₃jě₃ ne₅₄ a₂'ín₅ dsi₃ a₂cha₂ quió'₅ i₂sián'₂. Ia₁ ju₁lia'₂ ja₁tsá₃ 'Éi'₃ ron₅, tsá₃ léi₄ jniá₂ a₂cha₂ dsáu₅.

9 Ján₃ bá₄ jme₁chang₂ caun₂ jmig₄ lia'₂ con'₂ tsá₃ 'Éi'₃ quió'₅ Moisés ma₂ca₂tíng₂. La₁ jme₁ca₂já₃ 'Éi'₃, co₂'nió'₄ a₂ca₂jen'₅₄ bá₄ táng₃ dsáu₁; jniá₂ guē'₂, co₂'nió'₄ a₂ca₂jong₃.

10 Le₂ně₅ bá₄ ca₂lě₃ quian'₅₄ 'ŋiog₅ 'Éi'₃ jaun₂; 'nió'₄ a₂jme₁cuë₃ bí₂ a₂le₃chan₂ jniá₂, tē₂le₃ ca₂jioğ₃ ju₁'mú₃ bá₄ a₂jaun₂.

11 Ia₁ dsáu₁ ně₃, ca₂jme₃'ŋi₃oí'₃ bá₄ ne₄ 'Éi'₃ ja₁con₂ jniá₂, ca₂jme₃gau₂₃. Jaun₂ quian'₅₄ 'ŋiog₅ bá₄ 'Éi'₃, ca₂cuë₃ 'mú₃.

12 Jaun₂ ně₃, a₂jŋi₃oí₅ bá₄ Si₂ 'Éi'₃; ján₃ guē'₂ le₂jaun₂ ca₂le₃jě₃ 'éi'₃ tio'₅₄, a₂jŋi₃oí₅, con₂ 'í₁ con'₂ dsi₂ten₅₄, a₂dse₃ lin₃ bá₄ a₂jaun₂.

13 ¿'E₂ bá₄ jaun₂ ně₃? ¿Ju₁lia'₂ a₂dse₃ jaun₂ ca₂lě₃ 'mú₃ ja₁con₂ jniá₂? ¡Dsón'₂ on₃jua'₅₄ jaun₂! 'Uig₅₄ dsáu₅ bá₄ jniá₂ jaun₂, ca₂jioğ₃ ju₁'mú₃, le₂ně₅ ca₂cuë₃ léi₄ a₂lé₅ dso₄ a₂jaun₂ a₂jme₁jmo₅ jniá₂; ca₂jmo₃ tē₂le₃ quian'₅₄ a₂dse₃, jaun₂ le₂ně₅ ca₂jme₃jnia₅ 'Éi'₃ 'e₂ a₂lě₅ a₂ju₁si'lig'₅₄ a₂lě₅ dsáu₁.

14 Ne₄ bá₄ jniog₄ jaun₂ a₂lě₅ a₂gu₂dsí₂ bá₄ 'Éi'₃, la₁ dsa₂ ni₁ŋí₅ bá₄ jniá₂; co₂'nió'₄ a₂rē₂'ni₅₄ bá₄ jniá₂ ne₄ dso₄.

15 Ia₁ tsá₃ ŋí'₂ dsi₃ 'e₂ lě₃ jmo₂₃ 'e₂ jmo₂₃, ia₁ tsá₃ lé₂ jmo₅₄ a₂'ín₅ dsi₃ jmo₅₄, ia₁ ca₂le₃jě₃ a₂'io₄ jniá₂ a₂tsá₃ 'nio₃ jmo₅₄, a₂jaun₂ dé₄ dsón'₂ jmo₂₃.

16 Ia₁ chi₂jua'₂ jmo₅ jniá₂ a₂tsá₃ tē₅ dsi₃ jmo₅₄, jaun₂ jmo₅ jniá₂ dsi₃ a₂dse₃ bá₄ 'Éi'₃.

17 Le₂ně₅ bá₄ jaun₂, on₃jua'₅₄ jniá₂ 'ñi₃ 'no₂₃ dso₄;
dsáu₅ jniá₂ a₂'i₄ tē₂dsi₃ bá₄, a₂jaun₂ bá₄ jmo₅.

18 Ia₁ guion₄ jniá₂, 'i₁caun₂ a₂dse₃ tsá₃ cha₂ tē₂dsi₃
jniá₂, co₂'ni₃' le₃jua'₅₄ lia'₂ con'₂ líng₅ dsa₂ ni₁ñí₅, ia₁
'ín₅ bá₄ dsi₃ jmo₅₄ a₂dse₃, la₁ tsá₃ qui'₅₄ jmig₄ jmo₅₄.

19 Tsá₃ qui₂jmo₅ jniá₂ a₂dse₃ a₂'nio₃ jmo₅₄; caun₂
jmo₅ bá₄ jniá₂ a₂'lig'₅₄ a₂tsá₃ 'nio₃ jmo₅₄.

20 Jaun₂ ně₃, chi₂jua'₂ jmo₅ jniá₂ a₂tsá₃ tē₅ dsi₃
jmo₅₄, on₃jua'₅₄ jniá₂ 'ñi₃ jmo₂₃ a₂jaun₂; dsáu₅ jniá₂
a₂'i₄ tē₂dsi₃ bá₄, a₂jaun₂ bá₄ jmo₅.

21 Jaun₂ ma₂ca₂rē₃lé₄, cha₂ caun₂ 'éi'₃: jē₁ma₂tē₂
rē₁'nio₃ jmo₅₄ a₂dse₃, jñia'₅₄ lia'₂ a₂'lig'₅₄ bá₄ cha₂
ja₁cong₂.

22 Né'₃ jme₂dsí₂ quió₃, tē₅ bá₄ dsi₃ 'Éi'₃ quió'₅ Diú₄;

23 la₁ jág₅ jniá₂ ja₁con₂ a₂tén₅ ni₁ñi₃, cha₂ caun₂ 'éi'₃
siá'₂ a₂jmo₅ 'nei₂ quian'₅₄ 'éi'₃ 'a₂ lia'₂ dsi₂jio₅ dsi₃,
a₂tē₂ chi₁'ñeg'₁ ne₄ 'éi'₃ quió'₅ dso₄ a₂jmo₅ ta₁ ja₁con₂
a₂tén₅ ni₁ñi₃.

24 ¡'E₂ guě₄ juí₂g₂ jniá₂! ¿'Ein₂ bá₄ jiá₃ lió₂ ne₄ ni₁ñi₃
a₂jio₅ 'mú₃ la₂?

25 Ti₁'mag'₄ Diú₄, cha₂ bá₄ juí₅ 'a₂ lia'₂ lé₂ tē₂le₃
quian'₅₄ Te₁gui'₅₄ Jesucristo quián₂ jnio₄.

Jaun₂ ně₃, 'ñi₃ bá₄ jniá₂ quian'₅₄ 'a₂ lia'₂ dsi₂jio₅
dsi₃, jme₂tí₁ ta₁ ne₄ 'Éi'₃ quió'₅ Diú₄, la₁ lia'₂ con'₂ líng₅
dsa₂ ni₁ñí₅, jme₁tí₁ jniá₂ ne₄ 'éi'₃ quió'₅ dso₄.

8

*A₂ lia'₂ chan₂ dsa₂ con'₂ lě₅ jio₅ Jme₂dsí₂ quián₅
Diú₄*

1 Nē₃ nē₃ jaun₂, tsá₃ ma₂'e₂ uig₅ 'ě₂ Diú₄ ne₄ quió'₅ dsa₂ i₂ma₂'ei₅ caun₂ jág₁ quian'₅₄ Cristo Jesús.*

2 Ia₁ bí₂ a₂'io₅ 'éi'₃ quió'₅ Jme₂dsí₂ ma₂cuë₅ jmig₄ a₂chan₂ jniá₂ tē₂le₃ quian'₅₄ Cristo Jesús, ia₁ ma₂ca₂lió₂ jniá₂ ne₄ 'éi'₃ quió'₅ dso₄, quió'₅ 'mú₃ nē₃.

3 Ia₁ ma₂ca₂jmo₃ Diú₄ a₂tsá₃ ca₂qui'₅₄ jmig₄ Si₂ 'Éi'₃ jmo₃ ia₁ ca₂'uán₂ bá₄ 'Éi'₃ 'uig₅₄ dsáu₁ dsa₂ ni₁ñí₅: ca₂chein₃ ja₁ñi'₅₄ 'ñiog₅ o₄quió'₄ dsáu₁ dsa₂; ca₂jmo₃ a₂lín₅ 'éi₂ dsa₂ chi₁dsáin₃ lia'₂ lín₅ dsa₂ mi₂güig₃ i₂'no₅ dso₄, jaun₂ le₂nē₅ bá₄ ca₂'ě₂ uig₅ ne₄ dso₄, ia₁ a₂lín₅ dsa₂ chi₁dsáin₃.

4 Le₂nē₅ ca₂jmo₃ ia₁jaun₂ le₃ti₃ 'Éi'₃ a₂con₂ 'í₁ con'₂ dsi₂ten₅₄, ja₁con₂ jniog₄, i₂i₂nio₄, on₃jua'₅₄ lia'₂ con'₂ lě₅ jiog₅ ni₁ñi₁₂, i₂i₂nio₄ lia'₂ con'₂ lě₅ jiog₅ Jme₂dsí₂ bá₄.

5 Ia₁ dsa₂ i₂chan₂ lia'₂ con'₂ lě₅ jiog₅ ni₁ñi₁ qui₂dsi₂jio₅ dsí₅ juí₅ quió'₅ ni₁ñí₅, la₁ juí₁lia'₂ dsa₂ i₂ma₂chan₂ lia'₂ con'₂ lě₅ jiog₅ Jme₂dsí₂ quián₅ Diú₄, qui₂dsi₂jio₅ dsí₅ a₂quió'₅ jme₂dsí₂ bá₄.

6 Ia₁ juí₁lia'₂ a₂qui₂dsi₂jio₅ dsí₅ dsa₂ juí₅ quió'₅ ni₁ñí₅, a₂lě₅ 'mú₃ bá₄ jaun₂; la₁ juí₁lia'₂ a₂qui₂dsi₂jio₅ dsí₅ dsa₂ le₃quió'₅ Jme₂dsí₂ quián₅ Diú₄, a₂jaun₂ bá₄ jmo₅ a₂le₃chan₂ dsa₂ dse₃, a₂'ag₃ tei₄ dsí₅ dsa₂ nē₃.

7 Ia₁ juí₁lia'₂ i₂qui₂dsi₂jio₅ dsí₅ juí₅ quió'₅ ni₁ñí₅, i₂'ñia₅₄ Diú₄ bá₄ i₂le₂'éi₂, ia₁ tsá₃ 'nio₃, on₃ guē'₂ lé₂ jme₃ti₃ 'Éi'₃ quió'₅ Diú₄.

* **8:1** A₂lín₅₄ chog₅₄ si₂ a₂ca₂lě₃ cang₂ guē₄, juá'₂ le₂la₂ ján₃: “i₂i₂nio₄, on₃jua'₅₄ lia'₂ con'₂ lě₅ jiog₅ ni₁ñi₁₂, i₂i₂nio₄ lia'₂ con'₂ lě₅ jiog₅ Jme₂dsí₂ bá₄.”

8 'Uig₅₄ jaun₂ bá₄, ju₁lia'₂ i₂i₂nio₄ lia'₂ con'₂ jiog₅ ni₁ñi₁₂, tsá₃ lé₂ le₃jmo₃ a₂të₅ dsí₅ Diú₄.

9 La₁ ju₁lia'₂ 'nia'₂ nē₃, tsá₃ ma₃i₂nio'₅₄ 'nia'₂ lia'₂ con'₂ jiog₅ ni₁ñí₅, ia₁ ma₂quian'₅₄ bá₄ 'nia'₂ Jme₂dsí₂, nē₁jua'₂ guá₅ Jme₂dsí₂ quián₅ Diú₄ të₂'au'₂ 'nia'₂. Ia₁ ju₁lia'₂ dsa₂ i₂tsá₃ 'en₅₄ Jme₂dsí₂ quián₅ Cristo të₂dsí₅, tsá₃ lín₅ i₂quián₅ 'éi₂.

10 La₁ nē₁jua'₂ 'en₅₄ Cristo të₂'au'₂ 'nia'₂, jaun₂ chan₂ bá₄ jme₂dsí₂ quián'₂ 'nia'₂ 'uig₅₄ ia₁ a₂ma₂jín₂ Diú₄ 'nia'₂ nē₂jag₄ bá₄ a₂ma₂jme₂tí'₂ 'nia'₂, o₁jñia'₅₄ 'io₅ 'mú₃ ni₁ñi'₁ 'nia'₂ o₄quió'₄ dso₄.

11 Chi₂jua'₂ chan₂ ja₁con'₂ 'nia'₂ Jme₂dsí₂ quián₅ i₂ca₂jme₃jen'₅₄ Cristo Jesús ne₄ 'mú₃, 'ñiog₅ bá₄ 'éi₂ cuē₃ jme₂dsí₂ 'mí₂ ne₄ ni₁ñi'₁ 'nia'₂ a₂ca₂tín₂ 'mú₃, të₂le₃ quian'₅₄ Jme₂dsí₂ quián₅ Diú₄ i₂guá₅ të₂'au'₂ 'nia'₂.

12 Le₂nē₅ bá₄ jaun₂, 'nia'₂ rin'₅₄ jniog₄, cha₂ a₂ca₂tág₂ jniog₄ jmó₁, la₁ on₃jua'₅₄ rē₂ ne₄ ni₁ñí₅ jua'₅₄ a₂nió'₅ le₃chong₂ jniog₄ 'io₄ táng₃ lia'₂ con'₂ lē₅ mi₅ ni₁ñi₁.

13 Ia₁ nē₁jua'₂ chan'₂ 'nia'₂ lia'₂ con'₂ mi₅ ni₁ñi'₁, dsián'₃ bá₄ 'nia'₂; la₁ nē₁jua'₂ të₂le₃ quian'₅₄ Jme₂dsí₂, jñí₅ 'nia'₂ a₂jmo₅ ni₁ñi'₁, jaun₂ le₃chan'₂ bá₄ 'nia'₂.

14 Ia₁ ca₂le₃jín₃ dsa₂ i₂i₂nio₄ lia'₂ con'₂ lē₅ jiog₅ Jme₂dsí₂ quián₅ Diú₄, lín₅ chi'₂-guein₂ quián₅ Diú₄.

15 Ia₁ Jme₂dsí₂ i₂ma₂guen'₅₄ 'nia'₂ on₃jua'₅₄ i₂lín₅ jme₂dsí₂ i₂qui₃'nei'₂ táng₃ jua'₅₄ a₂jmo₃ a₂le₃gan'₃ táng₃ 'nia'₂. Jme₂dsí₂ 'éi₂ bá₄ i₂ma₂guen'₅₄ 'nia'₂ i₂jmo₃ a₂lén'₂ 'nia'₂ chi'₂-guein₂ quián₅ Diú₄. Jme₁jua'₂ jniog₄ të₂le₃ quian'₅₄ 'éi₂: “¡Abba!† ¡Tia₅₄

† 8:15 Abba: co₂nió'₄le₃jua'₅₄; “Tia₅₄” quian'₅₄jág₁jmei₅ arameo.

quiáng³!”,

16 jaun₂ 'ñiog₅ bá₄ Jme₂dsí₂ ně₅ jme₂quiain'₅₄
jme₂dsí₂ quián₂ jniog₄, jáng'₅ jág₁ dsau₅ juá'₂
a₂ma₂lág₅ jniog₄ chi'₂-guein₂ quián₅ Diú₄.

17 Jaun₂ chi₂jua'₂ lág₅ jniog₄ ja₁ñi'₅₄, ján₃ bá₄
ca₂tág₂ jniog₄ guéi₁ a₂dse₃ a₂ma₂lě₅ jág₁ cuě₃ Diú₄
a₂cuě'₃ chi'₂-guein₂ quián₅; guéi₁ jniog₄ a₂ně₅ co₂lě₅
quian'₅₄ Cristo, chi₂jua'₂ quein'₅₄ jniog₄ quian'₅₄
jmi₁uig₅ quió'₅ ia₁jaun₂ quein'₅₄ jniog₄ cang₂ jě₄
co₂tág₅ co₂'né'₅ quió'₅.

18 Ia₁ lín₂ jniá₂ on₃jua'₅₄ cha₂ 'e₂ uig₅ a₂ñag₄ jniog₄
rě₂ně₃ on₃jua'₅₄ a₂quin₃ quian'₅₄ a₂co₂tág₅ co₂'né'₅
a₂jíá₃ a₂le₃jniá₂ ja₁con₂ jniog₄.

19 Ia₁ ma₂chi₁jñia₅ chi₁quian'₅₄ jmi₁g₄ ca₂le₃jě₃
a₂ca₂jmo₃ Diú₄, a₂'ín₅ dsí₅ jmi₁g₄ jě₁ma₂tě₂ rě₁le₃jniá₂
chi'₂-guein₂ quián₅ Diú₄.

20 Ia₁ ca₂le₃jě₃ a₂ca₂jmo₃ Diú₄ ně₃ ma₂qui₂le₁'ñei'₅₄
ne₄ jui₅ ja₁tsá₃ ta₁ tí₄, on₃jua'₅₄ ia₁ a₂ca₂rě₃'ñió₃ dsí₅
guioin'₅₄, ia₁ le₂jaun₂ 'éi'₃ ca₂jmo₃ Diú₄ 'ñiog₅ bá₄.
A₂'ín₂ dsí₅ ca₂le₃jě₃ a₂ně₅,

21 jmi₁g₄ a₂lió₂ Diú₄ a₂qui₂chi₁'ñei'₅₄ ne₄ jui₅ a₂siá'₃
quió'₅, ia₁jaun₂ jme₃quiain'₅₄ chi'₂-guein₂ quián₅
Diú₄ jě₄ co₂tág₅ co₂'né'₅ ju₁lia'₂ i₂ma₂qui₂ca₂lón₂.

22 Ia₁ ne₄ bá₄ jniog₄, ca₂lia'₂ jñió₄ jmi₁g₄ ně₃,
ca₂le₃jě₃ a₂ca₂jmo₃ Diú₄, qui₂'ñióg₂ qui₂'ñia₂₃ co₂lě₅
chain₂ uig₅.

23 On₃jua'₅₄ jmá'₃ a₂jaun₂; ján₃ bá₄ le₂jaun₂ jniog₄
ně₃, i₂'io₅ a₂le₂'uig₅₄ a₂ca₂ráu₃ quió'₅ Jme₂dsí₂,
qui₂'ñióg₅ qui₂'ñia₂ tě₂dsí₅ jniog₄ tě₁lia'₂ chi₁jñia₁
a₂'ín₅ dsí₅ jmi₁g₄ jaun₂, a₂jme₃jnia₅ a₂lág₅ jniog₄
chi'₂-guein₂ quián₅ Diú₄, jmi₁g₄ a₂lióin₂ ni₁ñi₁ jniog₄
la₂.

24 Ia₁ tē₂le₃ quian'₅₄ jmīg₄ a₂'ín₂ dsi₅ jniog₄ nē₅ bá₄ ca₂lió₂; la₁ nē₁jua'₂ ma₂jág₅ dsa₂ a₂'ín₂ dsi₅, on₃jua'₅₄ ma₃le₃'ín₂ dsi₅ dsa₂ jui₁lia'₂ a₂ma₂jág₅, tsá₃ ma₃tion₅₄ 'nió'₅ 'ín₂ dsi₅.

25 La₁ nē₁jua'₂ 'ín₂ dsi₅ jniog₄ caun₂ a₂tsá₃ ma₂ne₅₄, juin'₂ bá₄ dsi₅ jnia₄ a₂'ín₂ dsi₅.

26 Ján₃ bá₄ le₂nē₅ jme₂'o₅₄ Jme₂dsí₂ quián₅ Diú₄ a₂'uan₅₄ dsi₅ jniog₄. Ia₁ tsá₃ tag₂ chi₂len'₄ Diú₄ 'a₂ con'₂ dsi₂ten₅₄, la₁ 'ñiog₅ bá₄ Jme₂dsí₂ Jñió₅ nē₃ mi₂₃ ne₄ Diú₄ o₄quián₂ jniog₄, ca₂le₃jě₃ qui₂'ñiog₂ qui₂'ñia₃ on₃jua'₅₄ a₂lé₂ le₃'ñiog₃ jniog₄ quian'₅₄ jág₁.

27 La₁ Diú₄ nē₃ i₂tē₂li₅ tē₂dsí₅ dsa₂ mi₂güí₃, 'éi₂ bá₄ ñi₅ 'e₂ 'nio₃ Jme₂dsí₂ 'éi₂ juá'₂; ia₁ mi₅ Jme₂dsí₂ Jñió₅ lia'₂ con'₂ lě₅ 'ñio₂ dsi₅ Diú₄, o₄quió'₄ dsa₂ jñió₅ quián₅.

Tē₂le₃ ñag₅₄ guě₄ léi₂ jniog₄

28 Ne₄ bá₄ jniog₄, Diú₄ bá₄ i₂jmo₅ ne₄ ca₂le₃jě₃, a₂dse₃ quió'₅ dsa₂ i₂'nio₃ Diú₄, quió'₅ dsa₂ i₂ma₂tě'₃ Diú₄ lia'₂ con'₂ lě₅ ma₂i₂jniog₅ dsi₅ jmo₃.

29 Ia₁ i₂ma₂cui₅ Diú₄ ca₂le₂jñiá₅, ján₃ bá₄ ca₂chei'₃ ca₂'iin₃ 'éi₂ a₂lén₂ jui₁lia'₂ lín₅ Ja₁ñi'₅₄, ia₁jaun₂ lén₂ Ja₁ñi'₅₄ i₂le₂ne₁ jě₄ quió'₅ riin'₅₄ i₂juin₅.

30 Dsa₂ i₂con'₂ ma₂ca₂chen'₃ Diú₄ lia'₂ ca₂le₂jñiá₅, ca₂tě'₃ 'éi₂ ján₃; dsa₂ i₂con'₂ ca₂tě'₃ 'éi₂ nē₃, ján₃ bá₄ ca₂jág₂ nē₂jag₄ a₂tsá₃ 'e₂ dso₄ riin₂; dsa₂ i₂con'₂ ca₂jág₂ Diú₄ a₂tsá₃ 'e₂ dso₄ riin₂ nē₃, ján₃ bá₄ ca₂jme₃jláin'₁.

31 ¿'E₂ le₃jua'₅₄ jniog₄ nē₃, quian'₅₄ a₂nē₅? Chi₂jua'₂ chén'₅ Diú₄ ne₄ jág₁ quián₂ jniog₄, ¿'ein₂ bá₄ qui'₅₄ jmīg₄ jmóg'₂ jniog₄?

32 Tsá₃ ca₂jmo₃ Diú₄ jua'₅₄ tsá₃ jme₁cuin₂₃ Ja₁ŋi'₅₄ 'ŋiog₅, të₂le₃ ca₂jáŋg'₂ bá₄, ca₂ŋó₃ 'éi₂ ne₄ 'mú₃ o₄quián₂ jniog₄; ¿'a₂ bá₄ lia'₂ jua'₅₄ a₂tsá₃ cuë₃ jniog₄ já₃ co₂dsia₅ quian'₅₄ 'éi₂ ca₂le₃jě₃?

33 ¿'Ein₂ bá₄ lé₂ le₃'ni₃ dsa₂ i₂ma₂quión'₂ Diú₄? Ton'₂ 'ŋiog₅ bá₄ Diú₄ juá'₂ a₂tsá₃ 'e₂ riin₂.

34 ¿'Ein₂ i₂lé₂ le₃'é₂ uig₅? Ia₁ Cristo Jesús bá₄ i₂ca₂jon₃; të₂le₃ lě₅ bá₄ guě₄, a₂ca₂jein'₅₄ táng₃, ton'₂ ma₂guá₅ le₃gu₂ ne₁ quió'₅ Diú₄, mi₂₃ o₄quián₂ jniog₄.

35 ¿'Ein₂ bá₄ i₂lé₂ 'liog'₃ jniog₄ cau₅ ne₄ a₂'nio₃ Cristo? ¿O₃ bá₄ qui'₅₄ jmig₄ jui₁lia'₂ caun₂ jm₁uig₅, o₃ jui₁lia'₂ caun₂ o₂i₁ dsi₅, o₃ jmig₄ jui₁lia'₂ a₂co₂'ein₅ dsa₂, o₃ jmig₄ jui₁lia'₂ jme₁'in₂ a₂que₅₄, o₃ ia₁ a₂tsá₃ cha₂ a₂qui'₅₄ 'e₂ jniog₄, o₃ 'e₂ caun₂ a₂gau₂ cha₂, o₃ a₂go₃ jniog₄ a₂jme₃dsiog₅ dsa₂ quian'₅₄ ŋi₁tág₂?

36 Jui₁lia'₂ rě₂ton₅ ne₄ Si₂:

O₄quián'₂ 'ne₂ bá₄ guei₂ jnia'₅₄ 'mú₃ co₂tan₅₄.

Jmo₅ dsa₂ dsí₅ a₂lág₅ jnia'₅₄

ně₂jag₄ bá₄ já'₂ cha'₂

i₂ma₂le₁te₂ dsa₂ a₂jme₃dsiog₂₃.‡

37 La₁ jě₄ ca₂le₃jě₃ a₂ně₅, tson₂ guě₄ léi₂ tián₂ jniog₄ të₂le₃ quian'₅₄ 'éi₂ i₂ma₂ca₂rě₃'nio₃ quián₂ jniog₄.

38 Ia₁ caun₂ bá₄ 'ei₅ dsi₃, 'i₁caun₂ tsá₃ 'e₂ lé₂ le₃'liog'₃ cau₅ ne₄ a₂'nio₃ Diú₄ jniog₄. Tsá₃ qui'₅₄ jmig₄ 'mú₃, on₃ guě'₂ a₂chong₂, on₃ guě'₂ ángeles, on₃ guě'₂ dsi₂tan₅₄ quián₅ jme₂dsí₂, on₃ guě'₂ a₂cha₂ rě₂ně₃, on₃ guě'₂ a₂cha₂ jmig₄ ne₄ jui₅ ně₃, on₃ guě₄ jui₅bí₂,

39 on₃ guě'₂ i₂tion'₅₄ ja₁ŋei₅ lín₃, on₃ guě'₂ i₂tion'₅₄ ja₁'uin₃ lín₃, on₃ guě'₂ jui₁'e₂ guě₃ a₂siá'₂ a₂ca₂jmo₃ Diú₄, jua'₅₄ le₃qui'₅₄ jmig₄ jmo₃ jua'₅₄

‡ 8:36 Salmo 44:22.

a₂tsá₃ ma₃jme₃'nio₃ Diú₄ jniog₄, tē₂le₃ quian'₅₄
Cristo Jesús Te₁gui'₅₄ quián₂ jniog₄.

9

Ma₂quión'₂ Diú₄ dsa₂juig₂ Israel

¹ Jág₁ tí₅ dsón'₂ bá₄ juá'₅ jniá₂ le₃quió'₅ Cristo la₂,
tsá₃ jme₂gau₅₄ jniá₂; tē₂dsi₃ jniá₂ jiog₅ Jme₂dsí₂ Jnió₅
juá'₂ tság₅ jniá₂ a₂dsón'₂ bá₄ dsau₅;

² 'ηio₅ lín₃ chang₂ go₂'i₃ qui'₂ dsi₃ co₂tan₅₄,

³ ia₁ ca₂tē₂ 'ηió₃ jniá₂ jme₁'nio₃ jua'₅₄ dsi₃'éng₁,
rē₂'na₄ jág₁ ja₁con₂ Cristo jua'₅₄ mei'₂ guē₃ le₂jaun₂,
o₄quió'₄ ríng'₃ dsa₂ go₃ jniá₂ le₃quió'₅ ni₁ηí₅.

⁴ 'Éi₂ bá₄ i₂lín₅ dsa₂ tsi₁jon₂ Israel;* 'éi₂ bá₄ i₂lín₅
dsa₂ i₂ca₂guéi'₂ Diú₄ a₂lín₅ chi'₂-guein₂ quián₅; 'éi₂
bá₄ i₂ca₂tē₂ ne₄ a₂tág₅ co₂'né'₅ quió'₅ Diú₄; 'éi₂ bá₄
i₂ca₂lí'₃ jág₁ quian'₅₄ Diú₄; 'éi₂ bá₄ i₂ca₂gue₃ Si₂ 'Éi'₃
ca₂cuē₃ Diú₄; 'éi₂ bá₄ i₂ca₂tín₂ jme₃ti₃ a₂qui₂jén'₃ ne₄
Diú₄; 'éi₂ bá₄ i₂ca₂cuē₃ Diú₄ jág₁ quió'₅ ně₃.

⁵ 'Éi₂ bá₄ i₂lín₅ tsi₁jon₂ dsa₂ can'₅₄ quián₂ jnia'₅₄
ma₂líg'₂. Jaun₂ tē₂le₃ quian'₅₄ tsi₁jon₂ 'éi₂ ně₃,
ca₂guan₃ I₂rē₂'ín₁ quián₅ Diú₄ chi₁dsáin₃, i₂lín₅
Diú₄ ne₄ quió'₅ ca₂le₃jě₃, i₂jme₃juin'₂ dsa₂ co₂tan₅₄,
a₂méi₃.

⁶ On₃jua'₅₄ rē'₂ a₂tsá₃ ca₂rē₃ti₃ jág₁ a₂rē₂cuē₄ quió'₅
Diú₄, ia₁ tsá₃ ca₂le₃jín₃ dsa₂ tsi₁jon₂ Israel lín₅
tē₃dsón'₂ dsa₂ i₂tén₅ juig₂ Israel.

⁷ On₃ guē'₂ lín₅ ca₂le₃jín₃ dsa₂ tsi₁jon₂ Abraham
tē₃dsón'₂ chi'₂-guein₂ quián₅ 'éi₂; ia₁ jme₁ca₂juá'₂

* **9:4** Israel: co₂'nió'₄ le₃jua'₅₄, Jacob. Génesis 35:10.

Diú₄ ca₂tsí'₃ Abraham: “Të₂le₃ quian'₅₄ Isaac bá₄ ja₃lén₂ tsi₁jong'₂.”†

8 Jág₁ në₅, jein₅ jág₁, on₃jua'₅₄ chi'₂ dsio₄ le₃quió'₅ ni₁ñí₅ i₂lín₅ chi'₂-guein₂ quián₅ Diú₄; ton'₂ con'₂ i₂lín₅ guein₂ i₂ca₂rë₃chán₃ lia'₂ con'₂ lë₅ jág₁ quió'₅ Diú₄ a₂jme₁ma₂cuë₃, jmá'₃ i₂'éi₂ bá₄ i₂jín₂ Diú₄ i₂lín₅ të₃dsón'₂ tsi₁jon₂ Abraham.

9 Ia₁ jág₁ quió'₅ Diú₄ a₂ca₂cuë'₃ Abraham, a₂la₂ bá₄ jaun₂: “Jein₂ rë₂në₃ ñi₂ caun₂, guio₅₄ jniá₂, jaun₂ le₃chan₂ jan₂ guein₂ quián₅ Sara.”‡

10 On₃jua'₅₄ jmá'₃ a₂jaun₂. Qui₂ca₂can₃ Rebeca guein₂ quian'₅₄ jan₂ dsa₂ ñe'₂ i₂lín₅ Isaac jmei₂ jniá'₅₄.

11 La₁ tsá₃ jme₁ma₂ca₂rë₃chán₃ guein₂ quián₅ i₁Bé'₄, on₃ guë'₂ a₂'lig'₅₄ a₂dse₃ jme₁ma₂tiin₂ jmo₃, jme₁ca₂jmo₃ Diú₄ jág₁, ia₁jaun₂ të₃ñiá₄ a₂ca₂tín₂ Diú₄ qui₃quió'₂ lia'₂ con'₂ lë₅ niog₅ dsí₅;

12 on₃jua'₅₄ 'uig₅₄ ia₁ a₂jme₂ti₃ dsa₂, të₂le₃ 'uig₅₄ ia₁ a₂të₂ Diú₄; ca₂juá'₂ Diú₄ ca₂tsí'₃ i₁Bé'₄: “I₂lín₅ i₂juin'₂ jme₃ti₃ ne₄ i₂me'₂.”§

13 Ju₁lia'₂ chi₁ton₅ ne₄ Si₂: “Ca₂quió'₄ jniá₂ ca₂jme₁gu'₅₄ quió'₅ Jacob, lë₅ guë'₄ con'₂ guë'₄ Esaú.”*

14 ¿'E₂ bá₄ le₃jua'₅₄ në₃? ¿On₃ bá₄ tsá₃ rë₂ qui₂dsi₅ Diú₄ 'éi'₃? ¿Dsón'₂ on₃jua'₅₄ le₂jaun₂!

15 Ia₁ ca₂tsí'₃ Moisés:
Dsia₅₄ jniá₂ ñéi₂ dsí₃

ja₁con₂ i₂'nio₃ jniá₂ dsia₅₄ ñéi₂ dsí₃ quiaín'₅₄;
ján₃ bá₄ jmo₅₄ jniá₂ 'ua₁ dsí₃

† 9:7 Génesis 21:12. ‡ 9:9 Génesis 18:10,14. § 9:12 Génesis 25:23.

* 9:13 Malaquías 1:2-3; lit. “Ca₂jme₁'nió₄ jniá₂ Jacob, Esaú guë'₂ ca₂jme₁'ñiai₅₄.”

ja₁con₂ i₂'nio₃ jniá₂ jmo₅₄ 'ua₁ dsí₃ quiain'₅₄.†
 16 Le₂në₅ bá₄ jaun₂, on₃jua'₅₄ rë'₂ ia₁ 'nio₃ jan₂ dsa₂,
 o₃ a₂quín'₃ bí₂ 'e₂; ton'₂ ia₁ a₂ñéi₂ dsí₅ Diú₄ bá₄.

17 Ia₁ chi₁ton₅ ne₄ Si₂ 'a₂ lia'₂ ca₂juá'₂ Diú₄ ca₂tsí'₃
 Faraón:‡ “Ta₁ jaun₂ të₃dsón'₂ bá₄ ca₂tság'₂ jniá₂
 a₂léng'₂ rag₅₄, ia₁jaun₂ jme₁jnia₅ jniá₂ jui₅bí₂ quió₃
 të₂le₃ quian'₅₄ 'ne₂, ia₁jaun₂ guë'₄ le₃ñi₅ dsa₂ ta₁caun₂
 gua'₅₄ 'uë'₃ 'a₂ lia'₂ lín₅ jniá₂.”§

18 Jaun₂ lë₃, ca₂tín₂ Diú₄ dsia₃ ñéi₂ dsí₅ ja₁con₂
 chi₂'ein₂ 'nio₃, ton'₂ ján₃ guë'₂ jme₃'ua'₂ dsí₅ chi₂'ein₂
 'nio₃ jme₃'ua'₂ dsí₅.

19 La₁ jaun₂, lé₂ jua'₅₄ juig'₅₄ jniá₂: “Chi₂jua'₂ le₂në₅,
 ¿'e₂ lë₃ cuë'₅ Diú₄ dso₄ dsa₂, jaun₂ në₃? Ia₁, ¿'ein₂ bá₄
 qui'₅₄ jmig₄ jné₃ a₂niog₅ dsí₅ Diú₄ jmo₃?”

20 ¡La₁ 'ne₂ në₃! ¿I₂'ein₂ bá₄ lín'₅ 'ne₂ dsa₂ mi₂güig₃,
 jua'₅₄ a₂tsíng'₄ quian'₅₄ Diú₄? ¿O₃ bá₄ lé₂ le₃juá'₂
 ju₁lia'₂ ni₁tí'₂ gua'₅₄, tsí'₃ i₂ca₂jmo₃: “¿'E₂ lë₃
 ca₂jmog'₅₄ jniá₂ le₂la₂?”*

21 Ju₁lia'₂ jan₂ të₅ i₂jmo₅ tí'₂: ¿Tsa₁ ca₂tín₂ 'uë'₃
 quian'₅₄ ca₂bë'₅₄ ti₁jein₂ caun₂ ni₁tí'₂ a₂jmó'₂ dsa₂ ta₁
 jmá'₃ lia'₂ a₂jlá'₁, caun₂ guë'₂ a₂jmó'₂ dsa₂ ta₁ lia'₂ 'ei₅
 ne₅₄ cosa?†

22 ¿'E₂ guë'₂ lé₂ le₃jua'₅₄ 'ne₂ chi₂jua'₂ 'nio₃ Diú₄
 jme₃jnia₅ a₂'nei₂, jme₃jnia₅ jui₅bí₂ quió'₅ në₃, la₁
 ca₂jmo₃ tíó'₃ ca₂jme₃juin'₃ dsí₅ 'ñio₅ lín₃ quiain'₅₄
 dsa₂ i₂jme₁ca₂tín₂ gue₃ uig₅ i₂jme₁ i₄'éi'₃ dsí₃'én₂?

23 ¿'E₂ guë'₂ chi₂jua'₂ ca₂jmo₃ Diú₄ le₂jaun₂,
 ia₁jaun₂ qui₃le₃ñi₅ dsa₂ a₂jláin'₁ a₂'uain'₂,

† 9:15 Éxodo 33:19. ‡ 9:17 Faraón: co₂'nió'₄ le₃jua'₅₄, rag₅₄ quián₅
 'uë₃ Egipto. § 9:17 Éxodo 9:16. * 9:20 Isaías 29:16; 45:9. † 9:21
 'Nio'₂ ja₁ton₅ 2 Timoteo 2:20.

a₂jme₂jnia₂₃ a₂ηéi₂ dsí₅ ja₁con₂ dsa₂ i₂ca₂jmói'₂
co₂jñia₅₄ të₃jñiá₅, ia₁jaun₂ tiin₅₄ jë₁tág₅ co₂'né'₅
quió'₅?

²⁴ Jniog₄ bá₄ 'éi₂ i₂ca₂tě'₃ Diú₄, on₃jua'₅₄ jmá'₃ jë₄
quió'₅ dsa₂ judíos; ján₃ bá₄ ca₂tě'₃ dsa₂ jë₄ quió'₅
dsi₂nau₂.

²⁵ Jui₁lia'₂ juá'₂ ne₄ si₂ quió'₅ Oseas:
Dsa₂ i₂tsá₃ jme₁lín₄ dsa₂ juig₂ quiáng₃,
ca₂tě₃ dsa₂ juig₂ quiáng₃;
ján₃ guë'₂ co₂'nió'₄ 'io₅₄ i₂tsá₃ jme₁'nióg₃,
ca₂tě₃ bá₄ jniá₂ a₂niói₃ guë₄ lin₃.‡

²⁶ Já₃n bá₄ juá'₂:
Co₂dsau₅ jaun₂ ja₁jme₁juá'₂ dsa₂
a₂tsá₃ lín'₅ 'nia'₂ dsa₂ quiáng₃,
ja₁jaun₂ nág'₁ 'nia'₂ a₂tě₂ dsa₂
a₂lín'₅ chi'₂-guein₂ quián₅ Diú₄ jén'₃.§

²⁷ La₁ të₂le₃ quió'₅ dsa₂ israelitas ně₃, ca₂juá'₂
Isaías a₂dsen₅₄ dsí₅: “Jui₁'a₂ guë₃ la₂ juin₅ lin₃ tsi₁jon₂
dsa₂ juig₂ Israel téin₅ jui₁lia'₂ tí₅ ti₁tsag₁ cha₂ chei'₅₄
jmi₁ñí'₄, la₁ me'₂ co₂ñí₂ bá₄ dsa₂ i₂juin₅ 'éi₂ tñ'₄.

²⁸ Ia₁ qui₃dsí₅ bá₄ Diú₄ 'éi'₃ ne₄ gua'₅₄ 'uë₃, jme₃ti₃
ca₂le₃jě₃ co₂ñei'₅₄.”*

²⁹ Jui₁lia'₂ ca₂juá'₂ 'ñiog₅ Isaías le₂jñiá₅:
Jua'₅₄ mei'₂ guë₃ Te₁gui'₅₄ Juig₅₄ 'Lióg₂
tsá₃ ca₂dsiain₃ tsi₁jon₂ dsa₂ go₂ jniog₄,
le₂jaun₂ bá₄ jme₁dsi₁ñág₂ jniog₄
jui₁lia'₂ ca₂i₃ñí₂ dsa₂ juig₂ Sodoma quian'₅₄ Go-
morra.†

Dsa₂ judíos quian'₅₄ jág₁ dse₃

‡ 9:25 Oseas 2:23. § 9:26 Oseas 1:10. * 9:28 Isaías 10:22-23.

† 9:29 Isaías 1:9.

30 ¿'E₂ le₃jua'₅₄ jniog₄ jaun₂ ně₃? Jui₁lia'₂ dsi₂nau₂
i₂tsá₃ jme₁'no'₂ jui₅ ja₁guei₃ Diú₄ ně₂jag₄ bá₄ a₂tsá₃
'e₂ dso₄ riin₂, 'éi₂ bá₄ ma₂lí'₂ jui₅ jaun₂, caun₂ jui₅
ja₁guéi'₂ Diú₄ ně₂jag₄ bá₄ a₂ca₂jme₃ti₃, tē₂le₃ a₂jñia'₅₄
con'₂ a₂'éin₂ bá₄.

31 La₁ dsa₂ juig₂ Israel guē'₂ ně₃, i₂jme₁tion'₅₄ 'Éi'₃
ia₁jaun₂ jme₁guéi'₂ Diú₄ 'uig₅₄ ia₁ a₂jme₂ti₃, lín₂, tsá₃
ca₂tió'₃ jme₃ti₃ 'Éi'₃ jaun₂.

32 ¿'E₂ lē₃? Ia₁ jme₁'no'₂ jui₅ ja₁guéi'₂ Diú₄
jaun₂, on₃jua'₅₄ tē₂le₃ quian'₅₄ a₂'éin₂, tē₂le₃ quian'₅₄
a₂jme₁jmo₂₃ guoin₅₄ bá₄. 'Uig₅₄ jaun₂ qui₂ca₂nió₃
bá₄ quian'₅₄ “N₁cang₁ a₂nió₅ dsa₂.”

33 Jui₁lia'₂ rē₂ton₅ ne₄ Si₂:

Ní₂ de'₂ 'nia'₂, tsin₅₄ jniá₂ jan₂ jē₄ juig₂ Sión
i₂lén₂ ně₂jag₄ ni₁cang₁ a₂qui₂nió₅ dsa₂,
ján₃ guē'₂ co₂'nió'₄ ni₁'lau₂
a₂jmo₃ dsi₂gan'₅₄ dsa₂;
jaun₂ jui₁lia'₂ i₂'én₂ le₃quió'₅ 'éi₂,
tsá₃ dsi₁ñí₂ o₂guí'₃.‡

10

1 Rin'₅₄ jniog₄, a₂'ín₅ dsi₃ 'ñio₅ lín₃, a₂chileng'₅₄
Diú₄ o₄quió'₄ dsa₂ israelitas, ia₁jaun₂ tñin'₄ bá₄.

2 Ia₁ jáng'₅ bá₄ jniá₂ jág₁ dsau₅ ja₁coin₂, a₂dsen₅₄
dsí₅ le₃quió'₅ Diú₄, la₁ia₁ on₃jua'₅₄ jaun₂ ñí'₂ dsí₅.

3 'Uig₅₄ ia₁ a₂tsá₃ ca₂tón'₃ jui₅ 'a₂ lia'₂ lē₅ jaun₂
a₂guéi'₂ Diú₄, jaun₂ qui₂'no'₂ jui₅ quió'₅ guoin₅₄ bá₄,
tsá₃ ca₂jme₃gó'₃ jui₅ a₂ca₂cuē₃ Diú₄.

‡ 9:33 Isaías 8:14; 28:16.

4 Ia₁ ca₂jme₃'ηia₅ I₂rē₂'ín₁ quián₅ Diú₄ 'Éi'₃,
ia₁jaun₂ guéi'₂ Diú₄ chi₂jua'₂ 'ein₂ i₂'én₂, nē₂ja₄
bá₄ a₂ma₂can₃ caun₂ jui₅ co₂dsau₅.

5 Ia₁ jui₁lia'₂ a₂guéi'₂ Diú₄ quió'₅ dsa₂ ia₁
a₂ca₂jme₃ti₃ 'Éi'₃, juá'₂ Moisés ne₄ Si₂: “Nē₁jua'₂
ca₂can₃ dsa₂ caun₂ jui₅ co₂dsau₅ lia'₂ con'₂ lē₅
chi₂quióng₂ jmi₄ Si₂ 'Éi'₃, tē₂le₃ quian'₅₄ 'Éi'₃ jaun₂
le₃chain₂.”*

6 La₁ jui₁lia'₂ jui₅ co₂dsau₅ a₂já₅ 'uig₅₄ ia₁ a₂'én₂
dsa₂, juá'₂ Si₂ le₂la₂: “Tsá₃ jua'₅₄ 'ne₂ tē₂le₃ jui₅
'au'₂: ¿'Ein₂ bá₄ lé₂ le₃uig₂ guei'₅₄ i₂juig₃?† —co₂'nió'₄
le₃jua'₅₄, ia₁jaun₂ sióin₂ I₂rē₂'ín₁ quián₅ Diú₄ ja₁con₂
jniog₄—;

7 on₃ guē'₂ jua'₅₄ 'ne₂ ján₃: “¿'Ein₂ bá₄ lé₂ le₃sión₃
ca₂tē₂ ja₁ca₂jein₃ chi₁dsio₅₄?”‡ —co₂'nió'₄ le₃jua'₅₄,
ia₁jaun₂ chóin'₂ táng₃ I₂rē₂'ín₁ quián₅ Diú₄, jin₄ 'lag₄.

8 ¿La₁ 'e₂ bá₄ guē'₂ juá'₂ Si₂?

Cong'₂ bá₄ 'nia'₂ 'ei₅ jág₁ la₂,

'i₄ mi₂'o'₅₄, quian'₅₄ jui₅ tē₂'au'₂,§
co₂'nió'₄ le₃jua'₅₄, jág₁ nē₅ bá₄ lē₅ jág₁ a₂'én₂ dsa₂
a₂qui₂'ě₅ jnia'₅₄ dsa₂:

9 Chi₂jua'₂ jmo'₂ jág₁ quian'₅₄ mi₂'o'₅₄ a₂lín₅ Jesús
Te₁gui'₅₄, ján₃ guē'₂ chi₂jua'₂ 'éng'₂ jui₅ tē₂'au'₂
a₂ca₂jme₃jein'₅₄ táng₃ Diú₄ a₂jme₁rē₂'lín₅₄, tíng'₄ bá₄.

10 Ia₁ tē₂le₃ jui₅ tē₂dsí₅ bá₄ dsa₂ rē₂'éin₂, ia₁jaun₂
guéi'₂ Diú₄ nē₂ja₄ bá₄ a₂ca₂jme₃ti₃; ján₃ guē'₂
le₂jaun₂ tē₂le₃ quian'₅₄ 'o₄ dsa₂ jmo₂₃ jág₁ ia₁jaun₂
tíin'₄ bá₄.

* 10:5 Levítico 18:5. † 10:6 Deuteronomio 30:12. ‡ 10:7
Deuteronomio 30:13. § 10:8 Deuteronomio 30:14.

11 Ne₄ Si₂ juá'₂: “Ju₁lia'₂ i₂'én₂ le₃quió'₅ 'éi₂, tsá₃ dsi₃ñí₂ o₂guí'₃.”*

12 Tsá₃ jma₃quén₅ jág₂ Diú₄ jíin₂ dsa₂ judíos quian'₅₄ guè'₂ dsa₂ griegos; ia₁ 'ñiog₅ bá₄ 'éi₂ lín₅ Te₁gui'₅₄ quián₅ ca₂le₃jín₃, ján₃ guè'₂ jme₂gu'₅₄ cuè₂₃ ca₂lia'₂ 'líong₂ a₂dse₃ quió'₅, cuè'₅ ca₂le₃jín₃ i₂chi₂léi'₂.

13 Ia₁ juá'₂ le₂la₂: “Ca₂le₃jín₃ i₂chi₂lí'₂ ne₄ Te₁gui'₅₄, tíin'₄ bá₄.”†

14 La₁, ¿'A₂ bá₄ lia'₂ lé₂ chi₃lí'₂ ne₄ jan₂ i₂tsá₃ ma₂ca₂rè₃'éin₂ le₃quió'₅? Ján₃ guè'₂, ¿'a₂ bá₄ lia'₂ le₃'én₂ dsa₂ le₃quió'₅ nē₁jua'₂ tsá₃ ma₂nág₂ guè'₂ 'ag₅ dsa₂ 'iin₂₃ 'éi₂? ¿'A₂ guè'₂ lia'₂ lé₂ nag₃ dsa₂ nē₁jua'₂ tsá₃ 'ein₂ chan₂ i₂'ě₂ jág₁ dse₃?

15 ¿'A₂ bá₄ lia'₂ lé₂ dsi₁lén₂ i₂'ě₂ jág₁ dse₃ nē₁jua'₂ tsá₃ 'ein₂ chei₅? Ju₁lia'₂ ma₂rè₂ton₅ ne₄ Si₂: “i'E₂ gué₄ jlá'₁ gu₂-tag₄ i₂quian₅ jág₁ dse₃!”‡

16 La₁ tsá₃ ca₂le₃jín₃ dsa₂ ca₂tón'₃ ju₁5 jág₁ dse₃. Ju₁lia'₂ ca₂juá'₂ táng₃ Isaías: “¿Te₁gui'₅₄ 'ein₂ bá₄ i₂ma₂ca₂rè₃'én₂ jág₁ a₂ca₂'ě₂ jniog₄?”§

17 Le₂nē₅ bá₄ jaun₂, ju₁lia'₂ a₂'én₂ dsa₂, lě₅ tē₂le₃ quian'₅₄ a₂nag₅ dsa₂; a₂nag₅ dsa₂ jaun₂, lě₅ tē₂le₃ quian'₅₄ jág₁ quió'₅ I₂rē₂'ín₁ quián₅ Diú₄.

18 La₁ ñag₄ jniá₂, ¿O₃ bá₄ tsá₃ ca₂nág₂ dsa₂ jág₁ dse₃? jMa₁ tē₃dson'₂ bá₄ ca₂nág₂! Ia₁ juá'₂ Si₂:

Ta₁caun₂ gua'₅₄ 'uē₃ bá₄ ca₂dsia₃ dsa₂;

ca₂le₂con₂ quióng₄ mi₂güíng₃ bá₄

ma₂ca₂i₃'ág₃ jág₁ quió'₅.*

* 10:11 Isaías 28:16. † 10:13 Joel 2:32. ‡ 10:15 Isaías 52:7.

§ 10:16 Isaías 53:1. * 10:18 Salmo 19:4.

- 19 La₁ ηα₄ táng₃ jniá₂, ¿O₃ bá₄ a₂tsá₃ ma₂ca₂rē₃lí₄
'e₂ dsa₂ juig₂ Israel? Ia₁ jē₁le₂'uig₅₄, juá'₂ Moisés:
jmo₅₄ jniá₂ a₂lén'₂ 'nia'₂ dsa₂ i₂dsí'₅
ja₁con₂ dsa₂ i₂tsá₃ juig₂ nación lín₅;
ján₃ bá₄ jmo₅₄ jniá₂ le₃'ne'₂ 'nia'₂
o₄quió'₄ caun₂ juig₂ i₂tsá₃ ηí'₂ dsí'₅.†
- 20 Con'₂ siá'₂, tiá₂ dsí'₅ Isaías a₂juá'₂, o₄quió'₄ Diú₄:
Dsa₂ i₂tsá₃ jme₁'nau'₂ jniá₂,
ca₂dsáu'₂ bá₄;
ca₂jme₁jnia₅ jniá₂
ja₁con₂ dsa₂ i₂tsá₃ jme₁ηα₅ jniá₂.‡
- 21 La₁ia₁ dsa₂ israelitas bá₄ jme₁tsí'₅ Isaías,
jme₁ca₂juá'₂: “Tē₁ne₁ jmig₄ bá₄ jme₁chén'₄ jniá₂
chi₁jan₁₂ cu₃ja₁con₂ juig₂ cang₄ mi₂dsi₄ i₂tsá₃ ne'₅₄.”§

11

Dsa₂ Israel i₂tín'₄

1 Jaun₂ ně₃ ηα₄ jniá₂, ¿O₃ bá₄ ma₂chen'₃ cau₅ Diú₄
dsa₂ juig₂ Israel quiáin₅? ¡On₃jua'₅₄ le₂jaun₂! Ia₁
'ηió₃ bá₄ jniá₂ líng₅ jan₂ dsa₂ israelita, jan₂ chi'₂ dsio₄
Abraham, jan₂ tsi₁jon₂ Benjamín.

2 Ca₂le₂jniá₅ ma₂líg'₂ lín₃ bá₄ ca₂quión'₂ Diú₄ dsa₂
juig₂ quiáin₅; jaun₂ rē₂ně₃ ně₃ tsá₃ jua'₅₄ ma₂ca₂téi₂.
¿Tsa₁ ηi'₅₄ 'nia'₂ 'a₂ lia'₂ juá'₂ ne₄ Si₂ ja₁'iin₂₃ Elías, 'a₂
lia'₂ ca₂chi₃lén'₂ Diú₄ a₂ca₂'ni₃ dsa₂ Israel? Ca₂juá'₂:

3 “Te₁gui'₅₄, ma₂ca₂jme₃dsian₅ bá₄ dsa₂, dsa₂
i₂jme₁'ě₂ jág₁ quiáng'₂, ma₂qui₂ma₂'éin₂ ne₄chei₂
quiáng'₂ ně₃; jnia'₅₄ lia'₂ jan₂ jniá₂ bá₄ chang₂ guě₄,
qui₂co₂'ein₅ dsa₂, ján₃ guě'₂ 'nio₃ jηα₃’.”*

† 10:19 Deuteronomio 32:21. ‡ 10:20 Isaías 65:1. § 10:21 Isaías
65:2. * 11:3 1 Reyes 19:10,14.

4 Jaun₂, ¿'E₂ jág₁ ca₂jéin'₃ Diú₄? “Ma₂ca₂tsón₃ jniá₂ guion₃ mei₅ dsa₂ të₂le₃ quió₃ i₂tsá₃ ma₂qui₂ca₂jón'₂ m₁2jne₄ ne₄ Ba'al.”†

5 Jaun₂ le₂në₅ bá₄ ján₃ rë₂tsón₂ ca₂dsion₄ dsa₂ 'éi₂ rë₂në₃, jaun₂ Diú₄ në₃ të₂le₃ ia₁ a₂'ua₁ dsí₅ ma₂quióin'₂ 'éi₂.

6 Chi₂jua'₂ të₂le₃ ia₁ a₂'ua₁ dsí₅ Diú₄, on₃jua'₅₄ jaun₂ ia₁ a₂jmo₅ dsa₂ 'e₂ jmo₂₃. Ia₁ jua'₅₄ mei'₂ guë₃ le₂në₅ në₃, tsá₃ le₃jua'₅₄ jua'₅₄ a₂'ua₁ dsí₅ Diú₄.

7 ¿'E₂ jaun₂ në₃? Tsá₃ ca₂tió'₃ dsa₂ juig₂ Israel dsio'₂ a₂jme'₁no'₂, la₁ dsa₂ i₂ca₂quióin'₂ Diú₄ 'ñiog₅ bá₄ ca₂dsáu'₂. I₂sián'₂ guë'₂ qui₂ca₂rë₃'uá'₃ dsí₅,

8 ju₁lia'₂ juá'₂ ne₄ Si₂:
Ca₂jmo₃ Diú₄ a₂le₃tín₄ dsa₂ 'éi₂ le₃quió'₅ jme₂dsí₂;
ca₂cuë₃ mi₂ne₅₄ a₂tsá₃ jniá₂,
ca₂cuë₃ rë₂gua₅₄ a₂tsá₃ nag₅,
le₂jñi₄ jmi₄g₄ në₃.‡

9 Já₃ bá₄ ca₂juá'₂ David:
Ca₂le₃jě₃ a₂i₂tsón₃ jme₁cha₂ quió'₅
ju₁le₅₄ co₂'nió'₄ tsí₁liá₂ o₃ 'má₅ 'e₂,
ia₁jaun₂ qui₃nió₃, gue₃ 'liain'₅₄.

10 Ju₁le₅₄ tsá₃ jnió'₅ mi₂ne₅₄
ju₁guen'₅₄ mi₂ca'₅₄ co₂ñei'₅₄.§

Dsi₂nau₂ i₂tín'₄

11 Nag₅ jniá₂ në₃, ¿O₃ bá₄ co₂ñei'₅₄ con'₂ ca₂sén'₂ jaun₂ bá₄ dsa₂ judíos jme₁ca₂nió₃? ¡On₃jua'₅₄ le₂jaun₂! Të₂le₃ jen₅ bá₄, jme₁ca₂i₃lén₂ dsa₂ judíos ca₂i₁jui_{in}₅₄, ca₂jmo₃ Diú₄ a₂ca₂dsó'₂ dsí₂nau₂ ju₁5 ja₁tín'₄, ia₁jaun₂ le₃dsí'₅ 'éi₂.

† 11:4 1 Reyes 19:18. ‡ 11:8 Deuteronomio 29:4; Isaías 19:10.

§ 11:10 Salmo 69:22-23.

12 La₁ chi₂jua'₂ a₂ca₂i₁juin₅₄ 'éi₂ jaun₂, ca₂dsióg₃ tē₂le₃ dse₃ bá₄ o₄quió'₄ dsa₂ mi₂güí₃, já₃ bá₄ chi₂jua'₂ a₂ca₂i₃'én₂ quió'₅ 'éi₂, ca₂dsióg₃ a₂tē₁dsi₅₄ quió'₅ dsi₂nau₂, i'e₂ guě₄ dse₃ lé₂, jē₁ma₂ca₂rē₃'ñia₅ táng₃ 'éi₂!

13 La₁ a₂juá'₅ jniá₂ juí₂'nia'₂ i₂lín'₅ dsi₂nau₂: Ia₁ dsón'₂ lín₅ jniá₂ jan₂ dsa₂ i₂chen₄ ja₁con₂ dsi₂nau₂, jmo₅ jniá₂ dsi₃ 'ñio₅ lín₃ dsen₅₄ ta₁ quió',

14 con'₂ tsá₃ ñó₅ ně₁jua'₂ ca₂rē₃dsi'₅ dsa₂ go₃ jniá₂ ja₁con'₂ 'nia'₂, jaun₂ lé₂ líón₂ i₂lín₅₄ 'éi₂.

15 Chi₂jua'₂ jme₁ca₂téi₂ Diú₄ quió'₅ dsa₂ judíos, ca₂lí₃ dsa₂ mi₂güí₃ a₂ca₂'ág₂ caun₂ já₁ quian'₅₄ Diú₄, ¿'e₂ bá₄ lé₂ jaun₂ ně₃ jē₁ma₂tē₂ rē₁guéi'₂ Diú₄ quió'₅ dsa₂ 'éi₂? Lé₂ co₂'nió'₄ ca₂gue₃ táng₃ jme₂dsi₂ dsa₂ i₂jme₁ma₂rē₂'lín₄.

16 Chi₂jua'₂ lě₅ 'í₁ ju₁lia'₂ i₁ñí'₄ a₂le₂'uig₅₄ a₂jén'₅ dsa₂ ne₄ Diú₄, já₃ bá₄ le₂jaun₂ lě₅ 'í₁ ta₁jē₂ ti₁can₁; já₃ bá₄ chi₂jua'₂ lě₅ 'í₁ le₃quió'₅ Diú₄ ju₁lia'₂ jmú₄ caun₂ ni₁'ma₂, já₃ bá₄ le₂jaun₂ lě₅ 'í₁ ni₁gu'₂ nei'₅₄ ni₁'ma₂ já₃.

17 Dsa₂ judíos i₂ca₂téi₂ Diú₄ 'éi₂ ně₃, lín₅ co₂'nió'₄ gu'₂-nei'₅₄ ni₁'ma₂ olivo a₂chein'₅₄, a₂ca₂uín'₂ a₂lín₅₄ ni₁gu'₂; ně₃ ně₃, chi₂jua'₂ lín'₅ 'ne₂ jan₂ dsi₂nau₂ i₂ma₂rē₂'líón₅, ně₂jag₄ bá₄ caun₂ ni₁gu'₂ olivo a₂cha₂ ja₁nau₂, ma₂qui₂ma₂guión'₃ jmi'₅₄ ni₁'ma₂ olivo a₂qui₂jme₂tan₅₄ ni₁gu'₂,

18 tsá₃ jmó'₂ táng'₅ ja₁con₂ ni₁gu'₂ siá'₂. Chi₂jua'₂ le₂jaun₂ jmó'₂, dsá₂ 'au'₂ jmo₄, on₃jua'₅₄ 'ne₂ jme₂tang'₅₄ jmú₄; jmú₄ bá₄ jme₂tau₅₄ 'ne₂.

19 Mei'₂ tsá₃ le₃ñag'₅₄ 'ne₂, jaun₂ ně₃: “Ján₅, dsau₅ bá₄ ně₅. La₁ia₁ a₂ca₂uín'₂ ni₁gu'₂ jaun₂ ia₁jaun₂ lén₂

jniá₂ jan₂ i₂rē₂ 'lión₅ ja₁jme₁ca₂tín₂.”

20 Dse₃, la₁ ca₂uín'₂ ni₁gu'₂ jaun₂ 'uig₅₄ ia₁ a₂tsá₃ jme₁'éin₂, la₁ 'ne₂guē'₂ ně₃tē₂'niág'₄ 'uig₅₄ ia₁ a₂'éng'₂. Le₂ně₅ bá₄ jaun₂, ju₁le₁gan'₃ 'nia'₂, tsá₃ lē₁jmo₂ róng'₂.

21 Ia₁ chi₂jua'₂ tsá₃ ca₂dsia₃ Diú₄ ηéi₂ dsí₅ ja₁con₂ ni₁gu'₂ quió'₅ tē₃dsón'₂ ni₁'ma₂ jaun₂, ján₃ bá₄ le₂jaun₂ tsá₃ dsia₃ ηéi₂ dsí₅ ja₁con'₂ 'ne₂ ján₃.

22 Jag₄ jaun₂, 'e₂ guē₄ dsen₃ Diú₄, la₁ ján₃ bá₄ rē₂ qui₂dsi₂₃ 'éi'₃. Ia₁ ma₂qui₂dsi₂₃ 'éi'₃ ja₁con₂ i₂ma₂ca₂sén'₂, la₁ dsein₃ bá₄ quian'₅₄ 'ne₂, chi₂jua'₂ caun₂ náu'₁ tiá₂jui₅ja₁'ua₁ dsí₅ Diú₄. Ia₁ nē₁jua'₂ tsá₃ le₂jaun₂, ján₃ bá₄ quéin'₂ 'ne₂.

23 Ju₁lia'₂ 'éi₂ ně₃, nē₁jua'₂ ca₂rē₃'éin₂ táng₃, lé₂ bá₄ le₃'lión₃. Ia₁ 'io₅ Diú₄ bí₂ chón₃'g'₃ táng₃.

24 Ia₁ nē₁jua'₂ 'ne₂, jan₂ dsí₂nau₂, co₂'nió'₄ caun₂ ni₁gu'₂ nau₂, ca₂queng'₃ dse₃ quian'₅₄ ni₁'ma₂ olivo a₂chein'₅₄, o₁n₁ja'₅₄ líng'₅ ni₁gu'₂ ni₁'ma₂ siá'₂, j'e₂ guē₄ tson₂ lé₂ le₃quen'₃ 'éi₂, i₂lín₅ co₂'nió'₄ ni₁gu'₂ a₂caun₂ ne₅₄ quian'₅₄ ni₁'ma₂ olivo jaun₂!

A₂tín'₄ dsa₂juig₂ Israel

25 Rin'₅₄ jniog₄, tsá₃ 'nio₃ jniá₂ jua'₅₄ tsá₃ ηi'₅₄ 'nia'₂ jág₁ a₂jme₁rē₂'ma₄ la₂, con'₂ tsá₃ ηó₅ nē₁jua'₂ ca₂jmo'₅₄ 'nia'₂ róng'₂ quian'₅₄ a₂ηí'₂ 'au'₂ 'nia'₂ guiong'₅₄. Ju₁lia'₂ ma₂jmo₃ i₂lín₅₄ dsa₂juig₂ Israel, ca₂rē₃'uá'₃ dsí₅, ca₂lia'₂ ca₂rē₃'ηia₅ dsí₂nau₂ i₂con'₂ ca₂tín₂ tón'₃.

26 Jaun₂ guē₄ lión₂ ca₂le₃jín₃ dsa₂juig₂ Israel, ia₁ juá'₂ ne₄ Si₂:

O₃'in₅ dsa₂ i₂lió₂ juig₂ Sión,*

co₂dsia₅ jñiá'₂ a₂tsá₃ dse₃ jmo₅ tsi₁jon₂ Jacob.

27 Jaun₂ a₂la₂ bá₄ jág₁ quió'₃ jmo₅₄ quiang'₅₄ dsa₂ 'éi₂:
jē₁ma₂tē₂ rē₁'éng₄ dsáu₁.†

28 Jui₁lia'₂ tē₂le₃ quian'₅₄ jág₁ dse₃ a₂lión₂ dsa₂,
lín₅ co₂'nió'₄ dsa₂ i₂'ñia₅₄ Diú₄, o₄quián'₂ 'nia'₂; la₁
lia'₂ ma₂'nio₃ jaun₂ bá₄ Diú₄ quió'₅ dsa₂ 'éi₂, ia₁
a₂ca₂quióin'₂ dsa₂ can'₅₄ quiáin₅ ma₂líg'₂.

29 Ia₁ tsá₃ dsí₂quén'₅ dsí₅ Diú₄ jui₁lia'₂ a₂cuē₂₃, on₃
guē'₂ jui₁lia'₂ a₂tē₂.

30 Jui₁lia'₂ 'nia'₂ ně₃, i₂tsá₃ jme₁ne'₅₄ ja₁con₂ Diú₄
le₂jñiá₅, ma₂ca₂tín'₂ 'nia'₂ a₂ñéi₂ dsí₅ Diú₄ rē₂ně₃,
'uig₅₄ ia₁ a₂tsá₃ ne'₅₄ dsa₂ 'éi₂,

31 ján₃ bá₄ le₂ně₅ tsá₃ ne'₅₄ dsa₂ 'éi₂ rē₂ně₃, ia₁jaun₂
tē₂le₃ quian'₅₄ a₂ñéi₂ dsí₅ Diú₄ a₂ca₂tín'₂ 'nia'₂, tñin₅₄
ján₃ a₂ñéi₂ dsí₅ Diú₄.

32 Ia₁ Diú₄ ně₃ co₂rē₂ bá₄ 'in₃ dsa₂ a₂tsá₃ ne'₅₄ dsa₂
le₂jain₂ le₂jain₂, ia₁jaun₂ co₂dsia₅ bá₄ dsia₃ ñéi₂ dsí₅
ja₁con₂ ca₂le₃jín₃.

33 ¡'E₂ guē'₄ 'ñio₅ 'ei₄ lē₅ ca₂le₃jě₃ a₂jlá'₁ cha₂ quió'₅
Diú₄,

ca₂le₃jě₃ a₂ñí'₂ dsí₅, a₂ñi₅ ně₃!

Ca₂lia'₂ tsá₃ lé₂ le₃quiong₅₄ 'í₁ a₂niog₅ dsí₅,
on₃ guē'₂ lé₂ le₃ñág'₂ dsí₅ jui₅ quió'₅.

34 “¿'Ein₂ bá₄ cuí'₅ 'e₂ dsí₂jio₅ dsí₅ Te₁gui'₅₄,
o₃ 'ein₂ i₂ma₂tió'₃ cuē₃ jág₁ dse₃ cuē'₃ 'éi₂?”‡

35 “¿'Ein₂ bá₄ ca₂cuē₃ 'e₂ ca₂cuē'₃ 'éi₂ le₂'uig₅₄
ia₁jaun₂ jéin'₃ quí₃ quió'₅?”§

* **11:26** Sión: co₂'nió'₄ le₃jua'₅₄, juig₂ Jerusalén. † **11:27** Isaías
59:20-21; 27:9. ‡ **11:34** Isaías 40:13. § **11:35** Job 41:11.

36 Ia₁ ca₂le₃jě₃ a₂niog₅ cha₂, ca₂lě₃
 ja₁con₂ 'éi₂, tē₂le₃ quian'₅₄ 'éi₂, o₄quió'₄ 'éi₂ ně₃.
 jju₁jme₂juag'₂ bá₄ dsa₂ co₂tan₅₄! A₂méi₃.

12

A₂ lia'₂ i₂nio₄ dsa₂ i₂rě₂tson₄ quián₅ Diú₄

¹ Le₂ně₅ bá₄ jaun₂ rin'₅₄ jniog₄, tē₂le₃ quian'₅₄
 a₂ńéi₂ dsí₅ Diú₄, mi₅ jniá₂ ne'₅₄ 'nia'₂, co₂dsia₅ jin'₄
 'nia'₂ ni₁ńi'₁ guiong'₅₄, co₂'nió'₄ a₂rě₂jeng'₅₄ le₁jén'₃
 ne₄ Diú₄, a₂rě₂tsong'₅₄, a₂'ńio₂ dsí₅ Diú₄, a₂dsi₂ten₅₄
 jme₁ti'₄ ne₅₄.

² Tsá₃ i₁nio'₄ 'nia'₂ lia'₂ con'₂ lě₅ i₂nio₄ dsa₂ mi₂güí₃
 la₂. Tē₂le₃ cuē₄ jmig₄ a₂jme₃tsín₃ Diú₄ 'a₂ lia'₂
 qui₂dsi₂jńia₅ 'au'₂ 'nia'₂, ia₁jaun₂ bá₄ quile₃'mag'₂
 táng₃ 'au'₂, ia₁jaun₂ lé₂ le₃caun'₅₄ 'nia'₂ 'í₁ 'a₂ lia'₂ lě₅
 a₂'ńio₂ dsí₅ Diú₄, a₂dse₃, a₂tě₅ dsí₅, a₂rě₂'ńia₅ ně₃.

³ Ia₁ o₄quió'₄ a₂'ua₁ dsí₅ Diú₄ a₂ma₂dsia₃ gu₃
 jniá₂, juí₂ jniá₂ le₂jan'₂ le₂jan'₂ 'nia'₂: tsá₃
 lě₁ju₁qui₂dsi₂jńia₅ 'au'₂ a₂líng'₅ dseng'₅₄ ńag₅₄
 guě₄ con'₂ ca₂tín'₂ 'nia'₂ dsí₃jńia₅ 'au'₂; tē₂le₃
 ju₁qui₂dsi₃jjiog₅ bá₄ 'au'₂ a₂'en₅₄ 'au'₂ 'nia'₂, 'a₂ con'₂
 tí₅ ma₂ca₂rě₃'én'₂ 'nia'₂ a₂ma₂cuē₃ Diú₄.

⁴ Ia₁ le₂ně₅ ju₁lia'₂ lě₅ caun₂ ni₁ńi₁ jniog₄ le₂jau₂
 le₂jau₂, 'líong₂ a₂chei₂ le₂caun₂ le₂caun₂ a₂tén₅
 quió'₅, tsá₃ ca₂ne₅₄ ta₁ jme₂ti₃,

⁵ le₂ně₅ bá₄ jniog₄ ján₃, ju₁'a₂ guě₃ la₂ juag₅ jniog₄,
 caun₂ bá₄ ni₁ńi₁₂ jniog₄ lág₅ le₃quió'₅ Cristo, téi₅
 jniog₄ le₂jau₂ le₂jau₂ quian'₅₄ rin'₅₄.

⁶ Jma₃quén₅ bá₄ qui₂'au₂ jniog₄ bí₂, lia'₂ con'₂ lě₅
 ma₂cuē₃ Diú₄ a₂'ua₁ dsí₅. Jaun₂ ca₂tág₂ jniog₄ jmo'₄
 ta₁ ju₁bí₂ a₂ma₂cuē₃. Ju₁lia'₂ dsa₂ i₂ma₂cuē₃ Diú₄ bí₂

a₂t̄in₂ a₂ě₂ jág₁ dse₃ a₂gue₂₃ quió'₅ Diú₄, ju₁i'ě₅₄ bá₄ jág₁ 'a₂ con'₂ ti₅ a₂éin₂;

⁷ ju₁i'lia'₂ i₂ma₂cué'₃ ju₁i'bí₂ jme'₃o₅₄, ju₁i'jme'₂o₅₄; ju₁i'lia'₂ i₂'io₅ bí₂ jme₃tag₂₃, ju₁i'jme₂t̄in₂₃ bá₄ dsa₂;

⁸ ju₁i'lia'₂ i₂t̄in₂ jmo₃ lián'₂ dsí'₅ i₂sián'₂, ca₂t̄in₂ bá₄ jmo₃ le₂jaun₂; ju₁i'lia'₂ i₂jmo₅ dsióg₁, ju₁i'cué'₁₂ a₂'ua₁ dsí'₅, on₃jua'₅₄ rē'₂ cha₂ a₂'ín₂ dsí'₅ 'ñiog₅; ju₁i'lia'₂ i₂quian₅ ne₄ ju₁i'₅, ju₁i'jmo₁₂ bá₄ a₂dse_{n54} dsí'₅; ju₁i'lia'₂ i₂dsia₅ ñéi₂ dsí'₅, ju₁i'jmo₁₂ bá₄ quian'₅₄ o₂'ñi₃ o₂jñia₃ dsí'₅.

'A₂ lia'₂ ca₂t̄in₂ le₃chan₂ dsa₂ quián₅ Cristo

⁹ Ju₁i'le₂chan'₂ 'nia'₂ tē₃dsón'₂ bá₄ a₂'nió'₃ 'nia'₂ ríng'₂ le₂jang'₂ le₂jang'₂. Co₂dsia₅ jmo₄ 'nia'₂ 'ñiag'₅₄ co₂ñei'₅₄ a₂'lig'₅₄; chan'₂ bá₄ 'nia'₂ tiá₂ ju₁i'lia'₂ a₂dse₃.

¹⁰ Jme'₁nió'₄ 'nia'₂ ríng'₂ a₂'ñio₂ 'au'₂; jmo₄ 'nia'₂ a₂dse_{n54} guē₄ ríng'₂ le₂jang'₂ le₂jang'₂.*

¹¹ Tsá₃ jmo₂ 'nia'₂ juíng'₅, 'ag₃ caun₂-t̄in₃ 'au'₂, tē₂le₃ jme₁ti₁ ne₄ Te₁gui'₅₄ ca₂lia'₂ dse_{n54} jme₂dsí₂ quiáng'₂.

¹² Ju₁i'chan'₂ 'nia'₂ o₂jñia₃ 'au'₂, ia₁ ma₂lē₅ bá₄ co₂jñia₅₄ a₂'ín₂ 'au'₂ 'nia'₂. Jmo₄ 'nia'₂ ju'ín₂ 'au'₂ jmig₄ jme₁chan'₂ 'nia'₂ o₂i₁ dsí₅. O₁nió'₄ bá₄ 'nia'₂ co₂tan₅₄ a₂chi₂leng'₅₄ Diú₄.

¹³ Jme'₁on₁ 'nia'₂ dsa₂ 'én₂ ríng'₂ chi₂jua'₂ 'e₂ niog₅ cha₂ a₂'nió'₅ quió'₅. Dse₃ guen₅₄ 'nia'₂ ju₁i'lia'₂ 'ein₂ niog₅ qui₂dsi₂jag₅₄ 'nia'₂.

¹⁴ Jme₁gu'₅₄ bá₄ 'nia'₂ ju₁i'lia'₂ i₂jmóg'₂. Jua'₅₄ bá₄ 'nia'₂ jág₁ dse₃ on₃jua'₅₄ jág₁ uig₅.

* **12:10** o₃, "jme₁li₅₄ tē₃jñiá₅ a₂jme₂gan'₃ 'nia'₂ ríng'₂ le₂jang'₂ le₂jang'₂."

15 Jmo₄ 'nia'₂ 'io'₂ quian'₅₄ ju₁lia'₂ i₂jmo₅ 'io'₂; ján₃ gué'₂ qui'₂-o₄ 'nia'₂ quian'₅₄ i₂'o₅.

16 Ju₁le₂chan'₂ bá₄ 'nia'₂ a₂jeng'₂ le₂jang'₂ le₂jang'₂. Tsá₃ jmo₂ 'nia'₂ róng'₂, co₂rín'₂ bá₄ 'nia'₂ jmo₄ quiang'₅₄ dsa₂ te₂ŋé₂. Tsá₃ lē₁jmo₂ 'nia'₂ jua'₅₄ a₂ŋí₄ lē₃ cuing'₂.

17 Tsá₃ jein'₅₄ 'nia'₂ 'lig'₅₄ quian'₅₄ a₂'lig'₅₄. Quen'₂ 'nia'₂ bí₂ jmó'₂ con'₂ dsi₂ten₅₄ ja₁tē₃ ne₄ ca₂le₃jín₃.

18 Jmo₄ 'nia'₂ bí₂, 'a₂ con'₂ ca₂tíng'₂, 'a₂ con'₂ ja₁qui'₅₄ 'nia'₂ jmíg₄, 'nau'₅₄ 'nia'₂ ju₁ ja₁'ag₃ tei₄ quian'₅₄ ca₂le₃jín₃.

19 Rín'₅₄ jniog₄, tsá₃ lē₁jen'₅₄ 'nia'₂ guiong'₅₄ ju₁lia'₂ quió'₅ i₂jmóg'₂, tē₂le₃ dsia₄ 'nia'₂ o₄gú₃ Diú₄ a₂jaun₂. Ia₁ ma₂rē₂ton₅ ne₄ Si₂: “Jniá₂ bá₄ ca₂tíng₂ jein'₅₄ uig₅; jniá₂ bá₄ qui₄, juá'₂ Te₁gui'₅₄.”†

20 La₁: “Chi₂jua'₂ i₁cón'₅ ju₁lia'₂ dsa₂ i₂'iog₅₄, cué'₅₄ bá₄ 'nia'₂ a₂guě'₃. Chi₂jua'₂ ŋi₂₃ rē₂quein₂ dsí₅, cué'₅₄ a₂'ín'₂. Ia₁ jē₁ma₂ca₂jmo'₅₄ le₂nē₅, jmai'₅₄ tsá₃ dséi₂ dsi₂ne₅₄;‡ jéin'₄ o₂guí'₃.”§

21 Tsá₃ cuín₅ jmíg₄ jua'₅₄ a₂jo₃ a₂'lig'₅₄; tē₂le₃ quen'₂ bí₂, tión₃ 'uē₃ a₂'lig'₅₄ tē₂le₃ quian'₅₄ a₂dse₃.

13

1 Ca₂le₃jín₃ bá₄ ca₂tín₂ tón'₃ 'éi'₃ quió'₅ dsi₂tan₅₄ i₂gon₂. Ia₁ 'i₁jan₂ dsi₂tan₅₄ i₂chan₂, jua'₅₄ tsá₃ ca₂chei'₃ Diú₄. Jaun₂ ca₂le₃jín₃ dsi₂tan₅₄ i₂chan₂ nē₃, i₂dsián₁ quián₅ Diú₄ bá₄ 'éi₂.

† 12:19 Deuteronomio 32:35. ‡ 12:20 lit. “jmó'₂ nio₃ n₁ta'₂ le₁gui'₂ si₂ ne₄ mi₂dsi₅₄.” § 12:20 Proverbios 25:21-22.

2 Jaun₂ le₂nē₅, ju₁lia'₂ i₂nau₂ quen₅ ja₁con₂ dsi₂tan₅₄, nau₂ quein₂₃ ja₁con₂ i₂dsián₁ quián₅ Diú₄ bá₄. Jaun₂ gue₃ uig₅ ju₁lia'₂ i₂jmo₅ le₂jaun₂.

3 Ia₁ tsá₃ ta₁ jaun₂ dsián₄ dsi₂tan₅₄ a₂jmo₃ gó'₅ ju₁lia'₂ i₂jmo₅ a₂dse₃; a₂jmo₃ gó'₅ dsa₂ i₂jmo₅-dsá_u₅ a₂'lig'₅₄ bá₄. ¿'Niog'₂ 'ne₂ le₃chang'₂ a₂tsá₃ gang'₃ dsi₂tan₅₄? Jmo₄ bá₄ a₂dse₃, jaun₂ con₂ 'í₁ dsi₂tan₅₄ ja₁cong'₂, a₂líng'₅ dsa₂ dsen₃.

4 Ia₁ ta₁ jaun₂ tián'₅ jme₂ti₃ ne₄ Diú₄ bá₄, a₂dse₃ quiáng'₂. La₁ nē₁jua'₂ ca₂jmo'₅₄ a₂'lig'₅₄ ně₃, ca₂tíng'₂ le₃gang'₃, ia₁ on₃jua'₅₄ a₂lē₁lē₄ 'io₅ dsi₂tan₅₄ 'éi'₃ a₂chain₂ bí₂ cuē₃ uig₅. Jan₂ i₂jme₂ti₃ ne₄ Diú₄ bá₄ 'éi₂, a₂'ě₂ uig₅ ja₁con₂ dsa₂ i₂jmo₅ a₂'lig'₅₄.

5 Jaun₂ lě₃, tion₅₄ bá₄ 'nió'₅ tón'₃ dsa₂ 'éi'₃ quió'₅ dsi₂tan₅₄, on₃jua'₅₄ rě'₂ a₂jñia'₅₄ ia₁jaun₂ tsá₃ gue₃ uig₅; tē₂le₃ ia₁ a₂lē₅ dsí₅ le₂jaun₂ jmo₂₃ a₂dse₃.

6 'Uig₅₄ nē₅ bá₄ quí'₂ 'nia'₂ 'lia'₅₄ a₂ca₂tín₂ dsi₂tan₅₄, ia₁ ca₂ne₅₄ jme₂ti₃ dsi₂tan₅₄ ta₁ a₂lín₅ ne₄ Diú₄.

7 Cuē'₅₄ bá₄ 'nia'₂ dsa₂ 'e₂ niog₅ qui₂ca₂tín₂. Chi₂jua'₂ ca₂tín₂ dsi₂tan₅₄ 'lia'₅₄, qui₄ 'lia'₅₄; chi₂jua'₂ ca₂tín₂ mi₃ cu₄ te₁'éng'₂, cuē'₅₄ cu₄ jaun₂; chi₂jua'₂ 'ein₂ ca₂tín₂ jme₃go₃ dsa₂, jme₁gan₃ bá₄ 'éi₂; chi₂jua'₂ 'ein₂ ca₂tín₂ jme₃juag'₂ dsa₂, jme₁juin'₂ bá₄.

8 Ja₁con₂ 'i₁jan₂ tsá₃ ju₁le₅₄ jua'₅₄ cha₂ a₂qui₂le₂rín'₂ 'nia'₂ uě₂, jñia'₅₄ lia'₂ a₂qui₂le₂ríng'₂ a₂'nióg'₃ ríng'₂ le₂jang'₂ le₂jang'₂ bá₄; ia₁ ju₁lia'₂ i₂'nio₃ dsa₂ mi₂güí₃ rín'₅₄, ma₂ca₂jme₃ti₃ 'Éi'₃ quió'₅ Diú₄.

9 Juá'₂ 'Éi'₃ quió'₅ Diú₄: “Tsá₃ nióg'₄ jág₁ quian'₅₄ i₂tsá₃ lín₅ dsi₂i₂gog'₂; tsá₃ jñíg'₄ dsa₂ mi₂güí₃ ríng'₂;

tsá₃ 'áng'₁; tsá₃ jmó'₂ jág₁ tē₂jág₁; tsá₃ jmó'₂ 'ín₅
'au'₂ a₂quió'₅ i₂sián'₂."* 'Éi'₃ nē₅ quian'₅₄ guē₄
ca₂le₃jě₃ 'éi'₃ siá'₂ ně₃, qui₂rē₂tan₅₄ quian'₅₄ jág₁
la₂: "Jme₁'nió₄ dsa₂ mi₂güig₃ ríng'₂ ju₁lia'₂ 'nióg'₃
'ñiag'₂."†

10 Ju₁lia'₂ dsa₂ i₂'nio₃ dsa₂ mi₂güig₃ rin'₅₄, tsá₃ 'e₂
'lig'₅₄ jmo₂₃ ja₁coin₂. Le₂nē₅ bá₄ jaun₂ ja₁'nio₃ dsa₂
rin'₅₄, co₂'nió'₄ ca₂rē₃ti₃ bá₄ 'Éi'₃ quí'₅ Si₂.

11 Jē₄ ca₂le₃jě₃ a₂nē₅ ně₃, jmo₄ a₂ñí'₂ 'au'₂ ju₁lia'₂
jmig₄ chong₂ rē₂ně₃, a₂ma₂ca₂tě₂ hora a₂ñé₂ jniog₄
jē₄ le₁guág₃. Ia₁ jē₁lió₂ jniog₄ caun₂ ma₂ja₂quián₃
co₂ñí'₂ bá₄ rē₂ně₃ lia'₂ con'₂ guē₄ jme₁ca₂rē₃'éin₂
jniog₄ le₂'uig₅₄.

12 Ju₁lia'₂ jē₄ 'uē₂ la₂ caun₂ qui₂dsi₂juin₅₄ bá₄;
caun₂ ma₂ja₂quián₃ jnia₅₄ bá₄. 'Uig₅₄ jaun₂ bá₄
ca₂tág₂ jniog₄ tí₄ a₂tsá₃ ma₃jmó'₁ ju₁lia'₂ a₂lě₂ jē₄
qui₁né'₃, a₂quián₁ qui'₅₄ ca₂le₃jě₃ a₂'nió'₅ quián₂,
a₂jmo₅ 'í₁, a₂i₁nió₁ ju₁lia'₂ 'lióg₂ i₂i₂nió₄ jē₄ jniá₂ si₂.

13 Ju₁i₁nió₁ jniog₄ lia'₂ con'₂ dsi₂ten₅₄, ju₁lia'₂
i₂nió₄ dsa₂ a₂jmí₂. Tsá₃ ma₃'nió'₅ le₃chong₂ i₁nió₁
le₁'ein₅, on₃ guē'₂ o₂'ñió₃ o₂ñia₃ dsi₅, on₃ guē'₂ nió'₄
jniog₄ jág₁ quian'₅₄ i₂tsá₃ lín₅ dsi₂i₂gu₂ jniog₄, on₃
guē'₂ jmó'₁ a₂tsá₃ dsi₂ten₅₄, on₃ guē'₂ dsiá₁ mí'₅₄, on₃
guē'₂ qui₁jín₁ uin₅ dsi₅ rin'₅₄ ně₃.

14 Tē₂le₃ qui'₂ 'nia'₂ co₂'nió'₄ a₂qui₂rē₂lión'₃ 'nia'₂
lě₅ 'í₁ tē₂le₃ quian'₅₄ 'ñiog₅ Te₁gui'₅₄ Jesucristo, tsá₃
ma₃ju₁i₁dsi₂jio₅ guē₄ 'au'₂ 'a₂ lia'₂ mag'₂ dsi₅ a₂mi₅
ni₁ñí'₁ 'nia'₂.

* **13:9** Éxodo 20:13-15,17; Deuteronomio 5:17-19,21. † **13:9**
Levítico 19:18.

14

Tsá₃ chi₂ 'ing'₄ uig₅ ríng'₂

¹ Chi₂jua'₂ chan₂ dsa₂ 'uan₅₄ tē₂le₃ quian'₅₄ a₂'éin₂, qui₁guein₅₄ 'nia'₂, la₁ on₃jua'₅₄ ia₁jaun₂ qui₁tsín'₂ 'nia'₂ 'a₂ lia'₂ lě₅ ŋí'₂.

² Chan₂ i₂lín₅₄ i₂'én₂ a₂lé₂ le₃guě'₃ ca₂le₃jě₃ jui₁'e₂ guě₃, ton'₂ chan₂ guě'₂ táng₃ i₂lín₅₄ i₂'uan₅₄ dsí₅ 'a₂ lia'₂ 'éin₂, i₂guě'₅ jmá'₃ lia'₂ ca₂ne₅₄ mi₂ján'₅.

³ Jaun₂ lě₃ i₂guě'₅ lia'₂ 'ei₅ ne₄ ně₃, tsá₃ ca₂tín₂ jmo₃ jua'₅₄ tsá₃ jein₅₄ i₂tín₂ dsí₅ guě'₅ jmá'₃ lia'₂ a₂lín₅₄ má₃; ton'₂ ján₃ guě'₂ le₂jaun₂ jui₁lia'₂ i₂tsá₃ guě'₅ le₃jě₃, tsá₃ lě₁₀o₁quion₂ 'í₁ ja₁con₂ dsa₂ i₂guě'₅ le₃jě₃. Ia₁ ján₃ bá₄ ca₂guéi'₂ Diú₄ quió'₅ dsa₂ 'éi₂.

⁴ 'Ne₂ guě'₂, ħ'ein₂ bá₄ líng'₅ jua'₅₄ a₂caun'₅₄ 'í₁ ja₁con₂ dsa₂ i₂jme₂ti₃ ne₄ i₂sián'₂? Ia₁ juig₅₄ bá₄ 'éi₂ i₂niog₅ ne₄ con₂ 'í₁ chi₂jua'₂ chén'₅ 'éi₂ rě₂, o₃ tē₁tsin'₅₄ 'lig'₅₄ 'e₂. Jaun₂ tē₃tsin'₅₄ bá₄ rě₂, ia₁ i₂qui'₅₄ jmig₄ Te₁gui'₅₄ jmo₃ a₂tē₃tsin'₅₄ dsa₂ 'éi₂.

⁵ Chan₂ guě'₂ i₂lín₅₄ táng₃ i₂jmo₅ dsí₅, 'ŋio₅ guě₄ quen₅ a₂lín₅₄ jmig₄ lia'₂ con₂ guě₄ jmig₄ siá'₂; chan₂ guě'₂ i₂lín₅₄ i₂'én₂ jmo₂₃ dsí₅ a₂co₂rě₂ bá₄ ca₂le₃jě₃ jmig₄. Le₂jan₂ le₂jan₂ 'nió'₅ jmo₃ 'ei₅ caun₂ dsí₅ lia'₂ con₂ lě₅ dsí₂jnia₅ dsí₅ 'ŋiog₅.

⁶ Jui₁lia'₂ dsa₂ i₂jme₂gó'₃ caun₂ jmig₄, le₃quió'₅ Te₁gui'₅₄ bá₄ jme₂gó'₃ jmig₄ jaun₂. Le₂ně₅ bá₄ jui₁lia'₂ dsa₂ i₂guě'₅ lia'₂ 'ei₅ ne₄ má₃, guě'₅ le₃quió'₅ Te₁gui'₅₄, ia₁ cuě'₅ ti₁'mag'₄ Diú₄. Ján₃ bá₄ le₂ně₅ quian'₅₄ jui₁lia'₂ i₂tsá₃ guě'₅ lia'₂ 'ei₅ ne₄ má₃, le₃quió'₅ Te₁gui'₅₄ bá₄ tsá₃ guě'₅; ján₃ bá₄ cuě'₅ ti₁'mag'₄ Diú₄.

⁷ Ia₁ 'i₁jan₂ jniog₄ tsá₃ lé₂ le₃chong₂ le₃quían₂ guio₅₄, on₃ guě'₂ lé₂ le₃dsióg₃ le₃quían₂ guio₅₄ ně₃.

8 Ia₁ tē₁lia'₂ chong₂ jniog₄, chong₂ le₃quió'₅ Te₁gui'₅₄ bá₄, nē₁jua'₂ ca₂dsau₃ guē'₂ ně₃, dsióg₃ le₃quió'₅ Te₁gui'₅₄ bá₄ ján₃. Le₂nē₅ bá₄, tē₁lia'₂ chong₂ o₃ jē₁ma₂dsau₃ 'e₂, lág₅ i₂quían₅ Te₁gui'₅₄ bá₄.

9 'Uig₅₄ jaun₂ ca₂jon₃ Cristo, ton'₂ ca₂jein'₅₄ táng₃: ia₁jaun₂ léin₂ Te₁gui'₅₄ quían₅ dsa₂ i₂ma₂dsan₃, lia'₂ dsa₂ i₂chan₂ ně₃.

10 La₁ 'ne₂ ně₃, ħ'e₂ 'uig₅₄ cáun'₂ 'í₁ ja₁con₂ ríng'₂? ħ'o₃ 'e₂ lē₃ jíng'₅₄ sion₅ ríng'₂? Ia₁ ca₂le₃jág₃ bá₄ jniog₄ dsi₁no₃ dsi₂jme₁jnia₅ ne₄ Diú₄ ia₁jaun₂ con₂ 'éi₂ 'í₁ quían₂.

11 Ia₁ ne₄ Si₂ juá'₂:
Jui₁lia'₂ a₂dsón'₂ dsau₅ bá₄ a₂chan₂ jniá₂,
juá'₂ Te₁gui'₅₄,
le₂nē₅ bá₄ dsau₅ dsón'₂,
ca₂le₃jín₃ bá₄ qui₃jóin'₂ jne₅₄ ne₃ jniá₂,
jaun₂ ca₂le₃jín₃ bá₄ jmo₃ jág₁ quian'₅₄ mi₂'o₅₄
le₃ne₄ Diú₄.*

12 Le₂nē₅ bá₄ jaun₂, le₂jau₂ le₂jau₂ bá₄ jniog₄ dsi₁jang'₅₄ jág₁ dsau₅ quían₂ ne₄ Diú₄.

Tsá₃ jmó'₂ jua'₅₄ qui₂nió₃ ríng'₂

13 Jaun₂ lē₃, tsá₃ ma₃jua'₅₄ qui₁quiong₅₄ jniog₄ 'í₁ le₂jau₂ le₂jau₂ ja₁con₂ rin'₅₄. Tē₂le₃ jmo₄ 'nia'₂ 'í₁, jmo₄ co₂ŋei'₅₄ tsá₃ 'e₂ jmó'₂ 'i₁caun₂ jua'₅₄ a₂qui₃nió₃ ríng'₂.

14 Guion₄ bá₄ jniá₂, 'ei₅ caun₂ dsi₃ le₃quió'₅ Te₁gui'₅₄, 'i₁caun₂ tsá₃ cha₂ jua'₅₄ tsá₃ le₁jě₃ con'₂ lē₅ 'ŋiog₅. La₁ nē₁jua'₂ chan₂ jan₂ jmo₂₃ dsi₅, cha₂ caun₂ a₂tsá₃ le₁jě₃, le₃quió'₅ 'ŋiog₅ bá₄, tsá₃ le₁jě₃.

* 14:11 Isaías 49:18; 45:23.

15 Nē₁jua'₂ ca₂jén'₃ qui'₂ dsí₅ ríng'₂ o₄quió'₄ a₂quē'₂ 'ne₂, tsá₃ ma₃jmo'₂ a₂'nióg'₃ ríng'₂. Tsá₃ jmo₂ jua'₅₄ cuē'₁ jui₅ o₄quió'₄ a₂quē'₂, a₂dsi₂'én₂ jan₂ ríng'₂, ia₁ ca₂jon₃ Cristo o₄quió'₄ 'éi₂ ján₃.

16 Tsá₃ cuē'₂ 'nia'₂ jui₅ jua'₅₄ a₂qui₃dsia₃ dsa₂ 'lig'₅₄ 'ë₃ jui₁lia'₂ a₂jmo'₂ 'au'₂ a₂dse₃.

17 Ia₁ jui₁lia'₂ ja₁gon₂ Diú₄, tsá₃ lin₄ quen₅ jui₁lia'₂ a₂guē'₅ dsa₂, a₂qui₂'ín'₂ dsa₂ ně₃; a₂jaun₂ bá₄ a₂quen₅ guē'₄ lin₃: a₂gué'₂ Diú₄ jniog₄ ně₂ja₄ bá₄ a₂tsá₃ 'e₂ dso₄ rag₂, a₂chong₂ jniog₄ tei₄ o₂'ñi₃ o₂jnia₃ dsí₅ tē₂le₃ quian'₅₄ Jme₂dsí₂ Jñi₃ó₅.

18 Ia₁ jui₁lia'₂ i₂jme₂ti₃ ta₁ ne₄ Cristo le₂nē₅, jmo₂₃ a₂'ñio₂ dsí₅ Diú₄, ton'₂ dse₃ 'ag₅ táng₃ dsa₂ mi₂güí₃g₃.

19 Le₂nē₅ bá₄ jaun₂, caun₂ jui₁'niog'₅₄ jniog₄ jmá'₃ lia'₂ a₂cuē₅ jui₅ ja₁'ag₃ tei₄, a₂jme₂'o₅₄ dsí₃cau₅₄ jniog₄ tē₂le₃ jui₅ jme₂dsí₂.

20 Tsá₃ lē₁'én₅ 'ne₂ ta₁ quió'₅ Diú₄ o₄quió'₄ má₃. Dsón'₂ bá₄ jaun₂, a₂le₁jě₃ ca₂le₃jě₃ a₂niog₅ guē'₅ dsa₂. La₁ tsá₃ dse₃ ně₁jua'₂ o₄quió'₄ a₂quē'₂ 'ne₂, tián'₂ dso₄ ríng'₂.

21 Ja₂lin₃ guē'₄ dse₃ a₂tsá₃ quíg'₂ ñí₅, on₃ guē'₂ 'ag'₅₄ vino, on₃ guē'₂ jmó'₂ jui₁'e₂ guē'₃ a₂lé₂ le₃qui₃nió₃ ríng'₂.

22 Jui₁lia'₂ a₂'én'₂ 'ne₂, a₂'én'₂ 'ne₂ 'ñiag'₂ bá₄ jaun₂ tē₂le₃ ne₄ Diú₄, i₁'E₂ guē'₄ dsen₃ jui₁lia'₂ dsa₂ i₂con₂ 'í₁ ja₁con₂ 'ñiog₅, i₂tsá₃ qui₂dsi₂jñi₅ dsí₅ o₄quió'₄ a₂cuē'₂₃ jmig₄ 'ñiog₅!

23 La₁ jui₁lia'₂ dsa₂ i₂guē'₅, i₂'ei₅ caun₂-tín₃ dsí₅, ma₂gue₃ uig₅, ia₁ tsá₃ ca₂guē'₃ tē₂le₃ quian'₅₄ a₂'éin₂. Ia₁ ca₂le₃jě₃ a₂jmo₅ dsa₂ a₂tsá₃ lē₅ tē₂le₃ quian'₅₄ a₂'éin₂, dso₄ bá₄ jaun₂.

15

Jmo₄ a₂'ηio₂ dsí₅ dsa₂ mi₂güüg₃ ríng'₂, on₃jua'₅₄ rē'₂ jmá'₃ a₂tē₅ 'au'₂ 'ηiag'₂

¹ Jniog₄ i₂tióng₂ tiá₂ a₂'éin₂, ca₂tág₂ guéi₁ co₂'nió'₄ caun₂ lio₅₄ quián₂, 'a₂ lia'₂ qui₂ηí'₂ dsí₅ dsa₂ i₂'uan₅₄ 'a₂ lia'₂ 'éin₂, jaun₂ tsá₃ 'nió'₅ jmó₁ con'₂ a₂tē₅ dsí₅ guio₅₄.

² Le₂jau₂ le₂jau₂ bá₄ jniog₄ ca₂tág₂ jmó₁ a₂tē₅ dsí₅ dsa₂ mi₂güüg₃ rin'₅₄, a₂jmó₁ a₂lē₅ a₂dse₃ ja₁coin₂, ju₁lia'₂ ju₁5 ja₁lé₂ qui₂dsí₃cóin₃ le₃quió'₅ jme₂dsí₂.

³ Ia₁ ca₂lia'₂ jnia'₅₄ 'ηiog₅ Cristo tsá₃ ca₂jmo₃ a₂tē₅ dsí₅ 'ηiog₅. Tē₂le₃ ca₂i₃ηí₂ ju₁lia'₂ juá'₂ ne₄ Si₂:

Ca₂le₃jě₃ jág₁ uig₅ a₂jme₁tsí'₅ dsa₂ 'nia'₂,
ne₃ jniá₂ bá₄ ca₂tē₁tsi'₅₄.*

⁴ Ia₁ ca₂le₃jě₃ con'₂ lě₅ jág₁ a₂ca₂i₃to'₅₄ ne₄ Si₂, a₂ca₂i₃to'₅₄ ia₁jaun₂ jme₁tag₅ jniog₄ rē₂ně₃, ia₁jaun₂ caun₂ chong₂ jniog₄ 'ín₂ dsí₅ le₃quió'₅ Diú₄, tē₂le₃ quian'₅₄ a₂juin'₂ dsí₅, a₂lē₂ lián'₂ dsí₅ a₂cuē₅ jág₁ a₂já₅ ne₄ Si₂ jaun₂.

⁵ Ju₁jme₂'o₅₄ bá₄ Diú₄, i₂jmo₅ a₂juin'₂ dsí₅ dsa₂, i₂cuē₅ lián'₂ ně₃, ju₁jme₂'oin₅₄ 'nia'₂ a₂tiáng'₄ a₂jen'₂ 'nia'₂ le₂jang'₂ le₂jang'₂ con'₂ lě₅ i₂nio'₅₄ 'nia'₂ ju₁5 quió'₅ Cristo Jesús,†

⁶ ia₁jaun₂ ca₂le₃jín'₃ 'nia'₂ co₂dsia₅, caun₂ bá₄ jág₁, jme₁juin'₂ 'nia'₂ Diú₄ Jmei₂ Te₁gui'₅₄ Jesucristo quián₂.

Dsi'₂ag₅ jág₁ dse₃ ja₁con₂ dsí₂nau₂

* 15:3 Salmo 69:9. † 15:5 'Nio'₂ ja₁ton₅ Filipenses 2:5.

7 Le₂ně₅ jaun₂, qui₂guen₅₄ 'nia'₂ ríng'₂ le₂jang'₂
le₂jang'₂ ju₁lia'₂ ca₂guéi'₂ Cristo guio₅₄ jniog₄,
ia₁jaun₂ le₃juin'₂ Diú₄.

8 Ia₁ a₂juá'₅ jniá'₂ juíg'₂ 'nia'₂, ca₂guan₃ I₂rě₂'ín₁
quián₅ Diú₄, ca₂jme₃ti₃ ja₁con₂ jnia'₅₄ con'₂ lág₅ dsa₂
judíos,‡ ia₁jaun₂ le₃ti₃ jág₁ ron₅ a₂ca₂ŋ₂ dsa₂ can'₅₄
quián₂ jnia'₅₄ ma₂líg'₂. Jaun₂ le₂ně₅ bá₄ ca₂rě₃jniá'₂
ně₃ i₂rě₂ti'₅₄ bá₄ Diú₄ jág₁ a₂cuě₂₃.

9 Guain₃ ján₃ ia₁jaun₂ jme₃juag'₂ dsi₂nau₂
jme₃juin'₂ Diú₄ i₂ŋéi'₂ dsí₅, ju₁lia'₂ rě₂ton₅ ne₄ Si₂:
'Uig₅₄ jaun₂ jme₁juin'₂ jniá'₂ 'ne₂ jin₄ dsi₂nau₂;
'ě₅₄ jniá'₂ ne'₅₄ 'ne₂ a₂jme₁juag'₂. §

10 Con'₂ siá'₂ juá'₂ táng₃:
Jmo₄ 'io'₂, 'nia'₂ dsi₂nau₂,
quian'₅₄ dsa₂ juíg'₂ quián₅. *

11 Ja₁siá'₂ táng₃ juá'₂:
Jme₁juin'₂ 'nia'₂ Te₁gui'₅₄,
'nia'₂ ca₂le₃jín₃ dsi₂nau₂,
ju₁jme₂juag'₂ bá₄ ca₂le₃jě₃ juig₂. †

12 Ján₃ bá₄ juá'₂ Isaías:
'Ni₀2 tsin₅ cho'₅₄ Isaí,
jaun₂ náu₃ jan₂ i₂qui₃dsi₅ 'éi'₃ ja₁con₂ dsi₂nau₂;
le₃quió'₅ 'éi₂ bá₄ qui₃le₃'ín₂ dsí₅
le₂caun₂ le₂caun₂ juig₂. ‡

13 Jaun₂ Diú₄, i₂jmo₅ 'ei₅ caun₂ dsi₅ a₂'ín₂ dsi₅
jniog₄, ju₁jme₂cain'₂ bá₄ 'au'₂ 'nia'₂, a₂chang'₂ jmó'₂
'nia'₂ 'io'₂, 'ag₃ tei₄ a₂'éng'₂ le₃quió'₅, ia₁jaun₂ rě₂tsón₂

‡ 15:8 lit. “dsa₂ i₂rě₂uig₄ quió'₅.” § 15:9 2 Samuel 22:50; Salmo
18:49. * 15:10 Deuteronomio 32:43. † 15:11 Salmo 117:1.

‡ 15:12 Isaías 11:10.

a₂le₁'áǵ₄ caun₂ 'au'₂ a₂'ín₂ 'au'₂ 'nia'₂ quian'₅₄ jui₅bí₂
quió'₅ Jme₂dsí₂ Jñi₅ó₅.

14 Caun₂ bá₄ 'ei₅ dsi₃ jniá₂, rin'₅₄ jniog₄,
ma₂qui₂le₁rin₅ 'au'₂ 'nia'₂ a₂ñéi₂ 'au'₂ ríng'₂, ton'₂
qui₂le₁rin₅ 'au'₂ 'nia'₂ a₂tín'₂ 'nia'₂, jaun₂ qui'₅₄ 'nia'₂
jmig₄ tóng'₄ jáǵ₁ ríng'₂ le₂jang'₂ le₂jang'₂.

15 A₂tiá₂ dsi₃ jniá₂ ma₂ně₂juá'₃ ja₁lin₅₄, ma₂ně₂tó'₃
jniá₂ jáǵ₁ ne₄ sí₂ la₂ ne'₅₄ 'nia'₂, ia₁jaun₂ tsá₃ dsi₃'én₂
'au'₂ 'nia'₂. A₂'ua₁ dsi₅ bá₄ Diú₄ ma₂dsia₃ gu₃ ta₁ la₂,

16 a₂jme₂tí₁ ne₄ Jesucristo jě₄ quió'₅ dsi₂nau₂,
a₂qui₂jen'₄ jniá₂ ne'₅₄ 'nia'₂ jáǵ₁ dse₃ a₂lión₂ dsa₂,
ia₁jaun₂ lé₂ qui₂jen'₄ 'nia'₂ i₂lín'₅ dsi₂nau₂, le₃ne₄
Diú₄, ně₂jag₄ bá₄ caun₂ a₂rě₂jen'₅₄ a₂guéi'₃, co₂'nió'₄
dsa₂ i₂ma₂rě₂tson₄, ca₂jmo₃ Jme₂dsí₂ Jñi₅ó₅.

17 Jaun₂ lě₃, jmo₅ jniá₂ táng'₅ le₃quió'₅ Cristo Jesús,
quian'₅₄ ta₁ a₂jmo₅ jniá₂ ne₄ Diú₄;

18 on₃jua'₅₄ rě'₂ a₂tiá₂ dsi₃ jniá₂ le₃juá'₄ lě₅ guě₄
lia'₂ con'₂ guě₄ ju₁lia'₂ a₂ma₂qui₂ma₂jmo₃ Cristo
tě₂le₃ quian'₅₄ jniá₂, a₂tsin'₅₄ jniá₂ dsi₂nau₂ ne₄ jui₅,
quian'₅₄ jáǵ₁ quió'₃, quian'₅₄ ta₁ quió'₃ ně₃, a₂le₃ne'₅₄
'éi₂ ne₄ Diú₄.

19 A₂lě₅ ta₁ ně₅ tě₂le₃ quian'₅₄ jui₅bí₂ a₂'io₅ léi₄
juě'₂ a₂dsi₂gó'₃ dsi₅ dsa₂, tě₂le₃ quian'₅₄ jui₅bí₂ quió'₅
Jme₂dsí₂ Jñi₅ó₅ ně₃. Le₂ně₅ bá₄ ma₂ca₂jme₁ñiag₂₃ ta₁
ma₂qui₂ma₂ě₃ jáǵ₁ dse₃ quió'₅ Cristo, ca₂jme₁lióg₄
jniá₂ jui₂ Jerusalén, jaun₂ guě₄ ñeg₅₄ ta₁caun₂ jui₅
le₃lág'₃, ca₂lia'₂ ca₂dsióg₃ tě₂ 'uě₃ Ilírco.

20 Le₂ně₅ bá₄ ma₂ca₂jmo₃ dsen₅₄ dsi₃
ma₂qui₂ma₂ě₃ jáǵ₁ le₂tan₅₄ jui₂ ja₁'i₁cón'₂ tsá₃
jme₁ma₂nág₂ dsa₂ a₂'ín₅ dsa₂ Cristo, ia₁jaun₂ tsá₃
cho₅₄ jniá₂ ta₁ ne₄ 'ui₅₄ 'ia'₂ a₂ma₂ca₂jme₃lióg₃
i₂sián'₂.

21 La₁ ju₁lia'₂ juá'₂ ne₄ Si₂:
 Já₃ dsa₂ jín₃ 'éi₂
 i₂tsá₃ jme₁ma₂gú'₃ já₃ quió'₅;
 jaun₂ le₃ŋí'₂ dsí₅
 ju₁lia'₂ i₂tsá₃ jme₁ma₂nág₂ a₂'in₅ 'éi₂.§

Ds₂jio₃ dsí₅ Pa₄ dsó₃ ju₅ Roma

22 'U₁g₅₄ nē₅ ca₂jní₃ jniá₂ ju₅ 'líong₂ ráun₂ lia'₂ con'₂
 jme₁'nio₃ jme₁i₁jing₁₂ 'nia'₂.

23 La₁ nē₃ guè'₂ lia'₂ tsá₃ ma₃cha₂ ja₁jmo₅₄ ta₁
 le₂tan₅₄ juig₂ te₁'i₁ le₃la₂, jaun₂ ma₂ne₁ŋó₄ bá₄ 'líong₂
 ŋi₂ jme₁'in₅ dsí₃ jme₁nei₅₄ i₁jing₁₂ 'nia'₂,

24 'ín₂ dsí₃ jniá₂ ŋig₅₄ ju₅ ja₁tion'₅₄ 'nia'₂ jē₁ma₂tē₂
 rē₁nei₅₄ ju₅ España, ia₁jaun₂ lé₂ le₃tsag'₅₄ ne₄ ju₅
 jaun₂, cang₂ jē₁ma₂ca₂mag'₂ dsí₃ jing₅₄ 'nia'₂.

25 La₁ rē₂nē₃ nē₃, 'eng₅₄ ju₅ nei₅₄ ju₅ Jerusalén,
 a₂jme₁ti₁ jniá₂ ta₁ ja₁con₂ dsa₂ quián₅ Diú₄ ja₁jaun₂.

26 Ia₁ i₂chan₂ Macedonia quian'₅₄ i₂chan₂ Acaya
 nē₃, ca₂jmo₃ dsí₅ ca₂cág'₃ cu₄ a₂chein₃ ne₄ rin'₅₄
 jniog₄ i₂tē₂ŋé₂ i₂chan₂ juig₂ Jerusalén.

27 A₂'ŋio₂ dsí₅ ca₂jmo₃ le₂jaun₂, ia₁ dsau₅ bá₄ jaun₂
 riin₂ le₃quió'₅ 'éi₂. Ia₁ chi₂jua'₂ ma₂qui₂ma₂quen'₅₄
 dsí₂nau₂ a₂gu₂dsí₂ a₂ca₂cuë₃ dsa₂ judíos, já₃n₃ bá₄
 le₂jaun₂ ca₂tíin₂ jme₃'o₅₄ quian'₅₄ a₂'nió'₅ le₃quió'₅
 ni₁ŋí₅.

28 Jaun₂ le₂nē₅, jē₁ma₂ca₂dsan₃ jáng'₅ jniá₂ ne₅₄
 a₂ma₂ca₂cág'₃ dsa₂ jaun₂, jaun₂ gué₄ 'ú₄ ju₅ a₂nei₅₄
 ju₅ España, a₂i₁jing₁₂ 'nia'₂ lia'₂ ma₂'eng₅₄ ju₅.

29 Jaun₂ caun₂ bá₄ 'ei₅ dsí₃, a₂jme₃gu'₅₄ bá₄ Cristo
 lia'₂ rē₂'ŋia₅ jē₁ma₂tē₂ rē₁dsióg₄ jniá₂ a₂i₁jing₁₂ 'nia'₂.

30 Rin' ₅₄ jniog₄, mi₅ jniá₂ ja₁con' ₂ 'nia' ₂ lia' ₂ con' ₂ lě₅ 'éi' ₃ quió' ₅ Te₁gui' ₅₄ Jesucristo quián₂ jniog₄, ton' ₂ ia₁ a₂cuē₅ Jme₂dsí₂ bí₂, a₂jme₁'nió₄ jniog₄ rin' ₅₄: a₂jme₁quiong' ₅₄ 'nia' ₂ jniá₂, ne₄ 'nei₂ a₂chéng' ₅, a₂chi₁len' ₄ 'nia' ₂ Diú₄ o₄quió₃.

31 Mi₄ 'nia' ₂ ne₄ Diú₄ ju₁lio₅₄ jniá₂ o₄gú₃ dsa₂ i₂tsá₃ 'én₂ i₂chan₂ Judea, le₂jaun₂ guē' ₂ ján₃ ju₁gue₅₄ bá₄ rin' ₅₄ jniog₄ ju₁g₂ Jerusalén caun₂ dse₃ a₂i₁can₁₂ a₂jme₁'oin₁₂,

32 ia₁jaun₂ chi₂jua' ₂ 'nio₃ Diú₄ a₂dsióg₄ jniá₂, i₁jing₁₂ 'nia' ₂ a₂'io' ₂ jmo₂₃, a₂tág' ₄ jme₂dsí₂ quió₃ co₂dsia₅ quian' ₅₄ 'nia' ₂.

33 Ju₁quiong' ₅₄ bá₄ Diú₄ i₂jmo₅ 'ei₅ tei₄, ca₂le₃jín' ₃ 'nia' ₂. A₂méi₃.

16

Cu₁in₂₃ Diú₄ le₂jan₂ le₂jan₂

1 Jme₂jnia₄ jniá₂ 'io₅₄ rin' ₅₄ jniog₄ Febe, i₂ma₂já₅ jme₂ti₃ ja₁con₂ guá' ₅ chan₂ Cencrea.

2 Guein₅₄ bá₄ dse₃ o₄quió' ₄ Te₁gui' ₅₄, jmo₄ bá₄ con' ₂ dsi₂ten₅₄ jmo₃ dsa₂ ja₁con₂ riin' ₅₄ i₂'én₂, * ján₃ guē' ₂ jme₁'oin₁₂ quian' ₅₄ ju₁'e₂ guē₃ a₂ca₂rē₃'nió' ₃ quió' ₅, ia₁ ma₂ca₂jme₃'o₅₄ bá₄ 'éi₂ 'ŋiog₅ ma₂ca₂jme₃'oin₅₄ ju₁n₅, ján₃ guē' ₂ le₂jaun₂ ma₂ca₂jme₃'o₅₄ jniá₂.

3 Cu₁n₅₄ Diú₄ Priscila† quian' ₅₄ Aquila, i₂lín₅ i₂quian' ₅₄ jniá₂ jë₄ ta₁ a₂niog₅ quió' ₅ Cristo Jesús.

4 'Éi₂ bá₄ ca₂jmo₃ tén' ₂ dsí₅ o₄quió₃ jniá₂, o₁jnia' ₅₄ ca₂quí' ₃ dsa₂ dsí₂lag₅₄. Jaun₂ cuē₅ jniá₂ ti₁'mag' ₄ 'éi₂. On₃ jua' ₅₄ jmá' ₃ jniá₂; ca₂le₃jín₃ dsí₂nau₂ i₂'én₂ cuē₂₃ ti₁'mag' ₄ ján₃.

* 16:2 lit. "dsa₂jjió₅." † 16:3 griego: Prisca.

5 Nē₅ i₂cuíng'₅ Diú₄ ján₃ dsa₂ rín'₅₄ jniog₄ i₂ŋi'₂ dsi₂néi₂ quió'₅ Priscila quian'₅₄ Aquila ně₃. Cuin₅₄ Diú₄ Epeneto a₂mei₅₄ quiáng₃, dsa₂ i₂le₂'uig₅₄ i₂ca₂rē₃'én₂ le₃quió'₅ Cristo 'uē₃ Acaya.‡

6 Cuin₅₄ co₂nio₄ Diú₄ María, ia₁ 'ŋio₅ lin₃ ma₂jmo₃ ta₁ o₄quián'₂ 'nia'₂.

7 Cuin₅₄ co₂nio₄ Diú₄ Andrónico quian'₅₄ Junias, dsa₂ go₃ jniá₂ i₂quiang'₅₄ ca₂'ú₃ né'₃ 'má₃; co₂'nió'₄ dsa₂ i₂lén₄ i₂cuig₅ guē₄ dsa₂ i₂chen₄ quián₅ Te₁gui'₅₄, co₂'nió'₄ dsa₂ i₂jme₁ma₂tion'₅₄ le₃quió'₅ Cristo le₂jñiá₅ guē₄ con'₂ guē₄ jniá₂.

8 Cuin₅₄ Diú₄ Amplias, jan₂ i₂'nió₃ jniá₂ le₃quió'₅ Te₁gui'₅₄.

9 Cuin₅₄ co₂nio₄ Diú₄ ján₃ Urbano, dsa₂ i₂quian'₅₄ jniog₄ jmo₂ ta₁ quió'₅ Cristo Jesús, quian'₅₄ Estaquis ně₃ i₂lín₅ a₂mei₅₄ quiáng₃ i₂'nióg₃ guē₄ lin₃.

10 Cuin₅₄ Diú₄ Apeles, i₂ma₂já₅ cuē₂₃ léi₄ a₂ŋi₂₃ le₃quió'₅ Cristo, le₂jaun₂ bá₄ jmo₄ co₂nio₄ quian'₅₄ ca₂le₃jín₃ i₂chan₂ dsi₂néi₂ quió'₅ Aristóbulo ján₃.

11 Cuin₅₄ Diú₄ Herodión, dsa₂ go₃ jniá₂, quian'₅₄ guē'₂ dsa₂ familia quián₅ Narciso i₂'én₂ le₃quió'₅ Te₁gui'₅₄.

12 Cuin₅₄ bá₄ co₂nio₄ Diú₄ Trifena quian'₅₄ Trifosa ně₃, on₃ dsa₂ m'í₂ i₂jmo₅ ta₁ quió'₅ Te₁gui'₅₄, quian'₅₄ guē'₂ 'io₅₄ rín'₅₄ jniog₄ Pérsida i₂'nió₄ guē₄ lin₃, i₂ŋí₄ ma₂jmo₃ ta₁ quió'₅ Te₁gui'₅₄ ján₃.

13 Cuin₅₄ bá₄ Diú₄ Rufo i₂lín₅ dsa₂ i₂ma₂quion'₅₄ quián₅ Te₁gui'₅₄, quian'₅₄ chog₅₄, i₂jing₅₄ ně₂jag₄ bá₄ cha₃ ján₃.

‡ 16:5 griego: Asia.

14 Cuin₅₄ Diú₄ Asíncrito, Flegonte, quian'₅₄ guë'₂ Hermas, Patrobas, Hermes ně₃, quian'₅₄ guë'₂ dsa₂ rin'₅₄ jniog₄ i₂quaiin'₅₄ ně₃.

15 Cuin₅₄ 'nia'₂ Diú₄ ján₃ i₂chen₂ Filólogo quian'₅₄ Julia, Nereo ně₃, quian'₅₄ 'io₅₄ riin'₅₄; cuin₅₄ 'nia'₂ Diú₄ Olimpas quian'₅₄ guë'₂ ca₂le₃jín₃ rin'₅₄ jniog₄ i₂én₂Š i₂tion'₅₄ quaiin'₅₄.

16 Cuin₅₄ 'nia'₂ Diú₄ ríng'₂ le₂jang'₂ le₂jang'₂ a₂qui₁chén'₁* 'nia'₂ quió'₅ ríng'₂, a₂lě₅ léi₄ a₂ma₂'ei₅ caun₂ jág₁ a₂le₁jě₃ 'au'₂ quian'₅₄ ríng'₂. Ca₂le₃jín₃ bá₄ guá'₅ quián₅ Cristo dsiáin'₂ jág₁ a₂cuin₂₃ Diú₄ 'nia'₂.

17 Rin'₅₄ jniog₄, mi₅ jniá₂ ne'₅₄ 'nia'₂, rě₂ de'₂ quion₂ 'nia'₂ 'í₁, 'ein₂ dsia₅ mi'₅₄ jmo₅ le₁dson'₅₄ guá'₅, 'ein₂ chi'₅ jui₅ a₂qui₂nió₃ dsa₂, a₂tsá₃ dsi₂ten₅₄ lia'₂ con'₂ lě₅ jág₁ a₂ma₂ca₂rě₃tín'₃ 'nia'₂. Jaun₂ co₂dsia₅ chén'₂ 'nia'₂ cau₅ i₂jmo₅ le₂jaun₂.

18 Ia₁ on₃jua'₅₄ dsa₂ i₂jme₂ti₃ ne₄ Te₁gui'₅₄ Jesu-cristo i₂le₂'éi₂; con'₂ jnia'₅₄ jme₂ti₃ ne₄ a₂mi₅ ni₁ŋi₁ guioin₅₄ bá₄, qui₂jme₂gain₂₃ dsí₅ jui₁lia'₂ dsa₂ i₂tsá₃ lin₄ ŋí'₂ dsí₅, quian'₅₄ jág₁ 'ua₁, jág₁ rau₂ ně₃.

19 Ca₂le₃jín₃ bá₄ dsa₂ le₁ŋi₅ 'a₂ lia'₂ ma₂ja₂nó'₅ 'nia'₂ a₂neg'₅₄, jaun₂ 'io'₂ jmo₅ jniá₂ o₄quián'₂ 'nia'₂. La₁ia₁ 'nio₃ jniá₂ a₂lén'₂ 'nia'₂ 'ŋiog'₅₄ le₃quió'₅ a₂dse₃, ján₃ bá₄ le₂ně₅ a₂lěng'₂ dsa₂ i₂tsá₃ 'e₂ dsi₂jŋia₅ dsí₅ ne₄ a₂'lig'₅₄.

20 Jaun₂ Diú₄ i₂jmo₅ 'ei₅ tei₄, ŋi'₅₄ ta₁ jlein'₃ i₂sě₃dsen₃ o₄tag'₄ 'nia'₂. Jui₁'ei₅ bá₄ a₂dse₃ dsí₅ Te₁gui'₅₄ Jesús quián₂ jniog₄ ja₁con'₂ 'nia'₂.

Š 16:15 lit. “dsa₂ jŋi₅.” * 16:16 Caun₂ tag₄ a₂jme₁chí'₄ lia'₂ con'₂ ca₂jmo₃ Pa₄ si₂ la₂.

21 Timoteo, i₂quian'₄ jniá₂ jmo₂₃ ta₁, dsiáin'₂ jág₁ a₂cuin₂₃ Diú₄ 'nia'₂; le₂jaun₂ bá₄ ján₃ Lucio quian'₅₄ Jasón, Sosípater, i₂lín₅ dsa₂ go₃ jniá₂.

22 Jniá₂ Tercio i₂tó'₃ jág₁ la₂ ne₄ si₂, ján₃ bá₄ cuín₅ jniá₂ Diú₄ 'nia'₂ o₄quió'₄ Te₁gui'₅₄.

23 Gayo ně₃ dsiáin'₂ jág₁ a₂cuin₂₃ Diú₄ 'nia'₂. Dsi₂néi₂ quió'₅ 'éi₂ bá₄ 'eng₅₄. Já₃ bá₄ cuē₂₃ dsi₂néi₂ quió'₅ cuē'₅ ca₂le₃jín₃ dsa₂ quián₅ guá'₅. Erasto dsa₂ i₂nio₅ gu₂ cu₄ quió'₅ dsa₂ juig₂ ně₃, dsiáin'₂ jág₁ a₂cuin₂₃ Diú₄ 'nia'₂ ján₃; i₂chen₂ Cuarto rin'₅₄ jniog₄ ně₃.

24 Ju₁i₁jme₂gu'₅₄ bá₄ Te₁gui'₅₄ Jesucristo 'nia'₂ ca₂le₃jíng'₃, A₂méi₃.†

'Ág'₃ jág₁ Pa₄ a₂jme₂juin'₂ Diú₄

25 Ně₃ ně₃, ju₁i₁jme₂juin'₂ jniog₄ Diú₄. 'Éi₂ bá₄ lé₂ le₃jmo₃ a₂náu'₁ 'nia'₂ tiá₂ lia'₂ con'₂ lě₅ jág₁ dse₃ quió'₅ Cristo a₂'ě₅ jniá₂, lia'₂ con'₂ lě₅ ca₂jme₃jnia₅ Diú₄ jág₁ quió'₅ a₂jme₁rē₂'ma₄ ca₃ma₂líg'₂ lin₃.

26 Diú₄ i₂chan₂ co₂tan₅₄ 'éi₂ bá₄ ca₂jmo₃ 'éi'₃ a₂jmo₃ jág₁ dsa₂ i₂chen₄ quiáin₅ ma₂líg'₂, jág₁ a₂ca₂tó'₂ 'éi₂ ne₄ Si₂, ia₁jaun₂ le₃ŋi₅ dsa₂ chan₂ ca₂le₃jě₃ juig₂ nación, ia₁jaun₂ le₃'éin₂ jág₁ jaun₂, le₃nei'₅₄ ně₃.

27 ¡Diú₄ i₂jan₂ tan₅₄, i₂tin₂, i₂ŋi₅, ju₁i₁le₂juin'₂ bá₄ tē₂le₃ quian'₅₄ Jesucristo ca₂lia'₂ co₂tan₅₄! A₂méi₃. Co₂ně₅.

† 16:24 Chog₅₄ si₂ a₂dse₃ guě₄ tsá₃ chi₁ton₅

Jag₁ 'mí₂ a₂ma₂li'₅₄ quian'₅₄ Diu₄
New Testament in Chinantec, Tepetotutla
(MX:cnt:Chinantec, Tepetotutla)

copyright © 1994 Wycliffe Bible Translators, Inc.

Language: Chinantec, Tepetotutla

Translation by: Wycliffe Bible Translators, Inc.

Chinanteco, Tepetotutla [cnt], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chinantec, Tepetotutla

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 30 Dec 2021

5c52af9e-3086-5d57-9b7e-2e495fea8899